

Slera-aha á emnde a bela á Yaisu

Watse Edderwa á velakurte Shedekwe Cufedde

¹ Ámbarka á ña Tiyaufilus: Náwa názu yá puwaktá ya áte elva a Yaisu: Am wakita na ndza ya puwakte zuññwe na keni ndza ya ndakndaha bademme, názu ndza a maganaa ñane, antara názu ndza a kwaratersaa ñane ge emnde, fetaufe á slera-aha-aara,

² dem vacite na a eksante ge Dadaamiya á dem samaya. Am sarte na zlaɓe zlaalaaka á dem samaya na wá, a kwaraterse názu watse tá de maganá itare bademme ge emnde a bela-aara. A kwaraterse an hakuma á Shedekwe Cufedde.

³ A marateraa ire-aara ser kwakya, geni a diyareddiye ba shagera ganakini ñane an shifa ba jirire; háre kul ufaɗe á kwaraterse elva áte *kwára á Dadaamiya.

⁴ Vacite umele tá arge náza za wá, a ba ñane á elvan ge itare: «Njawinja á ba áhuna am Urusaliima, ufawufa názena a ba Edderwa watse á de vakurteva ya ndakurndaa na.

⁵ Adaba Yuhanna wá, ñane a magateraa bap-tisma ge emnde an yawe, amá kure wá, á de haraaka kwakya watse tá magakurá bap-tisma an Shedekwe Cufedde.»

Zlálá á Yaisu á dem samaya

⁶ Daaci ta jamme ge pukura-aha átevege ñane, ta ndavanuhe: «Watse ká tsatsaná á ba am sarte ñanna emtu sleksire á *Iserayiila Yaakadada?»

⁷ A ñwaterante ge Yaisu, a ba ñane á elvan ge itare: «A tsanaa ba Edderwa palle an hakuma-aara zamane-aha, antara sarte-aha ñanna, slera á kure-ka ge dise una.

⁸ Kure wá, watse kwá shá hakuma áza Shedekwe Cufedde na á de vakurtá Dadaamiya na, kwá de maga seydire an zhara-aaruwa am Urusaliima áhuna, am huđe á Yahudiya bademme, am *Samariya, dem huđe á duniya bademme.»

⁹ Ba a ndaase una ñanna Yaisu wá, a naba tsetehe á dem samaya á ba áte ice-aatare, a shebanvehe ge kumba.

¹⁰ Áma itare zlađe tá zhara ba ice á dem samaya. Daaci ta naba jesaarehe ge zala buwa, tá am nanjyuwe dzayye á katafke-aatare ba estuwa,

¹¹ a ba itare tá elvan ge itare: «Ekkure emnde a Galili na labára kwa tsatsehe estuwa, kwá zhara ice á dem samaya na? Yaisu ñanna kwá zharaná kure a yakurhe na wá, watse á eptsa zlađe ádaliye ba seke una kwá anƙwa zharaná kure á zlala á dem samaya na.»

Ta eksetaa ura am kelá á Yahuda

¹² Daaci ta naba tsekwehe ge pukura-aha áte egdza wa ñanna tá daháná an Wa Anyaranyara na, ta naba eptsa-aatare á sem Urusaliima. Wa ñanna yiyiyeka dekidfeki, dágave-aatare á jauka am kilaumaiter palle antara Urusaliima.

¹³ Ba saraasa am Urusaliima maa, ta d'álá á ba á dem bere-aatare na mbarsembe nja am huđe-aara, bere átire ge bere umele na. Náwa itare zhera-aha-aatare: Piyer, Yuhanna, Yakuba, Andere, Filip, Taumas, Bartaulauma, Mata, Yakuba egdza á Halfa, Simaun na wayaaka tá kwaráterá emnde umele na, antara Yahuda egdza á Yakuba, itare una ta emnde a beta,

¹⁴ antara tara Maari emmenjara ge Yaisu, ira egdzar mama-aha-ńára ge Yaisu, antara njwasha umele. Emnde njanna bademme tá anjkwá jáháva ba kelaazare, tá anjkwá njala Dadaamiya átirpalle.

¹⁵ Vacite umele maa, jarammeje emnde a fetarfe tá maga deremke an kul buwa wá, a tsetehe ge Piyer, a tsaahé am dágave-aatare,

¹⁶⁻¹⁷ a ba njane á elvan ge itare: «Ba estuwa egdzar mama-aha-aaruwa, Yahuda, njane keni ndza ba palle á miya, a maganaa slera ge Dadaamiya á ba am dágave á miya, amá am sarte na emnde tá kátá eksa Yaisu wá, njane a gev slekatafke-aatare. Elva á Yahuda wá, ndza a enndáhá Shedekwe Cudedfde á kya *Dawuda ganakini watse á geva njane slekatafke á emnde a eksa Yaisu. Daaci shagera ba á sessa jirire-aara,» a ba Piyer.

¹⁸ (Yahuda maa, a de shekweve fe an shungu na ta vanta adaba haypa-aara njanna, amá a shaa emtsa am fe njanna. Duwa-aara á dem fe njanna, a de mbedehe á ba an ndzedá, a naba kyehe ba seke feka, a paceve ge nanje-aara.

¹⁹ Bademme á emnde a Urusaliima diyardiya lámare njanna. Adaba una njanna, ta fanaa

zhera á Akaidama ge fe ɲanna an elva a ekse-aatare, amaana: Fáhe á uzhe.)

²⁰ Daaci Piyer a eksetaa elva-aara zlaɓe ádaliye, a ba ɲane: «Elva á Yahuda wá, aɲkwa puwartepuwa am jabura, geni sey wulfe-aara á nyefnye ba gela. De ba á katafke keni, ɓaaka ura á fá sera am sleɗe-aara. Aɲkwa an puwa zlaɓe ádaliye geni sey á demá ba ura umele á dem kela-aara.

²¹⁻²² «A ndahanaa wakita á Dadaamiya tsawe estuwa wá, daaci sey mi shansha ura palle á njá antara miya, mi maga seydire á tse á Yaakadada Yaisu am fáyá kerɗe. Edda-aara ɲanna keni sey mi eksana am dágave á emnde na ni ndza tá aɲkwa antara miya ba kelaazare, am sarte na má aɲkwa já ɗaba antara Yaakadada Yaisu am huɗe á larde na. Sey edda una ndza aɲkwa antara miya daga segashe á Yaisu am yawe á baptisma áza Yuhanna, dem sarte a zlála-aara á dem samaya.» Estuwa a ba Piyer.

²³ Daaci ta tsatsaa zala buwa, tara Yusufa, ɲane una a shaa zhera á Barsabas, Yustus keni ba zhera-aara, tá antara Matiyas.

²⁴ Daaci ta magaa maduwa á deza Dadaamiya, a ba itare: «Yaakadada á miya, ekka wá, diyakdiya názu am huɗe á emnde baɗemme. Aɗaba una ɲanna, maraɲeránmára edda una ni ka eksesaa ka am emnde buwa na,

²⁵ ge mága slera na a yanaa Yahuda na. Aɗaba zlazlála ɲane á dem tate na á zlayán ge ɲane.»

²⁶ Daaci ta puwete zhera-aha-aatare áte nákwá, ta magaa njeri wá, a segasha zhera á

Matiyas, ta maslaterve ge emnde a bela, nane a gevaa kelaawa ju buwire-aatare.

2

Sawa á Shedekwe Cufedfe

¹ Am samsa munri á *Pantaikausta maa, ta jamme ge emnde a fetarfe bademme am tate palle am munri nanna.

² Daaci cekwaangudí wá, tá cena ba hula á duksa á sá am samaya ba seke mága á effeya yaikke, hula-aara a se hyema am huđe á bere na tá am huđe-aara na.

³ Tá zhara ba sessa duksa umele á gáráva an nara á kárá wá, duksa nanna a tegese gergere kwakya, a tsakwaa áte ire-aha-aatare pálpale bademme.

⁴ Ta nahete estuwa an Shedekwe Cufedfe, ta fantau ge ndáhá elva an we á ekse gergere, tá ndahaná an hakuma na a vatertaa Shedekwe Cufedfe na.

⁵ Am sarte nanna maa, tá anjwa Yahudiya-aha na ta segáshe am larde-aha á duniya bademme, tá njá am Urusaliima, narnaana nadina-aatare á ba an jirire.

⁶ Am sarte na cenarácena hula á duksa nanna maa, ta naba sawa, ta se jamme am tate nanna. Weshaptewesha enjkale-aatare bademme, adaba ma ware-aatare keni á cená emnde a fetarfe na tá ndáhá elva á ba an we á ekse-aara.

⁷ Bademme-aatare tá maga ba najipu-aara, diyarka ba názu tá enndáhá keni. A ba itare: «Emnde na tá ndáhá elva na, ábi bademme-aatare ta ba emnde a Galili?»

⁸ Ay a sawa estara kena bademmire á miya má aṅkwa á cenatercena, ma ware á miya keni á cena ba elva na ta yanaa am huđe-aara na?

⁹ Miya, náwa emnde umele á miya kwaye ta sawa am haha á Partiya, emnde umele ta sawa am Maidiya, emnde umele ta sawa am Ailamiya, emnde umele ta sawa am Maisaupautamiya, emnde umele ta sawa am Yahudiya, emnde umele ta sawa am Kapadaukiya, emnde umele kwaye ta sawa am Pauntus, antara Aziya,

¹⁰ emnde umele ta sawa am Pirigiya, antara Pamfliya, emnde umele ta sawa am Misera, antara dalbe palle am haha á Libiya átevege haha á Siraine, emnde umele kwaye ta sawa á sa am larde á Rauma.

¹¹ Zlađe ádaliye, emnde umele kwaye ta sawa am Kairaita, antara Arabiya. Tá aṅkwa Yahudiya-aha miyenne, antara emnde na ta deme an de á dem nadina á Yahudiya-aha. Aley ni bademmire á miya mi cena ma ware keni tá aṅkwa á ndaha slera yaikke na a maganaa Dadaamiya na á ba an we á ekse-aara?»

¹² Najipu ṅanna jauje ge ndzedfa-aatare, di-yarka ba názu tá enndáhá keni. Ázara kena jeba una, a ba itare am dágave-aatare.

¹³ Amá emnde umele-aatare ágire tá epsawa emnde a fetarfe wá, a ba itare a datersaa ba mbazla am eṅkale.

Waazu á Piyer

¹⁴ Daaci a naba tsetehe ge Piyer antara emnde a bela umele, a fantau ge ndahater elva ge emnde a jahava á ba an ká kwárá, a ba ṅane:

«Kure Yahudiya-aha, antara emnde umele na tá am huđe á Urusaliima na bademme, fawfa hyema ba shagera, cenawáncena názu yá anƙwa á ndakurndaa na:

¹⁵ Emnde na wá, weshateka ire-aatare áte una kwá slaná kure na. Adaba zlađe ba gusere emtsaafé.

¹⁶ Una ba jirire á názena ndza a ndahanaa nabi Yauwail, a ba ɲane:

¹⁷ A bantsa Dadaamiya: Náwa názu watse á de magava am halavuwa á zamáne-aha: Watse yá hyantehye Shedekwe-aaruwa áte emnde bademme. Egdzara á kure zála, an ɲwasha tá de shá wahayu-aha, tá de maga slera á nabiyire, yá de vaterte shene ge emgyegwar zala-aha á kure.

¹⁸ Yá de hyantehye Shedekwe-aaruwa áte náve-aha-aaruwa, antara kwatena-aha-aaruwa keni. Bademme tá de maga nabiyire am sarte-aha ɲanna.

¹⁹ Watse yá maganaamaga najipu-aha na ndza magaaveka deƙideƙi na am samaya antara áte haha. Watse anƙwa tara uzhe, antara kára, ira yire á kára yaikke ba seke kumba.

²⁰ Zlađe adaliye: Vaciya á de gev danɲwe, tere keni á de gev kyanɲe ba seke uzhe. Am iga á una-aha ɲanna maa, á de sawa kwaskwe yaikke na an dárádza jipu, á sawa Yaakadada átekwa na.

²¹ Daaci ma a dántaa ware zhera á Yaakadada keni á lyelye shifa-aara. Kwaya ɲane názena ni a ndahanaa Dadaamiya á kyá Yauwail.»

22 Daaci Piyer a eksetaa elva-aara zlaɓe ádalíye, a ba ɲane: «Ekkure emnde a *Iserayi-ila, cenaucena názu yá bakurná ya na: Yaisu ura Nasarátu na wá, a ɓelanaa ba Dadaamiya á sezekure. Adaba Dadaamiya a magaa nalaama-aha, antara najipu-aha umele gergere á kyá erva an ɲane am dágave á kure, ba kure keni diyakurdiya baɗemme.

23 Á ba am date keni Dadaamiya a tsanaa ba estuwa. ɲane diyaadiya ganakini watse á de fakurme am erva ge kure. Adaba una ɲanna kwa naba faterem am erva ge emnde a haypa, kwa jaa shifa-aara áte dzaŋgala.

24 Amá a naba ɲezlese ge Dadaamiya am zlaɗa á fáyá, aŋkwa an shifa-aara zlaɓe ádalíye. Adaba ɓaaka hákuma á emtsa ganakini á ɲanaaŋa.

25 Náwa názu a ndahanaa *Dawuda áte ɲane: Ba kelaazáre yá zhara ba Yaakadada an ice-aaruwa, aŋkwa á njá am naɗafa-aaruwa geni a gazleka ervaunɗe-aaruwa ɗekideki.

26 Adaba una ɲanna, gedantegeda jipu am ervaunɗe-aaruwa, baɗemme a názena a sansaa we-aaruwa, yá ndahaná á ba an higa. Ma yá an vuwa a laakire na keni, watse yá puwanse á ba an hairire, yá fá táma-aaruwa áte Dadaamiya.

27 Adaba ekka Dadaamiya wá, ká eblyanveka shifa-aaruwa ba estuwa am faya, ká yánka á seɓse vuwa á sleslera á ɲa ɗekideki.

28 Ka marisaa ka baráma a dem tate á shifa, ekka ká aŋkwa antara iya ba kelaazáre,

adaba una ɲanna ervaunɗe-aaruwa ba seke nama. Estuwa a ba *Dawuda.»

29 Piyer a eksetaa elva-aara zlaɓe ádaliye, a ba ɲane: «Egdzar mama-aha-aaruwa, máki ba eggyemiya *Dawuda wá, tsawaatse yá ndakurn-daha jirire-aara: ɲane wá, jaaveje hedarhedá, sem vatena keni zlaɓe aɲkwa irekhya-aara.

30 ɲane ndza nabi á Dadaamiya, ndza diyaadiya názu a bannaa Dadaamiya. Dadaamiya a zanu ba waɗa-aara, a ba ɲane: Yá de vante sleksire á ɲa ba ge palle á eggye-aha á ɲa, á de geva ba ɲane slekse am iga á ɲa.

31 Á ba am date keni ndza diyaadiya *Dawuda ganakini á de tsetsa *Almasiihu am fáyá, amaana: Edda una a eksesaa Dadaamiya. A ndahanaa adaba una ɲanna Dawuda, a ba ɲane: Dadaamiya yánka ɲane am fáyá, safka vuwa-aara ge ɲane dekiɗeki.

32 Ba Yaisu ɲanna degiya una tsantetse Dadaamiya am fáyá na. Náwa ɲere ɲa emnde a mága seyɗire-aara.

33 ɲane a demanve ge Dadaamiya, a njanaahe am naɗafa-aara, a de vante Shedekwe Cudedɗe na ndza a bántsa ɲane watse á de vanteva na. Daaci názu kwá nanaa kure, kwá cenaná kure kina na wá, á maganá ba Shedekwe Cudedɗe ɲanna a shanaa Yaisu na, a hyantaa ɲane áte ɲere.

34 *Dawuda an ire-aara wá, ɲane zlalaaka á dem samaya, amá a ba ɲane:

A ba Yaakadada, Dadaamiya á elvan ge Yaakadada-aaruwa: Njiinja ka am naɗafa-aaruwa,

35 dem sarte na yá gatervege kelaade-aha á ña náza puwa sera á ña.

36 «Daaci kure emnde a *Iserayiila wá, baðemme á kure diyaweddiye ba shagera ganakini Yaisu ñanna kwa naba zlañelehe áte dzañgala na wá, ba ñane una a tsanaa Dadaamiya ge Yaakadadire, ba ñane una *Almasiihu, edda una a eksesaa ñane.»

37 Ba cenarácena elva á Piyer ñanna wá, ba palle a eñkale-aatare baaka ñezlañezla er-vaunđe-aatare. Daaci a ba itare tá elvan ge tara Piyer antara emnde a bela umele: «Íjá maganá estara kina egdzar mama-aha-aaruwa?»

38 A ñwaterante ge Piyer, a ba ñane á elvan ge itare: «Magaumága tuba, a magarakurnaamaga baptisma an zhera á Yaisu *Almasiihu, geni a yakuraarye Dadaamiya haypa-aha á kure. Daaci Dadaamiya á vakurte Shedekwe-aara Cufedfe.

39 Adaba a ba Dadaamiya á de vakurte duksa ñanna ge kure antara egdzara á kure, á de vaterte ge emnde na ta yiyiye, á de vaterteva ge emnde na ni watse á ðahaterá ñane á sezeñára na baðemme.»

40 Piyer a fateraare elva-aha umele gergere kwakya ge tsante eñkale-aatare, antara ge faterem ndzedá am vuwa. A ba ñane á elvan ge itare: «Sawansese ire á kure am dágave á emnde a maga mándzawire.»

41 Vacite ñanna, emnde kwakya lyarvaalya waazu á Piyer fartarfe, magarateraamaga baptisma. Á maga emnde debu keye fartarfe ge emnde a fetarfe.

⁴² Ta faa hyema jipu ge cenaa waazu-aha na tá anƙwa kwaratersa emnde a bela, ta wáva jipu ge gev palle am duksa bademme áte njá á egdzar mama, antara ge zá dafa-aatare átirpalle, antara geni a icarseka am tate á maduwa dƙidƙi.

Njá á emnde a fetarfe.

⁴³ Emnde bademme tá geja ba ire, adaba Dadaamiya a magaa najipu-aha gergere kwakya á kya erva an emnde a bela.

⁴⁴ Emnde a fetarfe bademme garevge ba palle, názu am erva-aatare keni ba palle.

⁴⁵ Tá njá á ba válá kazlaŋa-aatare, tá sá shunƙu-aara áseza emnde a bela, tá se teganá am dágave-aatare, ma ware keni ba deydey á wedere-aara.

⁴⁶ Tá anƙwa jáháva ba kelaazare am *mashidi yaikke, tá anƙwa jáháva am mba-aha-aatare ge zá duksa-aatare átirpalle, tá anƙwa za dafa-aatare an higa, ervaunƙe-aatare palle.

⁴⁷ Tá anƙwa á gala Dadaamiya, emnde bademme hayaráterháya. Daaci Yaakadada anƙwa á lya emnde umele keni ba kelaazare, anƙwa á sagatersága.

3

Mbaambe zhel nguryekwe

¹ Vacite umele an lásar, tara Piyer, antara Yuhanna tá anƙwa á dǎlá á dem *mashidi yaikke ge de maga maduwa á lásar maa,

² anƙwa zhel nguryekwe umele tá yán ba estuwa á sawa am huƙe á emmenára, anƙwa á njá átuge palle á we-aha á mashidi ƚanna, átuge

una zhera-aara We á bere Zariya na. Zhel ɲanna wá, tá aɲkwa á dánda emnde-aara ba kelaazáre, á de ɲala áza emnde a dem mashidi.

³ Vacite ɲanna maa, ba a naa tara Piyer antara Yuhanna, tá aɲkwa duwa tá dem mashidi wá, a naba ɲalateru sadake.

⁴ Tá ezzhárá tara Piyer antara Yuhanna. «Zharanɛzhárá!» a ba Piyer á elvan ge zhel ɲanna.

⁵ A zharateraahe ge ɲguryekwe na ba shagera. Adaba a kurken watse á shá sadake ázetare.

⁶ Daaci a ba Piyer á elvan ge ɲane: «Ma gursa, ma shuɲgu keni baaka ázerwa defideki. Amá yá vakte názu a shanaa erva-aaruwa: Yá ndaaka an zhera á Yaisu *Almasiihu ura Nasarátu, tsetse ezzlala.»

⁷ Daaci a naba ɲanaahe an naɗafa-aara, a tsante. Kerten sharánsha dzanɗanɛire sera-aha-aara,

⁸ a naba ezbavte á sá am haha, a tsaahé áte sera-aha-aara, a fantau ge zlála. A dem mashidi antara tara Piyer tá an Yuhanna, á zlála estuwa, á vaza, aɲkwa á gálá Dadaamiya.

⁹ Emnde baɗemme naránna aɲkwa á zlála, aɲkwa á gálá Dadaamiya.

¹⁰ Am sarte na diyareddiye ganakini ba ɲguryekwe na á ɲala áte we á mashidi na tá ɗahaná an We á bere Zariya na, baɗemme tá maga ba dikere, tá geja ba ire áte zhel ɲanna.

*Waazu á Piyer am *mashidi yaikke*

¹¹ Am zlalaaka zhel ɲanna átevege tara Piyer antara Yuhanna, ta duhe á dem dzadzáwe á *mashidi yaikke ɲanna ba kerdé, am dzadzáwe

na tá d'aháná an dzadzáwe á Suleymanu na, daaci emnde bademme tá zhagade á ba ásezetare, adaba tá am najipu yaikke.

¹² Ba a naa emnde nanna Piyer, a ba nane á elvan ge itare: «Kure emnde a *Iserayiila mu, kwá an'kwa á maga najipu á uwe kure? Labára kwá zharan'zhará estuwa? Kwa kurken zhel na a shaa sera-aara na an ndzedá á n'ere emtu? Emtu adaba nanernaana nadina á n'ere emtu?

¹³ Una nanna ka d'ekideki. Ba Dadaamiya na ta kezlan ugje eggye-aha a miya tara Ibrahim, antara Isiyaaku ira Yakubu na, a vantaa ba nane d'emdemire na ge sleslera-aara Yaisu. Amá kure, kwa danaa ba kure á deza male-aha á duniya, kwa yanaa ba kure á katafke á sleksu *Pilaatu, ndza a bánba tsa nane ganakini á belanaabela.

¹⁴ Kwa yaa ura cudedde, ura jirire, kwa njála sleksu Pilaatu ganakini á belakurá sleceba shifa.

¹⁵ Daaci kwa janaa ba kure edda á shifa na, amá tsantetsa Dadaamiya am fáyá, n'ere na seyde-aha-aara.

¹⁶ Zhel nanna kwá an'kwa á zharaná kure diyakurdiya na wá, a vantaa ba hakuma na am zhera á Yaisu na ndzedá. Ba fetarfire áte Yaisu una a mbanaahe ba d'ekideki, kwaya nane á katafke á kure.

¹⁷ «Amá diyandiya ganakini názena kwa maganaa kure antara male-aha á kure áte Yaisu na wá, kwa maganaa adaba diyakurka.

¹⁸ Amá Dadaamiya a magaa ba jirire á názena ni a ndahanaa nane am mbuwe á nabi-aha-aara werre bademme na. Adaba a ba nane, sey *Almasiihu-aara á shushe zladá.

¹⁹ Sawmbare á sem sera á Dadaamiya, mag-aumága tuba geni á yakuraarye haypa-aha á kure.

²⁰ Daaci Yaakadada á vakurteva hairire am ervaunɗe, á vakurteva Almasiihu na ndza á ba am date keni ndza a eksakurse ba ge kure na. Amaana: Yaisu.

²¹ Amá kina wá, zlaɓe Yaisu *Almasiihu á njá á ba am samaya emtsaɗe, dem sarte na Dadaamiya ganvege duksa baɗemme aɗwaslire, ba seke una a ndahanaa ɗane werre á kya an we á nabi-aha-aara cuɗeɗe na.

²² Ábi ndza a enndáhá Muusa, a ba ɗane:

Watse Dadaamiya á belakurá nabi umele ba seke iya, watse á jesaare á ba am dáɗave á egdzar mama-aha á kure, kwá de cená názena á de bakurná ɗane baɗemme.

²³ Ma ware una cenaaka elva á nabi na, sey tá dansede edda-aara am dáɗave á emnde á Dadaamiya, tá keɗanaakeda shifa-aara ba ɗekideki.

²⁴ Nabi-aha umele keni ndza ta enndáha ba seke náza Muusa, baɗemme ndza ta ndaha ba názena watse á magava am zamane á miya na. Kwaye nabi Samiyail, sem nabi-aha na ta sawa am iga-aara baɗemme.

²⁵ Daaci egdzar mama-aha-aaruwa, názu a ba-ternaa Dadaamiya ge nabi-aha ɗanna wá, a ndahanaa á ba áte kure. Zlaɓe áɗaliye, am sarte na Dadaamiya aɗkwa á ɗguɗa namána antara eggyekure Ibrahim, a ba ɗane: Yá de gá barka áte duniya baɗemme aɗaba emnde á ɗa. Amaana: Namána ɗanna a magakurán ba ge kure.

26 Daaci sleslera-aara Yaisu keni, a belakurán ba ge kure emtsaade zunṅwe Dadaamiya, geni kwá shá pakyaava antara haypa-aha á kure, á gakuraar barka.»

4

Tara Piyer antara Yuhanna tá á katafke á shairiya áza male-aha á Yahudiya-aha

¹ Am sarte na tá aṅkwa á ndahater elva tara Piyer antara Yuhanna ge emnde, saremsa *liman-aha, antara male-aha á emnde a ufa mashidi, ira *Saduki-aha ásezetare.

² Játerja ervaunḡe jipu adaba emnde a bela tá aṅkwa á kwaraterse duksa ge emnde arge Yaisu, tá aṅkwa á naterndáhá geni tsetsa Yaisu am fáyá. Amaana: Tá naba tsetsa emnde a fáyá zlaḡe ádaliye.

³ Daaci ta naba sluwatervaahe, ta naba zleṅaterme am dangay ge ufa mákurállá-aara, adaba baaka sarte mázla-aara.

⁴ Amá am sarte ṅanna wá, kwakya názena fetarfe na am dágave á emnde na cenarvaacena waazu na. Kezlakula á emnde a fetarfe á maga emnde debu ilyeḡe ba zála.

⁵ Mákuralla-aara wá, jarammeje male-aha á Yahudiya-aha, antara emnde a sawari-aha-aatare, ira malum-aha á *tawraitá, bademme jarammeje am huḡe á Urusaliima.

⁶ Ta magaa jáháva ṅanna antara tara *liman Annas, ba ṅane una male á liman-aha, Kayafas, Yuhanna, Alaikzandere, ira emnde na tá am huḡe á há á Annas bademme.

⁷ Daaci ta tsatsaa emnde a bela na á katafke-aatare, ta ndavateru elva, a ba itare: «Kwa mbanaa an hakuma-ara kure nguryekwe na? Emtu a vakurtaa ware hákuma ñanna?»

⁸ Naatená Shedekwe Cudedde am Piyer, a ñwaterante, a ba ñane á elvan ge itare: «Ámbarká á kure emnde a sawari, antara male-aha á ekse,

⁹ kwa vanjerte ndáva adaba shagerire na ña maganán ge nguryekwe na ka? Kwa ndavanerwá ba kure geni ña maganaa estara, a ba kure?

¹⁰ Shagera ba una, daaci sey kure antara emnde a *Iserayiila bademme kwá diyeddiye geni zhel ñanna náwa á tse á katafke á kure ba lapiya layye na wá, a mbanaa ba zhera á Yaisu ura Nasarátu na. Ba ñane una kwa janaa kure áte dzañgala, amá tsantetsa Dadaamiya am fáyá.

¹¹ Elva na ta puwete am wakita á Dadaamiya, a ba ñane: Nákwá na ta eblyanvaa emnde a nyáña bere, mbate ñane jauje ge nákwá-aha umele bademme na wá, a ndahanaa á ba áte Yaisu ñanna.

¹² Daaci ñá bakurá ba jirire: Baaka ura am huđe á duniya na dekiđeki, a belanaa Dadaamiya ge se lyamilya, sey ba ñane palle.»

¹³ Bademme á emnde na tá am jáháva ñanna, tá maga ba najipu á dzañdzañire á tara Piyer, antara Yuhanna, sakwa diyaratereddiye ganakini baaka dárádza-aatare, ndarseka láyá kwakya na. Diyareddiye zlađe adaliye, geni ta emnde na ndza tá áte vuwa á Yaisu.

¹⁴ Palle a názu tá ndahaná itare baaka. Adaba zhel na keni á ba á tse áte vuwa á tara Piyer, antara Yuhanna, ba lapiya layye.

¹⁵ Ta ngyesaa tara Piyer ásegashe, geni tá ndáhá elva nanna zlafe adaliye am dágave-aatare.

¹⁶ A ba itare am dágave-aatare: «Mí magaterá uwe kina ge emnde na? Adaba emnde bademme am huđe á Urusaliima diyareddiye geni najipu nanna á zharaná ba ice á emnde na a mágava á kya erva an itare, mí dzegwánka mága gajawe d'ekid'eki.

¹⁷ Amá geni a duka elva nanna á de katafke wá, sey mi gyatertegye an elva ba shagera, ganakini a ndaranka elva ma ge ware keni an zhera á Yaisu nanna mazla-aara.»

¹⁸ Daaci ta d'etaa emnde a bela na, ta naba piyaterante, a ba itare tá elvan ge itare: «A cenanjeránka d'ekid'eki kwá kwaraterse elva a Yaisu ge emnde, ba tsála zhera-aara keni am mbuwe á kure.»

¹⁹ Ta nwete ge tara Piyer, antara Yuhanna, a ba itare: «Kyawanaakya ba kure elva nanna á katafke á Dadaamiya, má shagera n'á fakursaare ge kure arge una n'á fansaare ge Dadaamiya.

²⁰ Duksa palle, n'ere wá, n'á dzegwánka yá ndater názu n'á naaná an ice á n'ere, n'á cenaná an hyema á n'ere na ge emnde.»

²¹ Ta valateraarhe ge emnde a jáháva geni a daralika, daaci ta puwateraahe. Sharánka pute na ni tá zaterá an shairiya adaba nane. Adaba emnde bademme tá an'kwa á gálá ba Dadaamiya adaba duksa nanna magaavemage na.

²² Zhel ɲanna ta mbanaa itare na wá, iva-aara jauje am kul ufafe.

Maduwa á emnde a fetarfe

²³ Tara Piyer, antara Yuhanna, ba belarateraabela wá, ba zláá-aatare á deza emnde-aatare, ta de tsakaterse elva-aha na ta ndahanaa male-aha á Yahudiya-aha, antara emnde a sawari na bademme.

²⁴ Ba cenarácena emnde a fetarfe una ɲanna, ta fantau ge ɲála Dadaamiya an ervaunde-aatare palle, a ba itare: Dadaamiya slekse, ba ka una ka nderaa samaya, antara haha, haye, ira názu am huđe-aha-aatare bademme.

²⁵ Ka ndahanaa ba ka á kya an we á eggyeɲere sleslera á ɲa *Dawuda, a ba ɲane an hákuma á Shedefkwe á ɲa:

Labáre emnde a larde tá ɲgyaiɲgyaare ice ba dey? Tá ɲgudáara ye ge názu baaka sera-aara na.

²⁶ Labára ɲgwadarápsenɲwádá slekse-aha á duniya an fitenire, tá aɲkwa á ɲgudáara ye male-aha ge Yaakadada, antara Almasiihu-aara, edda una a eksesaa ɲane.

²⁷ «Samsa-kwa elva ɲanna. Adaba jarammeje tara *Hirudus, antara Pauntiyus *Pilaatu, antara emnde a larde-aha umele, ira emnde a *Iserayi-ila, ganakini tá gwaare ge ura cudfedfe, sleslera á ɲa Yaisu na ka eksesaa ka geni ɲane *Almasiihu na.

²⁸ Magarnaamaga itare názu ndza ka tsanaa ka an hákuma á ɲa, ka wayetaa ka zuɲɲwe na.

²⁹ Ká cenáncena emtu elva na tá aɲkwa á puwaná itare na Yaakadada? Vanjerteva

hákuma á ndáhá elva á ña ge ñere emnde a slera á ña, geni ñá ndaaná á ba an dzañdzañire, an baakire á lyawa.

³⁰ Marsemáre ndzedá á ña, geni a gevge nalaama-aha, antara najipu-aha gergere, a mbarembe emnde na tá áte lapikere an zhera á sleslera á ña Yaisu ura cufedfe.»

³¹ Ba zlaruzle am ñála-aatare áza Dadaamiya wá, a naba gyagete ge slede na ta jamme amkwa na ñárñare, itare bademme na nartenáhá an Shedekwe Cufedfe, ta de bálá elva á Dadaamiya á ba an dzañdzañire.

Emnde a fetarfe ta jema nalmáne-aatare átirpalle

³² Jarammeje emnde a fetarfe am eñkale palle, antara ervaunde palle antara ba nalmáne-aha-aatare keni. Baaka ura á ba: Náwa una nalmáne-aaruwa ba ge iya palle. Názu am erva-aha-aatare bademme gevge ba palle.

³³ Emnde a bela ta magaa seydire an hákuma jipu, geni ba jirire tsetsa Yaakadada Yaisu am fáyá. Dadaamiya a gateraar barka an tsaka ire ge emnde a fetarfe bademme.

³⁴ Baaka ura a ektsaara duksa defkideki am dágave-aatare. Adaba ura umele a velu fe-aara, ura umele a velu há-aara,

³⁵ ta saa shungu-aara áseza emnde a bela, daaci tá teganá itare, ma ware keni ba deydey á wedere-aara.

³⁶ Ba seke añkwa zhel *Laiwiñkau umele ta yanaa am Kiprus, zhera-aara Yusufá, emnde a bela ta fante Barnabas, á kátá ba: slefanem ndzedá am vuwa ge ura.

³⁷ Njane keni ba veluvele fe-aara, a saa shunḡu-aara á ba áseza emnde a bela.

5

Labáre á tara Hananiyas an Safira

¹ Anḡwa zhele umele zhera-aara Hananiyas, zhera á mukse-aara Safira. Njane keni a velu fe-aatare. Amá zlaruzle am ndáhá antara mukse-aara ge ica fida maa,

² lauktu á dándá shunḡu á fe na wá, a naba tegese, a daa ba kyalma-aara á deza emnde a bela. Mukse-aara wá, diyaadiya baðemme.

³ Daaci a ba Piyer á elvan ge njane: «A ngyemaa estara Shaitaine á dem ervaunḡe á na estuwa Hananiyas, ká icaná fida ge Shedekwe Cudedḡe? Adaba ka icanme kyalma á shunḡu á fe na ge ire á na, ka saa ba kyalma, a ba ka baðemme.

⁴ Ábi am sarte na zlaḡe velakuka na ndza fe á na ba ge ekka? Ma náwa velakuvele keni ba shunḡu á fe á na? Ka magán ge uwe una Hananiyas? Fida na wá, ka maganḡerán ge njereka palle, amá ge Dadaamiya.»

⁵ Ba cenáncena una njanna Hananiyas wá, kreppe a naba mbedeḡe, antara ba emtsa-aara. Emnde na ta cenaa labáre njanna baðemme dámda lyawa am itare.

⁶ Daaci ta sem ge dawalaa, ta faðeme emtsa-aara am kalpakane, ta de hedeḡe.

⁷ Shekwaashekwa cekwaanḡuḡi á maga saa keye wá, a semhe ge mukse-aara keni. Amá an kaltaadfa á názu a shaa zhele-aara.

⁸ A ndavanuhe ge Piyer, a ba ñane: «Kwa velu fe á kure ba ge shungu na náwa ñane na emtu?» A ñwete: «Ane, ña velu ba ge una ñanna.»

⁹ A ba Piyer á elvan ge ñane: «Labára ñane ge kure, kwa zluhe am ndáhá antara zhele á ña ge zhárá názu am huđe á Shefekte á Yaakadada na? Ká cenáncena emtu? Dawalaa ta zluwa á heđa zhele á ña ba kina, tá ańkwa áte we á bere, ekka keni tá daksede.»

¹⁰ Ba we keni zlađe heđanuka slebela na wá, kreppe a naba mbedehe ge mukse á Hananiyas, a emtsehe ñane keni, ta se fađeese ge dawalaa na, ta de heđanve ge zhele-aara.

¹¹ Daaci tá puwanu ba erva ge ervaunđe emnde a fetarfe bađemme, antara emnde na ta cenaa labáre ñanna bađemme.

Najipu-aha na ta maganaa emnde a bela

¹² Emnde a bela ta magaa nalaama-aha, antara najipu-aha gergere kwakya. Bađemme á emnde a fetarfe tá ańkwa á jáháva átirpalle am dzadzawe na tá đaháná an dzadzawe á Suleymanu na.

¹³ Tá ańkwa á zlebaterzleba tsa, amá ba palle á ura a sherse ice ge dezetare baaka đekidėki am emnde na fartareka na.

¹⁴ Aley ba kelaa wera á ekse, an zála-ka, an ñwasha-ka, emnde kwakya tá ańkwa á fetaare áte Yaakadada, tá se saga emnde a fetarfe.

¹⁵ Emnde kwakya tá dá emnde-aha-aatare á dete we á baráma, tá de zlavaterá áte egdera-aha, antara áte buce-aha, ganakini má á degasha Piyer wá, ma a shátershá ba shefekte-aara keni emnde umele am itare.

¹⁶ Emnde kwakya ta saa emnde-aha-aatare na ta lipa-aha, emnde umele tá an shaitaine, ta sateraa á sawa am ekse-aha na ta herherzhe an Urusaliima na, bademme mbarembe.

Zladá na ta shateru ge emnde a bela

¹⁷ Daaci a naba tsante shelha male á *limán-aha, antara emnde na tá am ekte ge ñane, amaana: *Saduki-aha. Ta tsante shelha áte emnde a bela ge magateraa palasa.

¹⁸ Ta halaterte, ta de puwatermhe am dangay, áte ice á emnde bademme.

¹⁹ Amá a naba semhe ge malika á Dadaamiya an vayiya, a werante dangay ñanna, a sanse emnde a bela, a ba ñane á elvan ge itare:

²⁰ «Zlauzlálá! dawmbare á dem *mashidi yaikke, bawateránba elva á shifa áñwaslire na ge emnde bademme.»

²¹ Ane, á ba emnde a bela. Ba werre an enlyawaabere wá, ba zlala-aatare á dem *mashidi yaikke, ta de kwaraterse elva á Dadaamiya ge emnde.

Cekwaangudí á ba an enlya ñanna maa, male á *liman-aha antara emnde-aara ta dante emnde a sawari, antara male-aha á Yahudiya-aha bademme, ta magaa jáháva yaikke. Daaci ta belaa sawji-aha-aatare á de sá emnde a bela na am dangay.

²² Duwa-aatare, de beraraterka emnde a bela na. Sawji-aha á ufa dangay keni tá á ba áhuwa tsa. Daaci ba eptsa-aatare an labáre áseza male-aha na,

²³ a ba itare: «Duwa á ñere á dem dangay, ña de shanaa á ba an zleña káñgeláññe, sawji-aha

keni bademme tá á ba áhuwa, amá ña werante wá, shañeránka ñere ura am huđe-aara.»

24 Ba ta cenaa una ñanna male-aha á *liman-aha, antara male á emnde a ufa mashidi na wá, ba palle a názu tá ndahaná itare keni baaka. Tá dzámá ta zlalaa estara emnde a bela, antara názu watse á de magava na.

25 Cekwaangudí wá, samsa ura, a ba edda-aara á elvan ge itare: «Kwaye emnde na kwa dateraa á dem danğay áwaya na, tá anƙwa á kwaraterse duksa ge emnde am *mashidi yaikke.»

26 A tsetehe ge male á emnde a ufa mashidi, a duhe antara emnde-aara, ta de saa emnde a bela na. Amá ta sateraa á ba an enƙale, adaba ta kuva emnde bademme, ganakini a dzagaraterseka an nákwá.

27 Sarateremsa á se katafke á male-aha ñanna, a naba valataraarhe ge male á *liman-aha ge emnde a bela na.

28 A ba ñane á elvan ge itare: «Ábi ña piyakurtepiya geni ndahauka elva á dawale ñanna, ma zhera-aara keni deƙideƙi am larde na? Kwá maga uwe kena kure kina? Kwa hyanme waazu á kure ñanna am huđe á Urusali-ima, kwá kátá puwanerem uzhe á zhel ñanna am mbiye á ñere ge ñere emtu?»

29 Ta ñwete ge tara Piyer, antara emnde a bela umele: «Ñere wá, ñá fansaare ba ge Dadaamiya arge emnde.

30 Kure kwa naba zlenelaa Yaisu áte dzañgala a emtsehe, amá tsantetsa Dadaamiya na ta fansaara eggye-aha a miya werre na am fáyá.

³¹ Njane a demanve ge Dadaamiya, kina anƙwa am naɗafa-aara, a ganve slekse arge emnde baɗemme, a ganve slɛlya geni á kwaraterse baráma a tuba ge emnde a *Iserayiila, geni a yateraareye Dadaamiya haypa-aha-aatare.

³² Njere, antara Sheɗekwe Cufedɗe na Dadaamiya anƙwa á vaterte ge emnde na tá anƙwa á fansaarefe na, ɗa seyde-aha á labáre ɗanna baɗemme.»

³³ Ba ta cenaa una ɗanna, a naba jaterhe ge ervaunɗe, haa tá kátá ceɓa shifa á emnde a bela na baɗemme.

³⁴ Amá anƙwa ura *Farisa umele am dáɗave-aatare, zhera-aara *Gamaliyail, ɗane malum á *tawrait, emnde baɗemme tá anƙwa á fá zherwe áte ɗane. A tsetehe ge ɗane, a ba ɗane: A daratersede emtsaafɗe emnde ɗanna cekwaanɗuɗi.

³⁵ Daratersede emnde a bela na á degáshe maa, a ba ɗane á elvan ge emnde am jáháva: «Fawfa hyema am názu watse kwá magaterán ge emnde na egɗzar mama-aha-aaruwa.

³⁶ Yehauteyeha Taiwɗas, a naba ganve ire-aara male, ya slendzedɗa a ba ɗane, emnde tá hyephye deremke ufaɗe ta ɗabete ɗane, amá jarejja. Emnde-aara ɗanna keni zaɗaratervezáɗe, ba uwe keni cenaránka mázla-aara.

³⁷ Am iga á Taiwɗas keni jesarje Yahuda ura Galili, a jesaare am sarte á ja jembel á emnde. Njane keni ndza ta ɗabete ba estuwa emnde, amá ta naba ja ɗane, emnde-aara ɗanna keni zaɗarevzáɗe.

³⁸ Daaci názu yá bakurná ya wá, kina keni

naba yawaterya kure a zlarzálá. Slera-aatare ṅanna máki ta jansaara ba emnde wá, watse á zlauzle.

³⁹ Amá máki ba jirire slera-aatare ṅanna ni a sawa á ba áza Dadaamiya wá, baaka názu kwá eksáná áte itare ḑekid̄eki. Amá magaumága eṅkale. A gevka kwá wava an Dadaamiya.» Daaci baḑemme á jáháva eksarekse sawari á *Gamaliyail.

⁴⁰ Ta ḑahaterite emnde a bela na zlaḑe áḑaliye, ta zateruhe an ja, a ba itare: «A cenañeránka faikke kwá ḑálá waazu zlaḑe áḑaliye an zhera á zhel ṅanna ba ḑekid̄eki.» Daaci ta puwateraahe.

⁴¹ Amá ta segáshe á ba an higa emnde a bela am tate á shairiya ṅanna. Aḑaba a diyatersaa ba Dadaamiya ganakini hyairephye lauktu a fateraar jeba á zlaḑa ṅanna aḑaba zhera á Yaisu.

⁴² Ba kelaazare tá ḑálá ba waazu am *mashidi yaikke, antara am mba-aha-aatare, tá aṅkwa á kwaraterse elva a Yaisu labáre á higa na ge emnde, geni ba ṅane una *Almasiihu.

6

Zála vuye ta dzeraterse ge slera á Dadaamiya

¹ Haraare cekwaanḡuḑi tá aṅkwa far ba sága emnde a fetarfe maa, Yahudiya-aha na tá ndáhá elva a Yunaniṅkau na farantaufe ge ica er-vaunḑe áte Yahudiya-aha na tá á ba am larde. Ta bántsa itare, ba kelaa má tá tegaterá náza zá ge ṅwasha wegyegye wá, tá fateruka hyema ge emnde-aatare.

² Daaci emnde a bela kelaawa ju buwa na ta jema a emnde a fetarfe baḑemme, a ba itare:

«Ganakini ɲere ɲá yá balaterá elva á Dadaamiya ge emnde ni, ɲá shuɲɲula tega náza zá wá, una zlayeka ɔfekideki.

³ Daaci dzerausedzere zála na ni tá an eɲkale na vuye egdzar mama-aha-aaruwa, emnde na ni tá an naha an Sheɔekwe Cuɔeɔɔe am itare na. Daaci ɲá faterem slera ɲanna am erva ge itare.

⁴ ɲere wá, ɲá shuɲɲula ba maduwa, antara balaterá elva á Dadaamiya ge emnde.»

⁵ Emnde a fetarfe baɔemme hayaránháyá elva ɲanna. Daaci ta dzerse tara Aitiyain, zhel fetarfe an tsaka ire, an naha an Sheɔekwe Cuɔeɔɔe, antara Filip, Pauraukaurus, Nikanaur, Timaun, Parmainas, ira Nikaulawus ɲane ura Antakiya a dema an de am nadina á Yahudiya-aha.

⁶ Ta tsatsaa emnde vuye ɲanna á katafke á emnde a bela, ta magaterar maduwa, ta puwaterar antara *erva a barka.

⁷ Ta zlala estuwa emnde á Dadaamiya á de katafke, sagarevsage jipu emnde a fetarfe am huɔe á Urusaliima. *Liman-aha kwakya ek-saraarekse itare keni fetarfire.

Male-aha á Yahudiya-aha ta eksevaa Aitiyain

⁸ Aitiyain ɲanna wá, kwakya ɲgurna, antara hákuma na a shanaa ɲane. A magaa nalaama-aha, antara najipu-aha kwakya am dágage á emnde.

⁹ Tá aɲkwa Yahudiya-aha na ta sawa am Kiraine, antara am Alaikzanderi am tate ɲanna, itare tá jáháva am mashidi na tá ɔahaná an bere á emnde na sharánsha ire-aatare na. Tá aɲkwa Yahudiya-aha umele zlaɔe á daliye, ta sawa am Silikiya, antara Aziya; itare baɔemme hayaránka

elva á Aitiyain d'ekid'eki, tá an'kwa á gan gajawe kwakya.

¹⁰ Amá baaka ura á danude d'ekid'eki, ad'aba Shed'ekwe Cud'ed'de an'kwa á vante en'kale á ndahá elva.

¹¹ Ad'aba una n'anna ta shekweve emnde umele, ganakini a baránba emnde n'anna: Na cenaa Aitiyain á valya elva yaiyaihe áte Muusa, antara áte Dadaamiya keni.

¹² Ta tsante estuwa ervaun'de á emnde a ekse, antara male-aha á ekse, ira malum-aha á *tawraita bad'emme. Ta gwarhe estuwa ge Aitiyain, haa ta dáná á dem shairiya, á katafke á jáháva á male-aha á Yahudiya-aha bad'emme.

¹³ Ta naba saa seyde-aha á fida n'anna, geni tá d'atsa fida-aatare n'anna. Ta bántsa itare: «Zhel na ba kelaazare á valya ba elva áte mashidi á Dadaamiya, antara *tawraita a Muusa.

¹⁴ Na cenáncená a ndahanaa á ba an we-aara, a ba n'ane: Yaisu ura Nasarátu na wá, watse á kyaba mashidi na, antara nad'e-aha na a mbamisaa Muusa na keni bad'emme watse á eptsanteptsa.»

¹⁵ Daaci bad'emme á emnde na tá am jáháva na tá puwa ba ice áte Aitiyain. Amá tá zhárá wafke-aara wá, ba seke malika á Dadaamiya.

7

Aitiyain an'kwa á tsaka elva á katafke á zlamaha

¹ Daaci male á *liman-aha a ndavanu elva ge Aitiyain, a ba n'ane: «Názu tá ndahaná itare na ba jire ba estuwa emtu?»

² A ηwete ge Aitiyain, a ba ηane: «Cenaw-ivaacena emtsaafde egdzar mama-aha-aaruwa, antara dada-aha-aaruwa: Dadaamiya slekse, a maranse ire-aara ge eggyemiya Ibrahimia wá, kwaye zlaβe am Maisaupautamiya, zlaβe daaka emtsaafde á dem Haran.

³ A ba Dadaamiya á elvan ge ηane wá: Tsetse am larde á ηa, sesse am jeba á ηa bademme, ezzlálá á dem larde na watse yá ηgyekwakanvaa ya.

⁴ Daaci Ibrahimia a kezlese am Kaldiya, kwaye a de njaa am Haran. De keɗaakeda eddenjara maa, a kezlanshe zlaβe á daliye ge Dadaamiya á sem larde na kwá njá kure am huɗe-aara kina na.

⁵ Am sarte ηanna wá, Dadaamiya vanteka sleɗe ge Ibrahimia ba kapáka palle keni am larde na, amá a ba ηane á elvan ge ηane: Larde na bademme watse yá vakteva vacite umele, kwá de kwaraná ba kure antara egdzara á ηa. Amá zlaβe ba egdzere ηanna keni ná nka Ibrahimia ɗekideki.

⁶ A ba Dadaamiya á elvan ge ηane zlaβe á daliye wá: Egdzara á ηa tá de njá emtsaafde am erva á emnde, tá de gev nave-aha á emnde, tá de magaterá palasa am iva deremke ufade.

⁷ Amá watse yá shaterushe zlaɗa ge emnde a larde ηanna keni, lauktu watse tá sesse egdzara á ηa am larde-aatare, tá se kezli ugje am larde na.

⁸ Am iga á una a tsakanse una-aha ηanna Dadaamiya ge Ibrahimia maa, a maganaa namána, a ba ηane á elvan ge ηane: Dem shedekwe una á gev nalaama á namána na.

De shánsha Ibrahimisa Isiyaaku, a belemaa am shedekwe áte háre ge tiisire-aara. Isiyaaku keni a fem Yakubu am shedekwe, Yakubu keni a puwum egdzara-aara eggye-aha a miya kelaawa ju buwa.

⁹ «Am iga a una ḡanna maa, eggye-aha a miya ḡanna ta naba velu kuderetare Yusufa á dem Misera adaba shelha. Amá ndza anḡwa Dadaamiya antara ḡane.

¹⁰ Dadaamiya yánka Yusufa am zlada-aha-aara. Bairá a vante ḡahire. A vante ilmu á katafke á *Firawna slekse á larde á Misera, slekse a naba ganve Yusufa male arge larde á Misera bademme, male arge emnde na tá am huḡe á há-aara bademme.

¹¹ Daaci a naba sem ge waya yaikke á sem larde á Misera, antara larde á Kanaana maa, emnde bademme tá á ba am palasa-aara, haa eggye-aha a miya ḡara tá shánka ba názu tá zuze keni dekiḡeki.

¹² Cenánkena Yakubu ganakini anḡwa nalkame am Misera, a beláa ba egdzara-aara ḡanna ta duhe ser palle.

¹³ Ta daliye ge buwire wá, Yusufa a de maraterse ire-aara, sleksu *Firawna keni a dise á ba am una ḡanna emnde a jeba á Yusufa.

¹⁴ Daaci Yusufa a naba belaa ura, ta de sanaa eddenjara Yakubu an huḡe á há-aara bademme, emnde á Yakubu ta kul vuye jiilyeḡe.

¹⁵ Daaci a naba de nja-aara ge Yakubu am Misera, a emtsaa á ba áhuwa, egdzara-aara keni bademme ta matsaa á ba áhuwa.

¹⁶ Amá emtsa á eggye-aha a miya ḡanna wá,

bademme ta halateraa á ba á dem Sikaim,
ta de hedateraa am irekhya na kwaye ndza
a shekwanaa Ibrahimama am erva á egdzara á
Hamaur.

¹⁷ «Am sarte na ni herzhe watse á magava
duksa na a bannaa Dadaamiya ge Ibrahimama na
wá, emnde á miya am Misera tá far ba sága á ba
an ndzedá.

¹⁸ Daaci faremfa slekse umele anjwaslire
diyaaka Yusufa dekideki maa,

¹⁹ slekse nanna a naba eksaterve sawari ge
eggye-aha a miya, a naba shateru zladá kwakya,
a naba hyaterarhe an ndzedá, ganakini a
puwaranvepuwe egdzara-aatare mesheshe, a
njarka an shifa dekideki.

²⁰ A ba am sarte nanna wá, ta naba yá Muusa
keni, egdzere zariya jipu, hayánháyá Dadaamiya.
Tere keye kalkale tá anjwa á tsufaná á ba am
hufe á há á eddenjara,

²¹ lauktu ta danse á degashe. Amá de shansha
egdze á sleksu *Firawna, a de gelantaa njane ba
seke egdza-aara a yanaa ba njane.

²² Muusa a waltaa á ba an diya á názena tá
maganá emnde a Misera bademme. A gevaa
estuwa Muusa edda una an hákuma á ndáhá
elva, antara edda á hákuma am slera-aha-aara
bademme.

²³ «Muusa shanaasha iva kul ufafe lauktu
a shaa enjale á de zhara emnde a jeba-aara.
Amaana: Emnde a *Iserayiila.

²⁴ Duwa á Muusa maa, a naa zhel emnde a
Misera anjwa á já ura jeba-aara. Daaci a naba
de gwe, a jehe shifa á zhel nanna.

²⁵ Njane a kurken watse tá cenáncena emnde a jeba-aara Iserayiila-aha ganakini watse á lyateraalya Dadaamiya á kya erva an njane, tá de shánsha ire-aatare, amá cenaránka emnde na ðekideki.

²⁶ Makuralla-aara zlaþe ádaliye, a de shaa Iserayiila-aha ta buwa, tá anjwa á dagala. Njane á kátá tegatertega, a ba njane á elvan ge itare: Kay! Dawalaa na? Kure kwa ba egdzar mama keni kwá dagala, a jaara uwe ge kure?

²⁷ Amá edda una njane anjwa á maganá palasa ge ura, a naba puwan tsekudá ge Muusa, a ba njane á elvan ge njane: Ka mu a gakvaa ware male arge njere geni ká se kyaná ka shairiya á njere?

²⁸ Emtu ká kátá jija seke una ka jaa zhel emnde a Misera áwaya na emtu?

²⁹ Daaci elva njanna ngyámngye am vuwa á Muusa, antara ba kezla-aara am larde njanna ba ðekideki, kwaye a zhagade á dem Madiyan, a de yayaa egdzar zála buwa áhuwa.

³⁰ «Am iga a yawe kul ufafe á ba am larde njanna maa, malika á Dadaamiya a maranse ire-aara ge Muusa áte vuwa á wa Sina, a maranse ire-aara am nara á kára á guzla.

³¹ Muusa anjwa á maga najipu á duksa njanna, anjwa á ganávtege ge guzla njanna geni á nanaana duksa njanna ba shagera wá, á cená ba kwára á Yaakadada, a ba njane:

³² Ba iya Dadaamiya na ndza ta kezli ugje eggje-aha a njana, ya Dadaamiya á Ibrahimia, Dadaamiya á Isiyaaku, Dadaamiya á Yakubu. Muusa jaaja lyawa, á gyagya ba seke maagara,

kwalevkwála ge zhárá ice ádehuwa mázla-aara.

³³ A ba Yaakadada á elvan ge ñane: Sadesesáde kimake á ña. Adaba tate na ká tsá ka átekwa na tate cudedde.

³⁴ Ya nanna zladá na tá sháná emnde-aaruwa am Misera, ya cenáncena kyuwa-aatare, ya tsekwa adaba ba una ñanna, ya se lyaterlya, sawa yá beláká á dem Misera.

³⁵ «Daaci egdzar mama-aha-aaruwa, ba Muusa ñanna ta ndahanaa itare a gakvaa ware male arge ñere, geni ká se kyáná ka shairiya á ñere na wá, Dadaamiya a belaa ba ñane geni á de gev slekse-aatare, á saterse am erva á emnde. Dadaamiya a magaa slera ñanna á kya erva an malika na a maranse ire-aara ge Muusa am kárá á guzla na.

³⁶ A satersaa ba ñane emnde a *Iserayiila am larde a Misera, an mága nalaama-aha, antara najipu-aha gergere, am Misera ñanna, antara am Haye Kyanje. Dem yawe kul ufade, ndza slekatarfke-aatare ba Muusa ñanna am kaamba.

³⁷ Ndza a bateránba Muusa ge emnde a *Iserayiila, a ba ñane: Watse Dadaamiya á belakurá nabi umele ba seke iya, watse á belakurá ba ura jeba á kure.

³⁸ Ba Muusa ñanna una ndza slekatarfke á emnde a Iserayiila am kaamba, ndza ba ñane una sledágave á eggye-aha a miya werre, antara malika na a banaa elva áte ire á wa Sina na. A lyamivaa ba ñane elva á Dadaamiya, elva na á vante shifa ge ura na, lauktu a samiyansa.

³⁹ «Aley ndza faransaareka eggye-aha a miya defideki ge Muusa, yarnaaya elva-aara, ta

hayaa ba eptsá á dem Misera.

⁴⁰ Adaba una ɲanna, a ba itare tá elvan ge *Haruna: Nderamíndera-ka hele-aha na mí sepatará á katafke á miya. Adaba diyamika názu a shaa Muusa ɲanna a samise am Misera na.

⁴¹ Daaci ta naba nderaa hele-aatare, á gáráva an egdza a dalau, ta icanaa sadake, ta magaa muɲri, tá higa á katafke á názu ta nderanaa ba itare an erva-aatare.

⁴² Amá a naba yaterhe ge Dadaamiya ba ɔekideki tá aɲkwa á kezlan ugje ge hele-aatare, tá aɲkwa á kezlater ugje ge terlyakwa-aha áte samaya keni, ba seke una aɲkwa ta puwete am wakita á nabi-aha na. Ta puwetaa nabi-aha, a ba Dadaamiya á elvan ge emnde a *Iserayiila:

Kure Iserayiila-aha: Kina iva kul ufaɔe kwá vite sadake á dabba-aha, antara sadake á duksa-aha umele na, ba jirire kwá vite ba ge iya emtu?

⁴³ Una ge iya ka ɔekideki, *mashidi á kacakaca na kwá sepaná kure ba ge dadaamiya á kure *Maulaukau, kwá sepá ba dadaamiya á kure Rafan na kwa maganaa ba kure, gáráva á terlyakwa na. Kwaya ɲane hele-aha na kwa nderanaa kure ge kezlater ugje. Adaba una ɲanna yá dakurda á de katafke átsaaka á ba an *Babila keni.»

⁴⁴ Daaci a ba Aitiyain: «Am sarte na tá am kaamba eggye-aha a miya, ndza tá an mashidi á Dadaamiya ta maganaa an kacakaca, ta dise áte una ɲanna ganakini aɲkwa Dadaamiya an itare. Ta dzebaa mashidi ɲanna a ba áte una a kwaransaa Dadaamiya ge Muusa. Adaba a

banánba Dadaamiya ge Muusa geni a emmága á ba áte una a naanaa ñane.

⁴⁵ Dedde zamane-aatare, ta yaterán ge eggye-aha a miya umele. Ndza Zhausuwe slekatafke-aatare. Ta se dema itare an mashidi ñanna am larde na. Am demda-aatare, Dadaamiya a naba bakese emnde a jeba umele am katafke-aatare. Daaci mashidi á nalba ñanna a nja estuwa, dem zamane á sleksu *Dawuda.

⁴⁶ Shánsha Dawuda háyá áza Dadaamiya á Yakubu maa, a naba ndavanu ganakini á nderanaa mashidi.

⁴⁷ Amá a nderannaa Suleymanu mashidi ñanna ge Dadaamiya.

⁴⁸ Ay degiya Dadaamiya am yaikkire-aara wá, á njeka am bere-aha na ni ta nderanaa ba emndimagwaha. A ba ñane á kya an we á nabi-aara:

⁴⁹ Samaya una tate á nja-aaruwa am sleksire-aaruwa; haha wá, tate á puwa sera-aaruwa. Kwá de nderiya bere-ara kure ge iya? Áme slede na ni yá de puwansá ya am huđe-aara na?

⁵⁰ Ábi duksa-aha ñanna bademme ya nderanaa ba iya? Estuwa á ba elva a Yaakadada.

⁵¹ «Kure wá, degdege ire á kure ba jire, kwá ceneka elva á Dadaamiya dekiđeki. Wayakurka cena názu á bakurná Shedekwe Cudedde, kwa ba kalkale antara eggye-aha a kure werre na ndza kwalarevkwálá na.

⁵² Ankwa nabi na ni eggye-aha a kure magaranánka palasa emtu? Ta naba cebaa emnde a bela á Dadaamiya ge sateraa labare á slejirire ba

ɲane palle na. Ba ɲane una a yanaa ice á kure, jakurja na.

⁵³ Kure lyakurvaalya *tawraitá á Dadaamiya na a vakurtaa á kya erva an malika-aha, amá magakurka.»

Tá dzaga Aitiyain an nákwá ge ja shifa-aara

⁵⁴ Am sarte na cenarácena una ɲanna male-aha á Yahudiya-aha maa, jaterje ervaunɗe jipu áte Aitiyain, tá zá ba erva-aatare an slare.

⁵⁵ Amá Aitiyain, ɲane an naha an Shedfekwe Cufedɗe. Ba a ketaa ice-aara á dem samaya wá, a naa tate na ni á njá átekwa Dadaamiya an sleksire-aara, Yaisu ankwá á tse am naɗafa á Dadaamiya.

⁵⁶ Daaci a ba ɲane: «Cenaucena: Iya wá, yá zhárá ba samaya an wera, yá zhárá ba *Ura á emnde bademme á tse am naɗafa á Dadaamiya.»

⁵⁷ Ta naba fu hula á dem zhegela geni a demka elva ɲanna á dem hyema-aatare, ta gwarhe bademme-aatare,

⁵⁸ ta naba danse á dete iga a ekse, ta de dzaganaa an nákwá áhuwa ge ja shifa-aara. Seyde-aha na ta tsakwese am zane-aha-aatare, ta puwehe a ufateraa dawale umele zhera-aara Sawulu.

⁵⁹ Daaci emnde na tá dzaga ɲane an nákwá, amá Aitiyain a magaa maduwa, a ba ɲane: «Yaakadada Yaisu! lyevaalya shifa-aaruwa.»

⁶⁰ A kezlaa uje am haha, a ba ɲane á ba an kaa kwárá: «Yaakadada! Yateraarye haypa na tá ankwá á maganá itare na.» Ba a ndaase una ɲanna wá, a naba emtsehe.

8

Sawulu a tsante fitenire áte emnde a fetarfe

¹ Vacite ñanna, tsarantetse fitenire yaikke ádete emnde a fetarfe am huđe á Urusaliima, bademme zhagadarzhagade á dete makwata-aha á Yahudiya, antara *Samariya, sey ta juwaa ba emnde a bela.

² Emnde na d'abartedaba Dadaamiya ta hedaa emtsa á Aitiyain, kyuwarsekyuwe jipu emtsa-aara.

³ Sawulu wá, anƙwa á wawa geni á zlnaazle emnde a fetarfe bademme, á já d'ába sera á wakyiya sera á wakyiya, á halaterá á dem dangay bademme an z'ála-ka an ñwasha-ka.

*Labáre á Yaisu daada á dem *Samariya*

⁴ Daaci emnde a fetarfe na zad'aratervezade na, tá anƙwa á bala ba waazu ma áme keni am tate na ta demaa itare bademme.

⁵ Filip maa, ñane a dem berni á *Samariya, a de fantau ge balatera elva á *Almasiihu ge emnde áhuwa.

⁶ Emnde bademme fartefa hyema ge cena elva á Filip, hayaránhaya. Najipu-aha na a maganaa ñane keni naránna bademme.

⁷ Jini-aha saresse am emnde kwakya tá ámbera hula, ñguryekwe-aha antara emnde a dere keni kwakya mbarmbe.

⁸ Njaanja higa yaikke ge emnde a berni ñanna.

⁹ Am sarte ñanna maa, ndza anƙwa zhele umele am *Samariya ñanna zhera-aara Simaun, ñane haraare á maga namselkwe-aara, antara wad'akire, emnde bademme tá maga ba najipu áte ñane, a ganve ire-aara ura ñгаа.

¹⁰ Emnde bademme, an emnde a ngaanga ka, an talaga-aha ka, baaka ura á ebza elva-aara defkideki. Baránba emnde ganakini hákuma yaikke, hákuma á Dadaamiya na wá, ba zhel nanna.

¹¹ Baaka ura á ebza elva-aara, adaba haraara ankwá á maga najipu-aha-aara am ice-aatare.

¹² Amá am sarte na dámda Filip an labare á higa, elva a dem zlanna á Dadaamiya, á kwaraterse antara zhera á Yaisu *Almasihu na wá, emnde kwakya fartarefe, an zála-ka an nwashaka lyarvaalya baptisma.

¹³ Ba Simaun nanna keni fetarfe, lyevaalya baptisma. Am ba kelaazare á iceka Simaun átevega Filip maa, á maga ba najipu áte nalaama-aha, antara najipu-aha na ankwá á maganaa Filip na.

¹⁴ Am iga á una nanna maa, cenanácena emnde a bela am Urusaliima ganakini fartarefe emnde a *Samariya áte elva á Dadaamiya, daaci ta naba bela tara Piyer antara Yuhanna á dezetare.

¹⁵ Daraada tara Piyer antara Yuhanna am Samariya, ta de magaterar maduwa ge emnde a fetarfe na tá áhuwa na, ganakini a vaterteva Dadaamiya Shedekwe Cufedde.

¹⁶ Adaba zlahe ta shaa ba baptisma an zhera á Yaakadada Yaisu, amá zlahe samka Shedekwe Cufedde á sem itare á ba am palle-aatare keni.

¹⁷ Am sarte na ni puwaraterarpuwa erva-aha-aatare tara Piyer, antara Yuhanna áte ire-aha-aatare na wá, daaci sharánsha Shedekwe Cufedde.

18 Nanna Simaun ganakini emnde na sharánsha Shedekwe Cudedde adaba erva na ta puwataare emnde a bela na wá, a naba vaterte shungu ge tara Piyer antara Yuhanna,

19 a ba nane á elvan ge itare: «Vawiteva hákuma nanna ge iya keni, geni máki ya puwaare erva-aaruwa ge ura wá, edda-aara keni sey á shánsha Shedekwe Cudedde ba seke una.»

20 A nwete ge Piyer, a ba nane á elvan ge nane: «A kedakuraakeda Dadaamiya antara shungu á na nanna bademme. Adaba ka kwamaa shekwa názu a vantaa Dadaamiya ge ura an nalmane.

21 Ekka baaka barama ge ekka, baaka tate á na am slera á ntere na dekideki, adaba shagerka ervaunde á na á katafke á Dadaamiya.

22 Emmága tuba arge haypa na ka maganaa ka, esslápala Dadaamiya ganakini á yakareye jeba á dzáma ire nanna máki á gevge.

23 Adaba na naa ervaunde á na kelaade, gakevge náve á haypa.»

24 A ba Simaun á elvan ge tara Piyer, antara Yuhanna: «Taslawa á kure, slapalawislápala áza Yaakadada á kure nanna geni a shika názena kwa ndanaa kure na.»

25 Tara Piyer, antara Yuhanna ta magaa seydire kwakya, ta balaterse elva á Yaakadada ge emnde. Am iga a una nanna maa, ta naba eptsa-aatare á dem Urusaliima. Átira daa zlafe ádaliye, ta balese labáre á higa, elva a Yaisu am ekse-aha á *Samariya.

Tara Filip antara zhel emnde a Aitiyaupiya

²⁶ Am iga á una-aha ñanna maa, a ba malika á Yaakadada á elvan ge Filip: «Tsetse ezzlala á dem manem, duwa áte emgyegwe a baráma tsekwa á da am Urusaliima ge dem Gaza na.»

²⁷⁻²⁸ A naba tsetehe ge Filip, a duhe. Duwa-aara á dem tate ñanna wá, ta de puwa ba jaa ire antara ura Aitiyaupiya umele nadíma, átira dá. Zhel ñanna nakawá yaikke. Ñane pataka á sleksu Kandake, mukse na sleksa ñane am larde á Aitiyaupiya. Daaci zhel ñanna wá, ndza a se kezlan ugje ge Dadaamiya am Urusaliima. Átira dá ñanna maa, aṅkwa á ndahá wakita á nabi Aisaya, á njá am *darkwa-aara, á tedaná belsa.

²⁹ «Naba duwa, herzhanteherzhe darkwa ñanna ba shagera,» a ba Shedfekwe Cudedfde á elvan ge Filip.

³⁰ Daaci a naba tedante ge Filip an zhágade, a de shanaahe, á cena zhel ñanna á ndaha wakita á nabi Aisaya. «Ká aṅkwa á cenáncena emtu jirire á názena ká ndahaná ka na?» a ba Filip á elvan ge ñane.

³¹ «Yá cenaná estara jirire-aara máki á paliná ura ka?» Daaci a dante Filip geni a dalemfálá á dezeńara am *darkwa, á njinja ázeńara.

³² Náwa názu a ndahesaa ñane am wakita á Aisaya:

Ñane gevge ba seke zhel kyawe na tá daná á de ícica na, ba seke zhel kyawe na tá betá úgje áte ñane keni á kyuweka dfekideki, ba we-aara keni weraaka.

³³ Ñane wá, garanaaga á dem áhá, magaranánka jirire dfekideki. Ware dfeme á de tsala

wulfe-aara am duniya na? Adaba ta ján werre shifa-aara.

³⁴ Daaci a ba zhel emnde a Aitiyaupiya na á elvan ge Filip: «Palinaapala elva na tásle á ña, á ndaná áte ware nabi á Dadaamiya elva na estuwa? Á ndaná a ba áte ire-aara emtu, á ndaná áte ura umele-he?»

³⁵ Filip a eksetaa elva, a dzegwanu ba ge elva ñanna am Aisaya na, a balanse labáre á higa, elva a Yaisu.

³⁶ Ba tá zlála, tá zlála, ta de shaa tate á yawe. Daaci a ba zhel emnde a Aitiyaupiya na á elvan ge Filip: «Náwa shamiyansha yawe mu, ankwá názu á piyite geni ká magiya baptisma emtu?» ((

³⁷ A ñwete ge Filip: «Máki faktarefe áte Yaisu an ervaunđe á ña palle wá, baptisma á ña a naba gevge.» A ñwete ge zhel emnde a Aitiyaupiya na: «Fantarefe ganakini Yaisu *Almasiihu wá, ñane *Egdza á Dadaamiya.»))

³⁸ Daaci tsaatse, a ba ñane á elvan ge sletedaná belsa. Ta naba tsekwese am *darkwa na tara Filip, antara zhel emnde a Aitiyaupiya ñanna, ta tsekweme am yawe, Filip a naba maganaa baptisma.

³⁹ Ba segashe-aatare am yawe wá, Shedekwe Cufedde a naba eksante Filip ba estuwa, mele nánka zhel emnde a Aitiyaupiya na mázle-aara. Amá a eksetaa baráma-aara zlafe ádaliye an higa yaikke.

⁴⁰ Filip keni á zhára ba á tse am Ajaustus. Daaci ba zlalá-aara á dem ekse-aha gergere, ankwá á balaterá labáre á higa, elva a Yaisu ge emnde, a daa ba estuwa á dem Kaysariya, á maga ba ñane.

9

Tuba á Sawulu
(22:6-10; 26:12-18)

¹ Am sarte-aha ɲanna baɗemme na maa, Sawulu wá, ɲane á mberá ba wáva áte emnde na fartarfe áte Yaakadada Yaisu na, a bantsa ɲane sey á zlateraazle baɗemme. A naba deza male á *liman-aha,

² a de ndavanu nalmesheri á seydire geni á duwa an ɲane am erva á dem egdzar mashidi-aha-aatare na tá am Dimaska. Estuwa, máki a de shaa emnde na ta fetaare áte Yaakadada Yaisu, ma zhele, ma mukse keni, á saterá á ba am erva á sem Urusaliima.

³ Ba a shaa nalmesheri ɲanna wá, antara ba zlala-aara. Ba ɲane keni herzhanteherzhe berni á Dimaska ɲanna wá, a naba tsekwaá ge parakkire yaikke á sa am samaya á sete ɲane,

⁴ a naba mbedehe ge Sawulu á dete haha, daaci á cena ba á ɗahaná kwara umele: Sawulu, Sawulu, labára ká magiya palasa, á bina.

⁵ A ɲwete ge Sawulu: «Ka ware ka edda-aaruwa?» A ba kwará ɲanna á elvan ge ɲane: «Ba iya Yaisu na ká aɲkwa á maganá palasa na.

⁶ Amá tsetse, edduwa á dem huɗe á ekse, tá de bakánba áhuwa názu ká de maganá ka.»

⁷ Emnde na tá am iga á Sawulu ɲanna di-yarka názu tá ndaná itare ɗekideki. Tá aɲkwa cenáncena kwará á ura, amá itare tá nánka edda-aara ɗekideki.

⁸ Tsetsa Sawulu am haha, a werante ice, amá á nánka. Sey ta ɲanaa áte erva, ta taɗanaa an táɗá á dem Dimaska.

⁹ Hare keye, ba slerba-aara keni nánka d'ekideki. Am hare keye nanna wá, zawka shawka d'ekideki.

¹⁰ An'kwa slefetarfe umele am Dimaska nanna, zhera-aara Hananiyas, a naba marananse ire-aara Yaakadada am wahayu,

¹¹ a dante: Hananiyas. Nam, a ba Hananiyas. A ba Yaakadada á elvan ge nane: «Tsetse ba kina, ed'faba ba baráma na tá d'faná an baráma nde'de na, edduwa á dem mba á Yahuda, en-dáva ura zhera-aara Sawulu ura Tarsus, nane an'kwa átira mága maduwa kina.

¹² Zhel nanna a shaa wahayu, am wahayu nanna maa, an'kwa á zhara ba ura zhera-aara Hananiyas a duhe á dezeńara, a de puwaare *erva a barka ganakini á nanna ice-aara zlabé ádaliye.»

¹³ A naba n'wete ge Hananiyas, a ba nane: «Emnde kwakya ta se balise labáre á zhel nanna degiya Yaakadada. Emtan'kire na a magater-naa nane ge emnde á n'a am Urusaliima keni ndarindaha bad'emme.

¹⁴ Ba sawa-aara ásehuna na keni a sanaa ba una nanna, ta vanta male-aha á *liman-aha hákuma á se hálá emnde na tá n'jala Dadaamiya an zhera á n'a.»

¹⁵ Amá a ba Yaakadada á elvan ge nane: «Naba duwa ka. Ad'aba ya eksese zhel nanna keni ge mága slera-aaruwa, ganakini á de kwaratersa nane zhera-aaruwa ge emnde a jeba umele, antara slekse-aha-aatare, ira emnde a *Iserayiila, geni a diyariyeddiye ba shagera.

¹⁶ Yá de marannaamárá zlad'a-aha na watse á

sháná ñane adaba zhera-aaruwa.»

¹⁷ Daaci a naba zláá ge Hananiyas, a de demá am hufe á há ñanna, a de puwar erva a barka-aara ge Sawulu, a ba ñane á elvan ge ñane: «Sawulu egdza emmerwa, a beliyaa ba Yaakadada Yaisu na a marakse ire-aara áte baráma a sawa na, geni ká náanna ice á ña zlafe ádaliye, ká shansha Shedekwe Cufedde.»

¹⁸ Ba ndah keni zlafe ndaaseka Hananiyas wá, ta naba sesehe ge duksa-aha umele am ice á Sawulu ba seke iga a kelfe wá, a fantau ge zhara ice-aara zlafe ádaliye. A tsetehe ta maganaa baptisma.

¹⁹ Daaci a zu duksa, shansha ndzedfa-aara.

Sawulu anƙwa á maga waazu am Dimaska

Sawulu haraare cekwaangudi áza emnde a fetarfe na tá am Dimaska.

²⁰ Ba watsewatse, a fantau ge ja dába am mashidi-aha á Yahudiya-aha gergere, ge bálá waazu á elva a Yaisu, geni Yaisu wá, *Egdza á Dadaamiya.

²¹ Emnde na tá anƙwa á cena elva-aara na bademme tá maga ba najipu. A ba itare: «Ábi una ba zhel na a cebaa emnde a dába Yaisu am Urusaliima na? Ábi ásehuna keni a sánaa ba una ñanna, geni á daterá á ba am zawa ádeza male-aha á *liman-aha?»

²² Amá waazu á Sawulu anƙwa á far ba mága slera am emnde. Baaka názu tá maganá Yahudiya-aha na tá am Dimaska na á katafke-aara, adaba anƙwa á marateránmára jirire-aara geni ba Yaisu una *Almasiihu, amaana: Edda una a eksesaa Dadaamiya.

²³ Haraare maa, Yahudiya-aha ta naba de-maa am sawari, ta naba njante geni sey tá kedanaakeda shifa á Sawulu.

²⁴ Amá cenáncena ñane keni názu ta ngwadanaa itare áte ñane bademme. An vayi vacika bademme tá aṅkwa á ufa we á ukvake á berni, tá tsagwada ba ñane geni sey tá kedanaakeda shifa-aara.

²⁵ Daaci vacite umele an vayiya maa, emnde na tá am iga-aara, ta naba njaneme am kenday yaikke, ta naba tsekwanse á kya biye á ukvake á dem iga a ekse.

Eptsaptsa Sawulu á dem Urusaliima

²⁶ Am sarte ñanna, eptsaptsa Sawulu á dem Urusaliima. Am eptsaa-aara wá, a de tataya jammeje antara emnde a fetarfe, amá baaka ura a fanaa vuwa dekideki, adaba fartareka geni ñane keni gevge slefetarfe ba jirire.

²⁷ Amá Barnabas wá, a naba eksante Sawulu ñanna ádezenjara, a puwansaa ñane ádeza emnde a bela, a de baternaa ñane ganakini Sawulu nanna Yaakadada áte baráma á dem Dimaska, antara elva na ni a bannaa Yaakadada ge Sawulu bademme. A ndaterhe zlaḅe ádaliye dzaṅdzaṅire na a maganaa Sawulu ge ndater elva a Yaisu ge emnde am huḁe á Dimaska.

²⁸ A fantau á ba am sarte ñanna nja Sawulu antara emnde a bela, a jaa dába am huḁe á Urusaliima ba seke una á kataná ñane mazla-aara ge mága waazu an zhera á Yaisu, an baakire á lyawa.

²⁹ Ádeza Yahudiya-aha na tá ndáhá ba elva a Yunaniṅkau keni a duwa Sawulu an elva a Yaisu,

a ndaterndáhá sera-aara ba kwakya, amá itare tá tataya keda shifa-aara.

³⁰ Cenarácena egdzar mama-aha-ɲara maa, ta naba danse á dem Kaysariya, ganakini a ezslála á dem Tarsus.

³¹ Daaci emnde a fetarfe am haha á Yahudiya, antara Galili, ira *Samariya njarinja an hairire mázla-aara, tá aɲkwa á far ba mága dzandzanjire am elva á Yaisu, tá aɲkwa á fá zherwe áte Yaakadada, aɲkwa Shedekwe Cufedfe am dágave-aatare, á sagatersaga ba kelaazare.

A mbetaa estuwa Aynaiyas

³² Am sarte ɲanna maa, Piyer á já ba dába am tate-aha gergere. Vacite umele maa, a de zhara emnde a fetarfe na tá am Lida.

³³ Duwa-aara á dem ekse ɲanna, a de bera ura umele zhara-aara Aynaiyas, yawe tiise á taa tseteka am haha dekideki, adaba gevge ɲguryekwe.

³⁴ Á ba Piyer á elvan ge ɲane: «Mbakaambe Yaisu *Almasiihu, tsetse, tsatsanaatsatse egdera á ɲa.» Kertenj tsetsa Aynaiyas.

³⁵ Emnde na tá am Lida ɲanna, antara emnde a Saraun bademme naránna, itare keni ta naba fetarehe áte Yaakadada Yaisu.

Tsetsa Tabita am emtsa

³⁶ Ndza aɲkwa mukse umele slefetarfe am ekse á Jaupe, zhara-aara Tabita, an elva a Yunaniɲkau wá, Daurkas. Amaana: Zaara. Mukse ɲanna wá, ma vaatara keni ɲane á maga ba slera á maggwire, aɲkwa á melateru ge talaga-aha keni.

³⁷ Daaci a eksevaahe ge lapikere wá, a naba emtsehe. Bararanyebáre, ta de zlavanaahe am bere. Bere nanna átire ge bere-aha umele.

³⁸ Dagave á tara Lida antara Jaupe yiyiyeka an kevaaye. Daaci cenarácena emnde a fetarfe na tá am Jaupe, ganakini ankwá Piyer am Lida. Daaci ta naba belanvaa emnde buwa, ganakini a sawa ba watsewatse tasle-aara.

³⁹ Ba watsewatse a tsetehe ge Piyer, ta zlala ba kerde antara emnde a de dáha na. Ba damda Piyer wá, ta dán ba suuwe á dem bere na átire na, Piyer a de beraa wegyege a nwasha bademme tá ankwá á kyuwa emtsa na. Ba ta naa Piyer, tá ankwá á kyuwa ásezenara, tá ámberá ngyekwaná buba antara náza tsekwa-aha umele na ndza a dzebanaa Daurkas am sarte na zlafe á ba an shifa-aara am dagave-aatare.

⁴⁰ Daaci Piyer a naba bakese emnde bademme á segashe, a kezlaa ugje, a magaa maduwa, daaci a eptsapte á deza emtsa na, a ba nane: Tabita! tsetse! A naba werante ice-aara Tabita, a tsetehe, a njehe.

⁴¹ Piyer a nanaahe erva, a tsante bademme, daaci a dante wegyege a nwasha na, antara emnde a fetarfe umele, a marateraa Daurkas an shifa-aara.

⁴² Labare nanna hyemhye am huđe á Jaupe bademme, emnde ta naba fetarhe áte Yaakadada Yaisu.

⁴³ Am iga a una nanna maa, Piyer haraare zlafe á daliye am huđe á Jaupe, am mba á slekkedfa gwagwa umele zhera-aara Simaun.

10

Kaurnailiyus á d'áhá Piyer á dem mba-aara

¹ Ankwa ura umele am Kaysariya zhera-aara Kaurnailiyus, palle á male-aha á sawji-aha á Rauma na tá d'aháterá an sawji-aha á Italiya na.

² Zhel nanna wá, nanaana nadina á Yahudiya-aha an tsáká ire. Nane an lyawa á Dadaamiya jipu, nane antara emnde-aara bademme am hufe á há-aara tá iceka de nala Dadaamiya. Ankwa á melaterumele jipu ge Yahudiya-aha na tá am baakire.

³ Vacite umele an naduwar wá, Kaurnailiyus a shaa wahayu á sawa áza Dadaamiya, a naa malika á Dadaamiya samsa ba ngayye ásezenara. A ba malika nanna á elvan ge nane: Kaurnailiyus!

⁴ A kante ice-aara Kaurnailiyus, a zharaa malika na amberá á gyagya, a ba nane: «A jaara uwe, edda-aaruwa?» A nwete ge malika na, a ba nane á elvan ge nane: «Dadaamiya lyevaalya maduwa á na, hayánháya slera á maggwire na ká ankwa á maganá ka átevege talaga-aha, nane viyakaaka d'ekid'eki.

⁵ Kina wá, naba ebbela emnde á na á dem Jaupe, a de darakanteda dawale umele ankwa áhuwa zhera-aara Simaun Piyer.

⁶ Zhel nanna ankwa am mba á patuma-aara cepen-aara Simaun slekkeda gwagwa, bere-aara áte we á guwa yaikke.»

⁷ Ba zlazlálá malika na, Kaurnailiyus a naba d'ante emnde buwa am dagave á emnde na tá maganá slera am hufe á há, antara sawji

palle am sawji-aha na tá ufa há-aara, sawji ṅanna keni d̄abeted̄aba nadina á Yahudiya-aha ba shagera.

⁸ Daaci a bateraa názu a ndanaa malika na bademme, a naba belaterbela á dem Jaupe na.

⁹ Dem makuralla-aara keni tá á ba áte baráma. Herzhe á maga vacitire wá, herzhazanteherzhe Jaupe. Piyer ṅanna keni d̄altesd̄alá áte ire á dzuguru ge mága maduwa.

¹⁰ Am sarte ṅanna keni ṅanaaṅa waya Piyer, á kátá náza za mázla-aara. Am sarte na ni tá aṅkwa á tsatsaná náza za ṅanna maa, ṅane shánsha wáháyu á sawa áza Dadaamiya.

¹¹ Am wahayu-aara, á zhara ba samaya an wera waṅṅe, aṅkwa á tsekwa duksa umele ba seke gwad̄au yaikke á sem áhá, an ṅaṅa we á námbaṅwa-aha-aara ufad̄e kerd̄e.

¹² Aṅkwa dabba-aha jeba gergere bademme, antara názu á hulmba am haha jeba gergere bademme, ira yiye-aha jeba gergere bademme am hude á duksa ṅanna.

¹³ A ba kwara umele á sawa am samaya á elvan ge Piyer: «Tsetse eksevaksá, icantice, ezza.»

¹⁴ Amá a ṅwete ge Piyer, a ba ṅane: «A'aa estuweka Yaakadada, ad̄aba ba vaci palle keni zanuka harám, ma lipa keni.»

¹⁵ A ba kwara ṅanna á elvan ge ṅane zlaḅe ad̄aliye: «Zhareka názu a ganvaa Dadaamiya cud̄ed̄e seke lipa.»

¹⁶ Ser keye aṅkwa á banánba estuwa. Am iga á una ṅanna, a naba eptsehe ge kazlaṅa ṅanna ad̄aliye á dem samaya.

¹⁷ Piyer wá, aṅkwa á dzama ba názena ni

á kátá á banná Dadaamiya an waháyu ɲanna. Daaci emnde a bela á Kaurnailiyus keni tá aɲkwa á tsatse áte we á bercame-aara, tá aɲkwa á enndava.

¹⁸ Ta kante kwárá, a ba itare: «Aɲkwa ura zhera-aara Simaun Piyer am mba na emtu?»

¹⁹ Piyer am dzama ire keshekke, aɲkwa á tataya jirire á názena á kátá banánba Dadaamiya an wahayu na, á cená ba tá aɲkwa á tatayaaká zála keye ágashe, a ba Shedekwe á Dadaamiya á elvan ge ɲane.

²⁰ Tsetse ettsekwa, de dɓabaterdɓaba ba kina, maɲka gajawe dekideki adɓaba ya belateraa ba iya, a ba Shedekwe Cudedde.

²¹ Daaci a tsekwehe ge Piyer, a duhe á deza emnde ɲanna, a ba ɲane á elvan ge itare: «Náwa iya, iya edda una kwá aɲkwa á tatayaná kure, ázara á ba kure?»

²² Ta ɲwetehe, a ba itare tá elvan ge ɲane: «A belaneraa Kaurnailiyus male á sawji-aha, ura mággwe, an lyawa á Dadaamiya jipu, ba Yahudiya-aha keni diyardiya. A bannaa ba malika á Dadaamiya ganakini sey á dɓakdáhá á dem mba-aara, ká de banánba názu ká an ɲane ge ndanda na.»

²³ Daaci a lyatervaahe ge Piyer á dem bere, a vaterte tate a zlava ge hare.

Mákuralla-aara ta tsetehe, a zlala antara itare. Emnde a fetarfe na tá am Jaupe keni emnde umele ta dɓabaterdɓaba.

²⁴ Wergekse-aara lauktu daraada am Kaysariya. Daaci Kaurnailiyus a dɓante emnde-aatare, antara slakate-aha-aara, tá aɲkwa ufa

sawa á Piyer na.

²⁵ Am sarte na damda Piyer, a se yainu á ba áte we á bercome Kurnailiyus, a kezlanaa ugje ba shagera á katafke-aara.

²⁶ Amá a tsante ge Piyer, a ba nane á elvan ge nane: «Tsetse, iya keni ya ba urimagwe.»

²⁷ Piyer á baná ba elva ge Kurnailiyus ta demaa ba estuwa á dem huđe á há. Ta de beraa emnde kwakya jarammeje áhuwa.

²⁸ A ba nane á elvan ge itare: «Ba kure keni diyakurdiya ganakini ura Yahudiya wá, á belannaaka nadina-aara ge nja antara ura á jeba umele, sakwa ge dem mba-aara. Amá a marisaa ba Dadaamiya geni ma ware keni a zharanka seke lipa.

²⁹ Adaba una nanna náwa sanemsa adaba dfaa á na, maganka gajawe dfekideki. Kina wá, wayanwáyá cena pute na ka dfahiyaa átugena na.»

³⁰ A nwete ge Kurnailiyus, a ba nane: «Hare ufađire-aara vatena, vacite nanna yá ankwá á maga maduwa á icavaciya, an zura ba seke una wá, yá zhára ba ura á tse á katafke-aaruwa, nangyuwe-aara á maga wulwulire ba seke uwe,

³¹ a ba nane á elvan ge iya: Kurnailiyus, lyevaalya Dadaamiya maduwa á na, mela na ká ankwá á melaterwa ka ge talaga-aha na keni viyanaaka.

³² Kina wá, ebbela emnde á dem Jaupe, a de dfarakanteda Simaun Piyer, ankwá am mba á cepen-aara Simaun slekkeda gwagwa, há-aara ankwá áte we á guwa yaikke.

³³ Daaci ba watsewatse ya naba belakvaa

emnde á ba am sarte ɲanna ge de dakɗaha, ka keni fanƙa ervaunɗe, daaci yá slafaká we-aara aɗaba sawa á ɲa. Kina wá, baɗemme á ɲere na, ɲa jamme á katafke á Dadaamiya áhuna ba ge cena názu a fakaara Yaakadada ge enndáhá-aara na.»

Waazu á Piyer am mba á Kaurmailiyu

³⁴ Daaci Piyer a eksetaa elva a ba ɲane: «Kina wá, diyandiya ganakini ba jirire gergerka emnde áza Dadaamiya.

³⁵ Emnde baɗemme, máki ura á njá an lyawa á Dadaamiya, aɲkwa á maga jirire wá, ma ura a ekse-ara keni á hayáhnáyá Dadaamiya.

³⁶ Diyakurdiya Dadaamiya a velante elva-aara ge larde á *Iserayila, elva ɲanna wá, labáre á higa geni emnde tá shánsha hairire an Dadaamiya á kya erva an Yaisu *Almasiihu, ɲane Yaakadada á emnde baɗemme.

³⁷ Ba kure keni diyakurdiya elva ɲanna a fantau am Galili, am sarte na Yuhanna aɲkwa á balaterá waazu á baptisma ge emnde na; diyakurdiya názu a mágava am huɗe á Yahudiya baɗemme am sarte ɲanna.

³⁸ Ba kure keni diyakurdiya baakire á zlakta á Sheɗekwe Cuɗeɗɗe na a vantaa Dadaamiya ge Yaakadada Yaisu ura Nasarátu, diyakurdiya názu a maganaa Yaisu am larde na, slera á magwire na a maganaa ɲane, a naba mbateraahé emnde na tá an shaitaine, aɗaba Dadaamiya aɲkwa antara ɲane.

³⁹ ɲere wá, ɲa seyde-aha á názena a maganaa ɲane am huɗe á Yahudiya baɗemme, antara

am Urusaliima na. Nane maa, ta janaa áte dzaŋgala.

⁴⁰ Amá Dadaamiya a tsante am fáyá am hare ge keyire. A vante baráma ganakini á marañeránmárá ire-aara ge ñere.

⁴¹ A marateraa ire-aara ge emnde bademme-ka, sey ba ge ñere ña emnde na ni a dzerañerse werre Dadaamiya ganakini ña seyde-aha na. Am iga a tsantetse-aara am fáyá na wá, ñere zañeruze, shañerushe antara ñane.

⁴² A bañernaa ba ñane an we-aara ganakini ñá ndaterndáhá elva-aara ge emnde bademme, ñá maga seydire-aara geni ba ñane edda una a tsanaa Dadaamiya ge mága shairiya á emnde na tá an shifa, antara shairiya á emnde a fáyá bademme.

⁴³ Nabi-aha bademme ndza ta enndáhá elva áte Yaisu, a ba itare: Ma ware una a fetaare áte ñane keni, Dadaamiya á yanárye haypa-aha-aara adaba ñane.»

Ma emnde na garevka Yahudiya-aha keni sharánsha Shedekwe Cudedde

⁴⁴ Am sarte na Piyer aŋkwa á maga waazu na wá, tsekwatartsekwa Shedekwe Cudedde ge emnde a cenaa waazu-aara na bademme.

⁴⁵ Yahudiya-aha na ta saa á daba Piyer, itare fartarefe na, daremda am mága najipu yaikke, geni mbate Dadaamiya á vaterteva Shedekwe Cudedde ge emnde umele keni.

⁴⁶ Adaba tá cená ba tá aŋkwa á ndáhá elva-aha aŋwaslire, tá aŋkwa á gálá Dadaamiya am yaikkire-aara. Daaci a ba Piyer:

⁴⁷ «Emnde na keni sharánsha Shedekwe Cufedde ba seke una ña shanaa ñere. Kina mu, á piyaterantaa ware ganakini tá magaternaam-aga baptisma an yawe?»

⁴⁸ Daaci a ba ñane, a magarateranmaga baptisma an zhera á Yaisu *Almasiihu. Am iga a una ñanna maa, itare ta ndáva Piyer, ganakini á haraterveháre cekwaanḡudí.

11

Piyer anḡkwa á vaterte sera á elva áte Kaur-nailiyus ge emnde a fetarfe am Urusaliima

¹ Cenarácená emnde a bela, antara emnde a fetarfe umele na tá am Yahudiya, ganakini ba emnde a jeba umele keni tá anḡkwa emnde umele lyarvaalya elva á Dadaamiya.

² Daaci am sarte na daada Piyer á dem Urusali-ima maa, Yahudiya-aha na fartarfe na ta fantau ge hábaza sera á Piyer, a ba itare tá elvan ge ñane:

³ «Ekka ni ka naba dem mba á emnde na ta baaka am shedekwe, ka zu duksa antara itare!»

⁴ Daaci Piyer a eksetaa elva, a tsakaterse sera á elva ñanna bademme an pálpale.

⁵ A ba ñane á elvan ge itare: «Iya wá, ndza yá am berni á Jaupe. Yá átira mága maduwa wá, ya naba shaa wáháyu. Yá zhárá ba duksa umele yaikke, á tsekwa á sawa am samaya á sezerwa ba herezhzhe. Duksa ñanna ba seke gwadau, an ñaḡa we á nambaḡwa-aha-aara ufáde kerde.

⁶ Ya fete ice-aaruwa ba yamme ge zhárá názu am huđe-aara wá, anḡkwa dabba-aha á bere, antara dabba-aha á kaamba jeba gergere

bademme, názu á hulmba am haha jeba gergere bademme, ira yiye-aha jeba gergere bademme.

⁷ Daaci yá cená ba kwárá á biya elva á sawa am samaya: Piyer, tsetse, eksevaksa, icantica, ezza.

⁸ Amá ya ṅwanante: A'aa estuweka Yaakadada, adaba ba ser palle keni damka duksa harám, ma lipa keni am mbuwe-aaruwa.

⁹ A ba kwárá ṅanna zlaḅe ádaliye á sawa am samaya: Zhareka názu a ganvaa Dadaamiya cufedde seke lipa.

¹⁰ Ser keye anƙwa á biyánba kwárá ṅanna estuwa. Am iga-aara a naba eptsehe zlaḅe ádaliye ge kazlaṅa ṅanna á dem samaya.

¹¹ Á ba am sarte ṅanna maa, saremsa zála ufade á sem mba na ya tsekwaa am huḁe-aara na, a belateraa zhel emnde a Kaysariya á sezerwa.

¹² A ba Shedekwe á Dadaamiya á elvan ge iya: Ezzlálá antara itare, maṅka gajawe dekideki. Daaci ya naba tse ya duwa. Egdzar mama-aha a miya na náwa itare ta unƙwahe na keni, ta naba duhe antara ya á de ba am huḁe á há á zhel ṅanna.

¹³ A ndaṅerhe sera-aara bademme, geni a tsekwaa malika á Dadaamiya am huḁe á há-aara ba ge ṅane, a ba malika ṅanna, eḅbela zála, a de darakantedá Simaun Piyer am Jaupe,

¹⁴ watse á se bakánba ṅane elva na ni ká lyelye shifa á ṅa an ṅane, ekka antara huḁe á há á ṅa bademme.

¹⁵ Daaci ya naba magateraa waazu. Yá anƙwa á magaterá waazu wá, a tsekwaa ge Shedekwe Cufedde á setarge itare ba seke una ndza a

tsekwamiyar ge miya am zunṅwire na.

¹⁶ Daaci yehanteyeha elva na ndza a ndanaa Yaakadada, a ba ṅane: Yuhanna wá, a magat-
eraa baptisma ge emnde an yawe, amá kure, tá
de magakurá baptisma an Shedekwe Cudedde
na.

¹⁷ Daaci estuwa, a vatertaa ba Dadaamiya
an ire-aara Shedekwe Cudedde, ba seke una
ndza a vamite ge miya adaba fetarfire á
miya áte Yaakadada Yaisu *Almasihu na.
Yá dzegwándzegwa piyantaa slera-aara ge
Dadaamiya emtu?»

¹⁸ Cenarancena elva ṅanna, lauktu daralika á
há baza sera á Piyer mazla-aara. Ta fantau ge
gálá Dadaamiya, a ba itare: Una wá, ba jirire. A
magaternaa ba Dadaamiya pute a maga tuba ge
emnde a jeba umele keni, ganakini a sharansha
shifa.

Emnde a fetarfe na tá am Antakiya

¹⁹ Am diyakurdiya ba kure keni, ganakini am
sarte á ja Aitiyain, ndza anṅkwa zladá áte emnde
a fetarfe kyarkya á dem ekse-aha gergere, emnde
umele-aatare kwaye ta zlalá á dem Finikiya,
antara Kiprus, ira Antakiya na wá, itare ta de
bálá ba waazu. Amá wá, sey ba ge Yahudiya-
aha.

²⁰ Emnde umele-aatare ge emnde a Kiprus,
antara emnde a Siraine, ta naba dem Antakiya.
Itare wá, ta de magaterán ge Yahudiya-aha ka
palle waazu, antara emnde na garevka Yahudiya-
aha keni bademme. Ta de ndaater labáre á higa,
elva a Yaakadada Yaisu.

²¹ Yaakadada Yaisu maresemáre hákuma-aara am itare. Adaba una ɲanna, emnde kwakya fartarefe, saremsa á sem sera-aara.

²² Dámnda labáre-aatare á deza emnde a fetarfe na tá am Urusaliima maa, daaci ta naba bela Barnabas á dem Antakiya ɲanna.

²³ Duwa-aara, ba ɲane keni de nanna ganakini Dadaamiya a gaterar barka kwakya ge emnde a fetarfe ɲanna, higa ge ɲane keni. A faterem ndzedfa am vuwa kwakya geni a njarinja an lya á Dadaamiya, a dzalarka d'ekideki.

²⁴ Barnabas ɲanna wá, ura mággwe, slefetarfe an tsaka ire, an naha an Shedekwe Cudedde. Daaci emnde kwakya fartarfe áte Yaakadada.

²⁵ Am iga a una ɲanna maa, Barnabas a sem Tarsus ge tataya Sawulu.

²⁶ Am sarte na shansha, ta saa ba kerde á sem Antakiya. Ta se magaa sakanderi átirpalle, ta kwaraterse duksa kwakya ge emnde a fetarfe. Ta fantau á ba am Antakiya ɲanna zuɲɲwe ge d'áhá emnde a fetarfe an emnde á *Almasiihu.

²⁷ Tá aɲkwa nabi-aha umele ta tsete am Urusaliima, ta dem Antakiya am sarte ɲanna,

²⁸ a balese ge palle á nabi-aha ɲanna an hákuma á Shedekwe Cudedde, zhera-aara Agabus, a tsetehe, a tsaaha am dagave á emnde, a ba ɲane: Aɲkwa á sawa waya yaikke á sete duniya bademme. (Ba jirire ndza samsa waya ɲanna am zamáne á sleksu Kalawdiyus.)

²⁹ Daaci ta naba ɲgud'aa sawari-aatare emnde a fetarfe, ganakini ma ware keni a faafa názu a dzegwanaa ɲane, tá de melateru ge emnde a fetarfe na tá am Yahudiya an ɲane.

³⁰ Ta naba jemaa sadake ɲanna, ta belaa tara Barnabas tá antara Sawulu an ɲane ádeza male-aha á emnde a fetarfe am Yahudiya.

12

**Hirudus a ja Yakuba, a belem Piyer am dangay*

¹ Am sarte ɲanna, fantaufe sleksu *Hirudus ge shateru zlaɗa ge emnde a fetarfe umele.

² A ba ɲane: A jareja Yakuba egdza emmenjara ge Yuhanna an katsakar, ta naba jehe.

³ Nanna hayaránháyá Yahudiya-aha maa, a naba eksevaa Piyer keni, am hare-aha á muɲri á depaiɲ na baaka shahi á makala am huɗe-aara na, a de zlenjma am dangay.

⁴ Am sarte na eksevaksa na wá, a puwaa sawji-aha kelaawa ju unjwahe, ta tegese sawji-aha ɲanna gergere ufaɗe ge ufufa-aara. Ate *Hirudus wá, ma andze á dáná á dem shairiya á katafke á zlamaha má zlauzla muɲri á *Paska ɲanna bademme.

⁵ Daaci ba njá á Piyer am dangay na, amá baaka puwansepuwe á emnde a fetarfe ɗekideki ge mága maduwa aɗaba ɲane.

Malika a sanse Piyer am dangay

⁶ Lauktu á semsa hare na a tsanaa *Hirudus na wá, á ba an vayiya ɲanna Piyer á pá ba hare-aara am dáɗave á sawji-aha buwa, erva-aara palle an ɲɗuɗa áte sawji na, erva palle keni an ɲɗuɗa áte una an kaderci bademme. Sawji-aha na tá ufa we á bere á dangay ɲanna keni tá aɲkwa bademme.

⁷ A naba semhe ge malika á Yaakadada, hyemhya parakkire á Dadaamiya am huđe á dangay ɲanna baɗemme. Daaci malika na a de gejante Piyer, a tsante am hare: «Ettse ba watsawatse!» a ba ɲane á elvan ge ɲane. A palehe ge tsavaytsavaye áte erva-aha-aara ba estuwa, a puwehe á dem haha baɗemme.

⁸ A ba malika na á elvan ge ɲane: «Halantehála náza ɲgudá huđe á ɲa, ɲgudesenɲgudé huđe, puwempuwa kimake á ɲa am sera.» A naba maganaahe una ɲanna Piyer. A ba ɲane á elvan ge ɲane: «Tsekwemtsekwa am kazlaɲa á ɲa, sawa mi zlala.»

⁹ A tsetehe ge Piyer ba estuwa, aɲkwa á ɗaba malika na, amá ɲjanteka ɲane áte jirire názena aɲkwa á maganá malika na, ɲane a kurken á ba am wáháyu.

¹⁰ Daaci ba tá sawa, tá sawa, ta yesaa tate á njá á sawji-aha palle, ta yesaa una ge buwire, saremsa áte wákyiya yaikke na an maga an íre miyenne, má sakesse am una ɲanna ká de ba am huđe á berni na. Saremsa áte wákyiya ɲanna, a wertaa ba ɲane an ire-aara, ta naba sesehe á segáshe. Ta zlalete ba cekwaanɲudi áte barama á dem huđe á berni wá, a međehe ge malika na, a yaa Piyer ba ɲane palle.

¹¹ Piyer á nanna mazla-aara názena a maganaa malika, a ba ɲane: «Kina wá, diyandiya kwa, mbate Yaakadada a bela malika, a se ɲezlise am hákuma á *Hirudus, antara lámare na ta yekivaa Yahudiya-aha na baɗemme.»

¹² Am sarte na shushe Piyer yawe am mága ɲanna baɗemme maa, a naba dem mba á

Maari emmarge Yuhanna, Markus keni ba zhera-aara, a de beraa emnde kwakya tá anƙwa ɲala Dadaamiya.

¹³ Daaci anƙwa á já we á bere Piyer am mba á Maari, a sawa gyaale umele zhera-aara Raude, a se cena labare wá,

¹⁴ á cena ba kwárá á Piyer. Higetehiga Raude, kelaa ma á werá we á bere ɲanna wá, ɲane a eptsaa á dem huɗe á bere zlaɓe ádaliye ge ndahater ge emnde umele ganakini anƙwa Piyer á tsá ágáshe.

¹⁵ A ba itare tá elvan ge ɲane: «Ká an shaitaine emtu Raude?» A ba ɲane á elvan ge itare: «Yá ndaakur ba jirire una fideka.» A ba itare, má estuwa wá, una ba sheɗekwe-aara.

¹⁶ Amá Piyer yánka já we á bere na. Mázla-aara ta se werante, tá zhárá ba irice á Piyer á tse, tá maga ba najipu-aara.

¹⁷ A magateraa nalaama an erva ganakini a ndarka elva. A ndaterhe názena a maganaa Yaakadada ge sanse am dangay na, a ba ɲane á elvan ge itare: «Mbedfawaterumbede ge tara Yakuba, antara egdzar mama-aha a miya umele.» Daaci ba segáshe-aara, a zlalehe á dem tate umele.

¹⁸ Weraawera ekse wá, ba palle a názu tá ndaaná sawji-aha na ta ufaa Piyer na baaka. Názu tá ndaaná itare, ba Piyer na mu a magáná estara?

¹⁹ A ba sleksu *Hirudus sey a tatayartátaya. Amá sharánká Piyer ɗekidɗeki. A dateraa ndáva-aha ge sawji-aha na, am iga-aara, a ba ɲane, má ba estuwa wá, a cebareceba sawji-aha ɲanna am

kelaa-aara. Ba a ndaase una ɲanna, mazla-aara ba zlala-aara á dem Kaysariya, a de shekwaahe áhuwa.

*Elva áte emtsa á sleksu *Hirudus*

²⁰ A ba am sarte-aha ɲanna maa, ndza aɲkwa ervaunɲe á sleksu *Hirudus áte emnde a ekse á Tirus, antara emnde a ekse á Sidaun bademme. Daaci emnde a ekse-aha ɲanna ta magaa sawari geni tá de slapala áza slekse; ta naba tatayevaa Balastus geni á dáterá ɲane á deza slekse ɲanna. Balastus ɲanna ura male. Huɲe á há á slekse ɲanna bademme am erva-aara. Daaci duwa-aatare ádeza sleksu Hirudus, ta de tataya hairire am dágave-aatare. Adaba zuze á emnde a ekse-aha ɲanna bademme á segáshe á ba am kwárá á slekse ɲanna.

²¹ Daaci sleksu Hirudus a fateraa sarte á já ire-aatare. Samsa sarte ɲanna maa, Hirudus a tsekwemaa am zane á sleksire a njemaa am kurshi á sleksire, a fantau ge ndaater elva.

²² Amá ta naba ɲwete ge emnde bademme á ba an ká kwárá á dem zhegela, a ba itare: Dadaamiya una á ndáhá elva na, urimagweka. Ba a cenaa una ɲanna sleksu Hirudus, a naba shafante ire-aara.

²³ Daaci a se zlavanaahe ge malika á Yaakadada á ba am sarte ɲanna an lapikere, adaba a eksetaa sleɲe á Dadaamiya. A zanse huɲe záhe á huɲe, daaci a naba emtsehe.

²⁴ Amá elva á Dadaamiya wá, hwiyaahwiya baaka zlakta-aara.

²⁵ Tara Barnabas antara Sawulu magarnaam-aga slera na ta faterarfe, ta belaterbela á dem

Urusaliima na, ta saa ba kerde antara Yuhanna Markus á sem Antakiya.

13

Tá an dzera tara Barnabas antara Sawulu ge dem larde umele

¹ Am aiklaisiya á Antakiya wá, tá an kwa nabi-aha, antara emnde a kwaraterse elva á Dadaamiya ge emnde. Náwa zhera-aha-aatare: Barnabas, Simaiyaun, Ura Danjwe keni ba zhera-aara, Lukiyus, nane ura Siraine, Manahun, nane slenja á sleksu *Hirudus, ira Sawulu.

² Vacite umele tá am sera á Dadaamiya, tá an kwa tsufa ndera wá, a ba Shedekwe Cudedde á elvan ge itare: «Tara Barnabas antara Sawulu wá, yawáterya ge ire-aatare ge mága slera na ya daater ge nane na.»

³ Daaci ta tsufete ndera, ta magaterar maduwa, ta puwaterar *erva a barka, lauktu ta belaterbela á de maga slera nanna.

Slera á tara Barnabas antara Sawulu am Kiprus

⁴ Am a dzeratersaa Shedekwe Cudedde tara Barnabas antara Sawulu ge belaterbela, ba zlala-aatare á dem Sailaiwkiya, ta de dema am paare á yawe áhuwa ge dem Kiprus am dagave á yawe.

⁵ Ta de tsekwa am Salami am haha nanna, daaci ta de fantau ba ge de bálá elva á Dadaamiya am *mashidi-aha á Yahudiya-aha áhuwa. Yuhanna Markus keni antara ba itare, an kwa á melaterumele.

⁶ Ta jem d'ába praatte am haha á Kiprus ñanna. Herzhe tá degáshe am haha ñanna, kwaye ta dem Pafaus am halavuwa-aara. Am Pafaus maa, ta de já ba ire antara zhel Yahudiya umele zhera-aara Bar-Yaisu, slemaga namselkwa, a bantsa ñane: Ya nabi, mbate fida.

⁷ Zhel ñanna ta emnde a njá antara raizhaun á haha á Kiprus, zhera-aara Sairgiyus Paulaus slenjkale jipu. Daaci raizhaun a d'ante tara Barnabas antara Sawulu á dezeńara, ad'aba á kátá cená elva á Dadaamiya.

⁸ Amá Ailimas, una zhera á slemaga namselkwe na an elva a Yunaniñkau-aha, ñane ekserka duwa á tara Barnabas á deza raizhaun na d'ekideki. Á kátá piyantá fetarfire ba d'ekideki ge raizhaun.

⁹ Daaci Sawulu, Paul keni ba zhera-aara, an naha an Shed'ekwe Cuded'de, a ñgyaingyainse ice,

¹⁰ a ba ñane á elvan ge zhel ñanna: «Hey! Zhel shaitaine, a ba ka ka yaimyaime, ká maga ba kemañgerire, ka kelaade á jirire bad'emmeke? Ká yainya emtu badza slera á Dadaamiya na?

¹¹ Náwa Dadaamiya á fakar názu á fakarfe, sey ká gevge wulfe emtsaade cekwaangudi, ká shekwaashekwa ká nánka vaciya an ice á ña.» Kerten a naba wulfete ge Ailimas, á tatapaná an nad'afa antara názlaba bad'emme ge tataya ura á tad'aná an erva.

¹² Nanna raizhaun una ñanna, ñane a naba fetarehe áte Yaakadada, añkwa á cená názu tá kwaransekwáre, añkwa á maga najipu-aara.

Tara Paul antara Barnabas am Antakiya, haha á Pisidiya

¹³ Tara Paul yaránya Pafaus, daremda am paare á yawe, zlarzlálá á dem Pairge am haha á Pamfiliya. A de yateraa áhuwa Yuhanna Markus, nane a eptsaa á dem Urusaliima.

¹⁴ Amá tara Paul wá, ta tsete am Pairge nanna, kwaye ta zlálá á dem Antakiya am haha á Pisidiya. An vaci puwansepuwe maa, ta duhe á dem *mashidi á Yahudiya-aha, ta de njanjehe.

¹⁵ Am sarte na ndarsende *tawraitá, antara wakita á nabi-aha, male-aha á mashidi nanna ta belaterve we ge tara Paul, a ba itare tá elvan ge itare: «Máki anjwa elva kwá ndaater ge emnde ge vaterte ndzedá an nane wá, ndaundáhá kina egdzar mama-aha-aaruwa.»

¹⁶ Daaci a naba tsetehe ge Paul, a magateraa nalaama an erva, a fantau ge ndaater elva, a ba nane: «Kure emnde a *Iserayiila, kure emnde na kwá an lyawa á Dadaamiya bademme, cenaucena:

¹⁷ Dadaamiya na mí dabaná miya emnde a *Iserayiila na wá, ndza a dzeratersaa ba nane eggye-aha a miya werre, kwaye a de gelateraa am haha á emnde, am Misera. Am iga á una nanna maa, a saterse am Misera nanna an hákuma-aara.

¹⁸ Yawe kul ufáde á fá ba ervaunde an itare am kaamba.

¹⁹ Daaci a kedaa jeba gergere vuye antara slekse-aha-aatare bademme am Kanaana, a vaterte haha ge emnde-aara Iserayiila-aha.

²⁰ Bademme á una nanna wá,

shekwaashekwa-aara á maga yawe deremke ufade an kul ilyebe. Am iga-aara maa, Dadaamiya a dzerese emnde umele am itare, a gaterve narkali-aha ge kyá shairiya-aatare. A magán ba estuwa dem zamane á nabi Samiyail.

²¹ «Am iga-aara maa, itare ta ndavanu slekse ge Dadaamiya, a vaterte Sawulu egdza á Kis. Nane ura jeba á Bainjamain. A magaa iva kul ufade am sleksire.

²² Am iga á yawe kul ufade wá, Dadaamiya yanaaya Sawulu, a vaterte *Dawuda ge slekse-aatare. Náwa názu a ndaasa Dadaamiya áte sleksu Dawuda: Ya hayanaa á ba an háyá Dawuda egdza á Yaisa, diyandiyá geni á de mag-anaamaga nane názena yá kataná ya bademme.

²³ Kina wá, Dadaamiya a eksese ura am dágave á eggye-aha á Dawuda nanna, a ganve slelyaterlya itare emnde a *Iserayiila bademme. Ba seke una ni ndza a bateranba ganakini watse á vaterte ura, slelyaterlya na. Ura nanna wá, Yaisu.

²⁴ Am sarte na zlafe marseka Yaisu ire-aara parakke áza emnde wá, Yuhanna a magateraa waazu ge emnde a Iserayiila, a ndaterndáhá geni a magarmága tuba, tá magateraamaga baptisma.

²⁵ Am sarte na herzhe watse á emtsa Yuhanna wá, a naba ndavateruhe, a ba nane: Kwa kurken ya ware nane? Iya wá, ya edda una kwá ufaná kure ka. Nane ankwá á sawa. Ba ge slesadanse kimake am sera keni hyanefka ya dekideki.

²⁶ «Daaci egdzar mama-aha-aaruwa, kure eggye-aha á Ibrahimia, kure emnde na kwá an lyawa á Dadaamiya bademme na, Dadaamiya a

belamiyán ba ge miya labare á lya ura ñanna.

²⁷ Amá cenaránka emnde a Urusaliima antara male-aha-aatare ganakini ba Yaisu una slelya ura, cenaránka názu ta ndahanaa nabi-aha na. Tá ndáhá ba ñane tsa ba kelaa vaci puwansepuwe am mashidi-aha-aatare, aley ta eksevaa Yaisu, ta zuhe an shairiya. Estuwa, ta maganaahe keni ba itare ñanna zlahe adaliye elva a nabi-aha ñanna.

²⁸ Sharánka tsa haypa áte ñane hyephye ge já shifa-aara, aley a ba itare tá elvan ge sleksu *Pilaatu: Sey ká ja ba shifa-aara bademme.

²⁹ Magaraamaga názu ndza ta ndahanaa nabi-aha áte Yaisu wá, ta tsekwanaahe ge emnde umele áte dzaŋgala ñanna, ta de hedehe.

³⁰ Amá a se tsante ge Dadaamiya am fáyá.

³¹ Am hare-aha kwakya una Yaisu aŋkwa á maraterá ire-aara ge emnde na ndza tá njá á ba antara ñane na. Aŋkwa á maraterá ire-aara kwaye á sa am Galili, dem Urusaliima bademme. Ba emnde ñanna una ta seyde-aha-aara. Tá aŋkwa á ndater elva-aara ge emnde a *Iserayiila.

³² Ba ñere na keni, ña sakuraa ba labare á higa ñanna. Ña se bakuraa duksa na ni ndza a baternaa Dadaamiya ge eggye-aha a miya ganakini watse á vaterteva na.

³³ A vamite ge miya na ma eggye-aha-aatare na duksa ñanna. Adaba a tsante Yaisu am fáyá ba seke una aŋkwa an puwa am jabura buwa na. A ba ñane:

Vatena wá, gakevge egdza-aaruwa, Iya keni ya Eddeña.

³⁴ Ndza a bánba zlaɓe ádaliye Dadaamiya ganakini watse á tsantetse Yaisu am fáyá, á de sevka vuwa-aara ɗekideki. A ba ɲane:

Ba jirire, watse yá gakarge barka-aaruwa ba seke una ndza ya banán ge *Dawuda ganakini watse yá magannaamaga na.

³⁵ A ba Dawuda zlaɓe ádaliye am wakita-aara:

Ká yánka á sevse vuwa á sleslera á ɲa ɗekideki.

³⁶ Ɗane wá, a maganaa slera ge Dadaamiya am zamane-aara, amá zlauzla ndzedá-aara, emt-samtsa, ta heɗaterve ge eggye-aha-ɲara. Ɗane wá, sevse.

³⁷ Amá edda una tsantetsa Dadaamiya am fáyá na wá, ɲane sevka vuwa-aara ɗekideki.

³⁸⁻³⁹ Daaci egdzar mama-aha-aaruwa, shagera ba kwá cena názena ɲá aɲkwa ndakurndá na: Dadaamiya á de yakuraarye haypa-aha á kure wá, sey adaba Yaisu. Ma ware keni má fetarfa edda-aara á ba áte ɲane wá, Dadaamiya á vanteva jirire. Una názu dzegwánka *tawraita magaterán ge emnde.

⁴⁰ Faufa hyema ba shagera geni a gevka názena ta ndahanaa nabi-aha na áte kure.

⁴¹ Adaba a ba wakita á Dadaamiya:

Cenaucena kure emnde na kwá aɲkwa á epsawa elva á Dadaamiya na, dawemda am mága najipu, geni keɗakurkeɗe. Adaba yá de maga názena, ma tá palakurá sera-aara keni, kwá de cenánka ɗekideki na am zamane á kure.»

⁴² Tá degáshe am mashidi ɲanna tara Paul antara Barnabas wá, ta naba ndavaterndáva geni a sarsawa zlaɓe ádaliye am maka na á

de sawa na keni vaci puwansepuwe, geni tá se vaterteva zlaɓe ádalíye waazu ɲanna.

⁴³ Am sarte na tá anƙwa kya emnde baɗemme, kwakya Yahudiya-aha, antara emnde a jeba umele na ta dema an de am nadina á Yahudiya-aha na, ta dǎba tara Paul zlaɓe ádalíye. Daaci tara Paul tá an Barnabas ta vaterte sera á elva-aha kwakya, ta faterem ndzedá am vuwa kwakya geni a gazlarka deƙideƙi, a tsaraatse á ba áte ɲurna na ni a magaternaa Yaakadada.

⁴⁴ Samsa vaci puwansepuwe, saremsa emnde ba kwakya ba seke jarauka am bere deƙideƙi, baɗemme ta se cena ba waazu.

⁴⁵ Ba ta naa dikele á emnde na Yahudiya-aha wá, ta naba fantau ge shelha am ervaunɗe-aatare áte emnde ɲanna. Daaci ba elva na anƙwa á ndahaná Paul na keni, ta maganaa gajawe, ta zlazlese antara ba ire-aara.

⁴⁶ Tara Paul antara Barnabas ta naba sherse ice, a ba itare tá elvan ge itare: «Zlaya geni ɲá sakurán ge kure emtsaade zunɲwe elva á Dadaamiya, amá kwa yanaa ba kure tsawe wá, ɲere zlatanɗerzlala á deza emnde a jeba umele. Emtu mándzawe ázekure Dadaamiya anƙwa á vakurte shifa anwaslire na emtu?

⁴⁷ Cenaucena názu á ndahaná wakita á Dadaamiya; a faɲeraara Yaakadada:

Ya fak geni ká maraterá parakkire-aaruwa ge larde-aha á duniya baɗemme, ká daterná ka elva a lya shifa, ma ge emnde na tá áme keni baɗemme.»

⁴⁸ Ba ta cenaa una ɲanna emnde na ta Yahudiya-aha ka na wá, higa ge itare. Ta

fantau ge gálá Yaakadada adaba elva-aara. Daaci bademme á emnde na ndza tá an dzera áza Dadaamiya ge sha shifa ájwaslire na, garevge emnde a fetarfe.

⁴⁹ Daaci a hyemaa estuwa elva á Dadaamiya am larde ñanna.

⁵⁰ Amá duwa á Yahudiya-aha wá, ta de tsante ervaunđe á male-aha á berni ñanna, antara ñwasha ñganğaha na daremda am nadina á Yahudiya-aha na bademme áte tara Paul antara Barnabas, ta shateru zladá kwakya, ta naba bakaterse am kwara-aatare.

⁵¹ Daaci ta naba papateraahe berbere á haha-aatare áte sera-aha-aatare, ta yateraa áte uk-suwe, ta naba zlala-aatare á dem Ikauniya.

⁵² Amá emnde a fetarfe na tá am Antakiya ñanna wá, baaka lámbe-aatare, tá an naha an Shedekwe Cudedde, higa-aatare ba kela-aara.

14

Tara Paul antara Barnabas am Ikauniya

¹ Am sarte na daraada tara Paul antara Barnabas am Ikauniya, áhuwa keni duksa a de magava ba kalkale antara una ta maganaa am Antakiya. Duwa-aatare á dem *mashidi á Yahudiya-aha, ta de magaa waazu, Yahudiya-aha antara emnde na garevka Yahudiya-aha emnde kwakya fartarfe.

² Amá duwa á Yahudiya-aha na fartareka na wá, ta naba tsante ervaunđe á emnde umele na itare keni zlađe fartareka na, geni a darateránda dágala ge tara Paul.

³ Amá keni hararaaháre jipu am Ikauniya ṅanna, ta kwaraterse elva a Yaakadada á ba an dzaṅdzaṅjire ge emnde. Yaakadada keni a vaterte hákuma, ta magaa nalaama-aha, antara najipu-aha gergere kwakya. A maraterse an una ṅanna geni elva na tá aṅkwa á kwaratersá itare ge emnde áte ṅurna-aara na wá, jirire baḍemme.

⁴ Daaci emnde a ekse tegarsetege gergere buwa. Emnde umele tá am dalbe á Yahudiya-aha, emnde umele keni tá am dalbe á emnde a bela.

⁵ Daaci Yahudiya-aha, antara male-aha-aatare, ira emnde na garevka Yahudiya-aha, baḍemme ta magaa niya-aatare ge ceḅa emnde buwa na ba ḍekideki an nákwá.

⁶ Ba cenarácena una ṅanna, mazla-aara zhagade ge itare á dem Listira, antara Dairbe, ekse-aha ṅanna am haha á Likauniya, antara ekse-aha umele na am kwara ṅanna baḍemme.

⁷ Ta de fantau ge bálá labáre á higa, elva a Yaisu *Almasiihu áhuwa.

Tara Paul antara Barnabas am Listira, antara Dairbe

⁸ Am Listira maa, ndza aṅkwa ura ṅguryekwe wá, á njá á ba am haha, áḍaba an mátsá sera-aha-aara baḍemme. Ta yese ba estuwa, tsamka am zhegela ḍekideki ge zlala, aḍaba ta yáná an mátsá ubiya ba estuwa.

⁹ Vacite umele maa, zhel ṅanna aṅkwa cena waazu á Paul. Slebela ṅanna a zharaa zhel ṅanna wá, a naba diyeddiye ganakini aṅkwa fetarfe á zhel ṅanna ge sha ire-aara.

¹⁰ Daaci a kante kwara-aara á dem zhegela slebela: «Tsetse, tsatse am zhegela,» a ba ñane á elvan ge ñane. Hattse a naba tsete ge zhel ñanna, anjwa á zlala.

¹¹ Naranna dikele á emnde na najipu ñanna, ta naba fu hula á ba an ndzedá, a ba itare an elva a ekse ñanna, amaana elva a Likauniya: Dadaamiya-aha nyairevnye emnde, náwa itare saremsa ásezenere!

¹² Barnabas ta dānaa an dadaamiya-aatare Jaiwus, Paul ñane ta dāhanaa an dadaamiya-aatare *Hairmais adaba ñane edda á ndáhá elva.

¹³ Hele-aatare ñanna tá dāhaná an Jaiwus na wá, ta nderanaa bere áte iga a ekse. Male á hele ñanna tá dāhaná an Jaiwus na, a naba saa dalau-aha tá an cada an ugbene-aha jili gergere, daaci a se tsateraahe áte we á bere á hele ñanna. Male á hele, antara emnde bademme wayarwáyá tá cebaterá dalau-aha an cada na ge tara Paul antara Barnabas.

¹⁴ De cenarāncena una ñanna emnde a bela na, ta naba dzadzaa zane áte vuwa-aatare, ta duhe á dem dāgave-aatare á ba an zhagade, ta kante kwara, a ba itare tá elvan ge itare:

¹⁵ «Ŋa baa ba kure dawalaa na: Kwá magán ge uwe jeba una? Ábi ñere ña emndimagwaha ba seke kure. Ñere ña sakuraa labáre á higa geni kwa yánya hele-aha ñanna, adaba baaka nampire-aara. Lyauvalya elva á Dadaamiya á jirire na á fá shifa am ura na. Ñane wá, a nderanaa ñane samaya, antara haha, antara yawe-aha bademme, ira názu am huđe á duksa-aha ñanna bademme.

16 Werre wá, Dadaamiya a yaa emnde bademme, ma emnde-ara keni ndza tá d̄aba ba un̄jule-aatare.

17 Ba werre ṅanna keni wá, Dadaamiya ndza aṅkwa á maraterse ire-aara ge emnde an slera á maggwire na aṅkwa á maganá ṅane. Aṅkwa á hyakurá yawe á sá am samaya, á vakurte slak-slakire geni kwá sanaasa duksa-aha á kure an sarte-aara, aṅkwa á zakuru náza za, á vakurte higa am ervaun̄de, bademme ba Dadaamiya.»

18 Waazu ṅanna bademme demda tsa am hyema-aatare, aley ta piyaterante ba zlahhe ge kyula emnde a βela na.

19 Am iga-aara maa, ta sem ge Yahudiya-aha á sa am Antakiya am haha á Pisidiya, antara á sa am ekse á Ikauniya, ta se tsanta itare ervaun̄de á emnde bademme áte Paul. Daaci emnde bademme ta naba gwarhe ge Paul ge dzaganá an nákwá, ta tedese á dem iga a ekse, ta kurken emtsamtsa.

20 Amá de jarammejáhá emnde a fetarfe arge ṅane wá, a naba tsetehe, ta dema am huđe á ekse antara ba ṅane. Makuralla-aara ta naba zlala-aatare antara Barnabas á dem Dairbe.

Tara Paul antara Barnabas eptsareptsá á sem Antakiya am Pisidiya

21 Tara Paul antara Barnabas magarnaamaga waazu á labáre á higa, elva a Yaisu am ekse á Dairbe, emnde kwakya fartarfe. Am iga-aara maa, ta eptsehe á sem ekse á Listira, antara Ikauniya, lauktu saraasa á sem Antakiya am Pisidiya.

²² Ta se faterem ndzedá am vuwa kwakya ge emnde a fetarfe am ekse-aha ñanna. A ba itare tá elvan ge emnde a fetarfe: Sey mi bashubáshe zladá-aha kwakya emtsaade, lauktu mi demda á dem zlanña á Dadaamiya.

²³ Bademme a ekse na ta dema itare, ta de shaa emnde a fetarfe, lauktu tá zlalá wá, tá dzeraterá emnde a sawari á ba am dagave-aatare ñanna, tá tsufa ndera, tá magaterar maduwa ge emnde ñanna, daaci tá yaterya am erva a Yaakadada na ta fetaara itare áte ñane na, itare tá zlalá-aatare.

²⁴ Ta degashe praatte am haha á Pisidiya, tá magán ba estuwa, daraada á dem haha á Pamfiliya.

²⁵ Ta de ndaterhe elva á Dadaamiya ge emnde am ekse á Pairge, daaci kwaye ta zlala á dem Ataliya.

²⁶ Tsante áhuwa wá, ta zlalá an paare á yawe á dem Antakiya. Ekse ñanna wá, ekse na ndza ta yateraa am erva a Yaakadada, geni á magaterá ñgurna á mága slera na a fateraara ñane na. Slera ñanna una magarnaamaga, saraasa na.

²⁷ Saraasa am Antakiya maa, ta se jemaa emnde a fetarfe, ta ndaterhe názena a maganaa Dadaamiya an itare bademme, antara baráma na a weratertaa Dadaamiya ge emnde a jeba umele, ganakini itare keni a fartarfe áte Yaisu.

²⁸ Njarinja áhuwa ñanna, hararaaháre jipu áza emnde a fetarfe.

15

Jáháva yaikke am Urusaliima

¹ Ta duhe ge emnde umele á da am Yahudiya ta dem Antakiya, ta de kwaraterse elva na ge emnde a fetarfe na tá áhuwa. A ba itare tá elvan ge itare: «Máki dakuremka am shedfekwe áte una a ndaanaa *tawraita a Muusa wá, kure kwá taa enzleska đekideki.»

² Amá eksararka tara Paul antara Barnabas tsáha ɲanna đekideki. Daaci njaanja gajawe yaikke am dágave-aatare arge elva ɲanna. Am iga-aara maa, itare bađemme ta dema am sawari palle, geni a darduwa tara Paul antara Barnabas, ira emnde umele á dem Urusaliima a de ndarndáhá elva ɲanna antara emnde a bela, ira emnde a sawari á aiklaisiya áhuwa.

³ Daaci ta belateraa estuwa emnde a fetarfe. Am shula-aatare maa, ta kyaa ba huđe á Finikiya, antara huđe á *Samariya praatte, tá anƙwa á ndaater ge emnde a fetarfe átira zlala, geni emnde a jeba umele keni fartarfe áte Dadaamiya. Una ɲanna a vaterte higa ge emnde a fetarfe bađemme.

⁴ Daraada am Urusaliima, lyaratervaalya emnde a bela, antara emnde a sawari á aiklaisiya, ira emnde a fetarfe bađemme. Daaci tara Paul ta fantau ge ndaater názu a maganaa Dadaamiya an itare bađemme.

⁵ Amá ta tsetehe ge Yahudiya-aha umele, ta emnde á *Farisa-aha, fartarfe tsa, amá a ba itare: Emnde a fetarfe na garevka Yahudiya-aha na wá, sey tá puwaterpuwa bađemme á dem shedfekwe, tá ndaaterndáhá sey tá đaba *tawraita a Muusa.

⁶ Jarammeja emnde a bela, antara emnde a sawari á aiklaisiya, itare ta njar ge ndáhá elva ɲanna zlađe ádalije.

⁷ Shekwaraashekwa arge elva ṅanna, am iga-aara a tsete ge Piyer, a ba ṅane á elvan ge itare: «Ya baa ba kure egdzar mama-aha-aaruwa: Ba kure keni diyakurdiya ganakini Dadaamiya a eksise vateneka ge daterá labáre á higa ge emnde a jeba umele, geni itare keni a cenarvaacena, a fartarfe.

⁸ Am Dadaamiya ṅane diyaadiya ervaunḡe á emnde, a naba vaterte Shedekwe Cufedḡe ba seke una a vamite ge miya na wá, ba ganakini lyatervaalyire.

⁹ ṅane magaaka gergerire ḡekideki am dágave á miya antara itare, a baraterse ervaunḡe adaba fartarfe.

¹⁰ Labára kure kwá faterar gwatame á *tawraitá na kwaye am eggye-aha a miya, sem zamane á miya keni, ba palle á ura a dzegwándzegwa baaka na? Kwá tataya názu am huḡe á Dadaamiya emtu?

¹¹ Ba miya keni am salikataliya na wá, famitarfe áte Yaakadada Yaisu, geni a lyamisaa á ba adaba ṅgurna-aara ba seke itare.»

¹² Emnde am jáháva bademme ḡarude tseri-iyé, ta cená ba tara Paul antara Barnabas mazla-aara, tá ndaater nalaama-aha, antara najipu-aha na a maganaa Dadaamiya á kya erva an itare am dágave á emnde a jeba umele.

¹³ Zlarnaazle itare elva-aatare bademme, a eksante elva Yakuba, a ba ṅane á elvan ge emnde: «Cenaucena egdzar mama-aha-aaruwa:

¹⁴ Náwa mi cenáncena a ndaamindáhá Simaun bademme, ganakini Dadaamiya aṅkwa

á fateru hyema ge emnde na garevka Yahudiyaha kwaye am fantaufe á fetarfire, a dzeresaa ba nane emnde na, geni tá de gev emnde-aara.

¹⁵ Elva nanna wá, tá zlaláva antara elva-aha na ndza ta ndaanaa nabi-aha na. Adaba a ba wakita á Dadaamiya:

¹⁶ Am iga á una nanna wá, watse yá sawa, a ba Yaakadada. Yá se tsatsanaatsatse lákwá á há á *Dawuda na bademme. Ma haraare badza-aara keni, yá se tsatsanaatsatse bademme,

¹⁷ lauktu emnde umele tá de shantaushe ge tate á Yaakadada, ba estuwa ge emnde a larde-aha umele na a d'atersaa nane am duniya bademme.

¹⁸ Kwaya nane názu a ndaanaa Yaakadada, edda una a sansaa nane vateneka duksa-aha nanna.»

¹⁹ Daaci a eksante elva-aara adaliye Yakuba, a ba nane: «Áte ya wá, magaumika názena ni watse á vaterte shunḡula ge emnde a jeba umele na ta sem sera á Dadaamiya.

²⁰ Amá mi puwatertepuwa nalmesheri, mi ndaaterndáhá a zarka hyuwa na ta icanante ge hele, una nanna harám; a magarka gwardzire, a zarka uzhe, antara ma hyuwa-ara keni má icaaka.

²¹ Adaba kwaye am zamane-aha na dedde na emnde tá anḡwa á bálá waazu am *tawraita a Muusa am ekse-aha gergere, tá anḡwa enndáhá ba kelaa vaci puwansepuwe.»

Nalmesheri na ta belanaa aiklaisiya-aha á Urusaliima á dem Antakiya

²² Am iga á una ñanna maa, emnde a bela, antara emnde a sawari á aiklaisiya, ira emnde a fetarfe bademme, njarantenja ganakini tá dzeresedzere emnde am dágave-aatare, tá jatermaare antara tara Paul tá an Barnabas, tá belaterá á dem Antakiya. Daaci ta dzerese tara Yahuda Barsabas antara Silas. Bukerde-aatare ta ba emnde na tá an dárádza áza emnde a fetarfe bademme.

²³ Daaci ta puwete nalmesheri na, ta belaterbela an ñane. A ba itare am nalmesheri ñanna:

«Wakita na ña puwetaa ba ñere emnde a bela, antara emnde a sawari á aiklaisiya, ña egdzar mama-aha a kure, ñá ankwá á gakur use á ñere ge kure emnde a fetarfe na kwá am Antakiya, am Siriya, antara am Silikiya.

²⁴ Cenañeráncena ganakini de sharakursha emnde á ñere umele, ta de fakurma am dzámá ire, antara shunñula an elva-aha-aatare, amá ñere wá, baaka we á ñere am hude-aara ta duwa ba itare.

²⁵ Adaba una ñanna, náwa ña dzerese emnde na ña diyatersaa ñere áte ye á ñere palle, tá ankwá duwa antara tara Paul tá an Barnabas ádeze kure.

²⁶ Ba tara Paul antara Barnabas na ta yá shifa-aatare bademme ge mága slera á Yaakadada Yaisu *Almasiihu na.

²⁷ Kwaye ñá belá tara Yahuda antara Silas ádeze kure, tá de palakurnaapálá itare názena ña puwetaa am nalmesheri á ñere, we-aatare una, we á kure keni una.

28 Namaari á Shedekwe Cufedfe, antara ñere wá, njanerantenja ganakini njá fakurarka duksa umele, hyaahya ba una náwa ñane na; adaba degdega ba ñane:

29 Kure wá, zauka hyuwa na má ta icante ge mága hele, zauka uzhe, zauka hyuwa na má icaranteka an ica na, magauka gwardzire keni. Má tsufakurtetsufa ire á kure am una-aha ñanna wá, magakurnaa-maga duksa shagera. Á jámimá shifa!»

30 Daaci ta vaterte nalmesheri na ge emnde na ta dzeratersaa itare na, ta faterte áte baráma á Antakiya. Daraada áhuwa maa, ta de jemaa emnde a fetarfe bademme, ta vaterte nalmesheri ñanna.

31 Am sarte na ndarsendáhe nalmesheri ñanna, elva ñanna zlavanaazlava ervaunde-aatare, a faterem ndzedá kwakya am vuwa.

32 Tara Yahuda antara Silas ta kwaraterse elva kwakya, adaba itare an ire-aatare keni ta nabi-aha. Farateremfa ndzedá, antara midalire kwakya am vuwa.

33 Daaci hararaare cekwa áhuwa. Am sarte na tá sa maa, ta puwatersehe ge egdzar mama-aha-aatare emnde a fetarfe, ta yekateru mága shula an hairire áseza emnde na ta belaterbela na. ((

34 Amá á njá áhuwa á ba Silas.))

35 Tara Paul antara Barnabas wá, hararaare am Antakiya ñanna. Itare antara emnde umele ta ba kwakya ta kwaraterse elva a Yaakadada ge emnde, ta magaa waazu baaka zlakte-aara.

Tegava á tara Paul antara Barnabas

³⁶ Haraare cekwaangudfi wá, a ba Paul á elvan ge Barnabas: «Eptsamiptsa á dem eksa-aha na mi balese elva á Yaakadada am hufe-aara na, mí de zhárá egdzar mama-aha a miya ma ta estara keni.»

³⁷ Ane, a ba Barnabas, amá ñane wá, á kátá á ñabaterdába Yuhanna Markus keni.

³⁸ Una ñanna eksaaka ire á Paul, adaba ndza yaterya dawale ñanna am Pamfiliya, zlanaaka slera ñanna antara itare.

³⁹ Daaci jammeka elva-aatare. Adaba una ñanna ta naba tegava áhuwa. Barnabas a eksante Markus ñanna antara ñane, ta dema am paare á yawe, kwaye ta zlala á dem Kiprus.

⁴⁰ Paul wá, ñane a eksese Silas. Emnde a fetarfe ta yateraa am erva á Yaakadada an maduwa, ganakini á magaternaamaga ñgurna ge mága slera-aara, lauktu ta zlala.

⁴¹ Itare keni ta de kyá hufe á Siriya, antara hufe á Silikiya praatte, ta de faterem ndzedá am vuwa ge emnde a fetarfe áhuwa.

16

Tara Paul ta eksetaa Timaute ge ja d'aba kerde

¹ Daaci daraada tara Paul am Dairbe, antara am Listira, ta de bera ura fetarfe umele áhuwa, zhera-aara Timaute, emmenjara mukse Yahudiya slefetarfe. Amá eddenjara wá, ura Yunaniñkau.

² Bademme á emnde a fetarfe na tá am Listira, antara Ikauniya, tá zleba ba ñane.

³ Paul á kátá eksante Timaute ñanna am dágave-aatare tá ja d'aba kerde. Daaci a eksante, amá a belema am shedekwe emtsaade,

aɗaba ice á Yahudiya-aha. Aɗaba Yahudiya-aha na tá am ekse-aha ɲanna baɗemme diyardiya ganakini Timaute egdza a zhel Yunaniŋkau.

⁴ Daaci baɗemme a ekse na má ta demá itare, tá aŋkwa á ndaater elva na ta tsanaa emnde a bela, antara emnde a sawari á aiklaisiya á Urusaliima na, ganakini itare keni a magarmága fesarfire áte elva ɲanna.

⁵ Aɗaba una ɲanna, emnde a fetarfe baɗemme sharánsha ndzedá, ma emnde na tá áme keni ba kelaazare tá far ba sága.

Paul shansha wahayu am Terauwas

⁶ Am iga a una ɲanna maa, tara Paul tá kátá de bálá elva á Dadaamiya am haha á Aziya wá, a naba piyaterge ge Sheɗekwe Cudɗeɗe. Aɗaba una ɲanna, kwaye ta cikante á dem Firigiya, antara Galatiya.

⁷ Tsante áhuwa, tá kátá dem haha á Bitiniya. Ba daraada átevgé Miziya wá, dawmbarka á ba Sheɗekwe á Yaisu.

⁸ Daaci ta desa am Miziya ɲanna praatte, kwaye ta dem Terauwas áte we á háye yaikke.

⁹ An vayiya wá, shansha wáháyu Paul. Á zhára ba zhel Makiduniya á tse, a ba zhel ɲanna á elvan ge ɲane: Tásle á ɲa sawa ásehuna, sawa melanjerumele am Makiduniya.

¹⁰ Am iga a wáháyu ɲanna wá, ɲa magaa niya ba watsewatse ge dem Makiduniya ɲanna, aɗaba diyaŋerdiya ganakini ba jirire á ɗaháŋerá ba Dadaamiya ge daterá labáre á higa ge emnde na tá am haha ɲanna.

Lidiya fetarfe áte Yaakadada am Filipi

¹¹ Daaci ba tse á ñere am Terauwas, ña demá am paare, kwaye ña de tsekwa am haha á Samautaras am dágave á haye. Makuralla-aara ña tsetehe, ña de tsekwa am ekse á Niyapauli.

¹² Tsante áhuwa wá, ña de tsekwa á ba am Filipi, berni am dalbe á zuññwire am haha á Makiduniya. Una ñanna berni na tá kwaraná emnde a Rauma kwakya-aara am haha á Makiduniya bademme. Harañeraaháre jipu am ekse ñanna.

¹³ An vaci puwansepuwe maa, ba zlálá á ñere á dete iga a ekse, á dete we á guwa. Adaba ñá an tama ganakini watse ñá de shá tate na tá maga maduwa Yahudiya-aha átekwa. Ba jirire wá, ña de bera jarammeje ñwasha-aha-aatare. Ña njehe ázetare, daaci ña vaterte egdza elva.

¹⁴ Ankwa palle á ñwasha ñanna zhera-aara Lidiya, mukse ñanna á tsakala baukta kyanñe zlazlada gane-aara, kwaye a sawa á sá am Tiyatira. Ñane demda am nadina á Yahudiya-aha. Daaci a fantau ge cena elva na ankwa á ndaaná Paul na, Yaakadada a vante enkale geni a cenvaacena ba shagera, a lyevaalya.

¹⁵ Am iga-aara maa, ta maganaa baptisma, ñane antara emnde na tá am huđe á há-aatare bademme. Daaci a ñañerte á dem mbá-aara, a ba ñane: «Máki ba jirire ganevge slefetare áte Yaakadada am ice á kure wá, sawmbare á se mbá-aaruwa.» A fañerarhe ganakini sey ñá daada á dem mba-aara.

Tara Paul antara Silas tá am danğay

16 Vacite umele ñá áte baráma a dem tate á ñála Dadaamiya wá, ña naba ja ire antara mukse kwatena, an jini am ñane, amá jini-aara ñanna aṅkwa á baná názena watse á magava á katafke na. Daaci mukse ñanna aṅkwa á saterá nalmane kwakya ge dada-aha-aara.

17 A njanermá am iga mukse ñanna wá, á dabanerá an hula, á baterán ge emnde, a ba ñane: «Náwa emnde na wá, ta emnde a slera á Dadaamiya na Slekse ba ñane palle na, ta se fákuraa áte baráma na watse kwá lyelya shifa á kure átekwa na.»

18 Ma háre wanyara keni á magán ba estuwa. Vacite umele naatenáha am ervaunđe á Paul, a eptsavte á deza mukse ñanna, a ba ñane á elvan ge jini na am ñane na: «Yá ndaaka an zhera á Yaisu *Almasiihu, dedde am mukse na!» Kerten a naba desehe ge jini na am mukse na.

19 Naránna dada-aha á kwatena ñanna ganakini tá shánka duksa áte ñane mazla-aara wá, ta naba ebzaterar ge tara Paul antara Silas á ba am dágave á nalga á emnde, ta tadaterá á deza male-aha á duniya.

20 Emnde a hákuma ñanna wá, ta emnde a Rauma. Ta daterhe á dezetare, a ba itare tá elvan ge itare: «Náwa emnde na itare ta Yahudiya-aha, tá se weshamiya ekse ge miya.

21 Tá se kwarañerse mága duksa na a piyetaa shairiya á miya emnde a Rauma. Njá dzegwánka ñere dába náde-aatare ge itare.»

22 Bademme a nalga na ta gwaterar ba ge tara Paul antara Silas. Male-aha á duniya ta

dzadzaa zane áte vuwa-aatare. Ta bántsa itare: A zarateruze an ja ba shagera.

²³ Zarateruze an ja, ta daterhe á dem bere á danggay, a ba itare tá elvan ge sle-ufa danggay-aha: Ngwadateraangwada ba shagera.

²⁴ Ba a cenaa una nanna sle-ufa danggay, a daterhe á ba á dem huđe-aara am danggay nanna, a de puwaterem sera am degelambuni.

²⁵ Á maga huđe á vayiya wá, tara Paul, antara Silas tá anƙwa á maga maduwa, tá bela láhe, tá gálá Dadaamiya. Danggay-aha-aatare tá anƙwa á eccena.

²⁶ Cekwaangudí wá, njaanja gejava á haha yaikke, antara ba ekte á bere á danggay ga-japtegeja ba n̄arn̄are. Kerten̄ an wárá bere á danggay bademme, tsavaytsavaye na áte erva á danggay-aha palaapala bademme.

²⁷ Ba tsetse á sle-ufa danggay-aha na am háre wá, á zhárá ba we á bere-aha á danggay an wárá bademme. Nane a kurken baaka zhagadarzhagade danggay-aha. A naba tedese masalam-aara am bere, á kátá já ire-aara.

²⁸ Amá a kante kwárá an ndzedá-aara bademme Paul, a ba nane á elvan ge nane: «Jeka ira á na ba dey, n̄ere n̄á anƙwa bademme.»

²⁹ Daaci sle-ufa danggay-aha nanna anƙwa á tataya kárá, zhagade-aara á dem huđe á danggay, a de mbedehe am sera á tara Paul antara Silas, á gyagya vuwa-aara bademme.

³⁰ Daaci a sanse tara Paul á segáshe, a ba nane á elvan ge itare: «Yá maga uwe kina dawalaa, lauktu yá lyelye shifa-aaruwa?»

³¹ Ta ηwanante, a ba itare: «Fetarfe áte Yaakadada Yaisu, ká lyelye shifa á ηa, antara huđe á há á ηa bađemme.»

³² Ta magateraa waazu elva á Yaakadada, antara emnde na tá am huđe á há-aara bađemme.

³³ Á ba an vayiya ηanna, sle-ufa danğay-aha ηanna a sanse tara Paul á segáshe, a barateraa wige-aha á tate a ja na. Ba watsewatse ta naba maganaa baptisma, ta magaternaahe ge emnde na tá am huđe á há-aara keni bađemme.

³⁴ A dálá antara tara Paul á de mba-aara, a de vaterte náza za. Nane, antara emnde-aara bađemme tá anğwa á higa, adaba fartarfe áte Dadaamiya.

³⁵ Weraawera ekse wá, male-aha á emnde a Rauma ta belaa sawji-aha á deza sle-ufa danğay-aha, geni a yaterya emnde na áwayá na.

³⁶ Duwa á sle-ufa danğay-aha á deza tara Paul, a ba ηane á elvan ge itare: «Náwa male-aha ta belaa emnde geni yá belakuraaabelá. Sawesse, zlauzlálá á ba an hairire.»

³⁷ Amá a ba Paul á elvan ge sawji-aha ηanna ta belateraa male-aha na: «Iyau, ta zanjeruhe an ja ba dey áte ice á emnde bađemme, ηere keni ηa ba Rauma-aha miyenne wá, daaci ba shairiya á ηere keni baaka, tá puwáηerá an ila? Una wá, á taa gevka đekideki. A sarsawa ba itare an ire-aatare, tá se puwaηeraapuwa.»

³⁸ Daaci sawji-aha na ta de mbedateru elva á tara Paul, antara Silas ge male-aha na. Ba cenarácena ganakini tara Paul keni ta Rauma-aha na wá, gazlaraagazla jipu.

³⁹ Adaba una ηanna, ta tsetehe á ba an sera-

aatare, ta duhe ádeza tara Paul, ta de slapala ire-aatare emtsaade, lauktu ta saterse. A ba itare tá elvan ge itare: «Taslawa á kure, dawedde am ekse á ñere.»

⁴⁰ Am sarte na saressa tara Paul antara Silas am dangay maa, ta zlala ba suuwe á dem mba á Lidiya emtsaade. Duwa-aatare, ta de bera egdzar mama-aha-aatare emnde a fetarfe, ta faterem ndzedá am vuwa, lauktu ta yáteryá ta zlala.

17

Tara Paul antara Silas am Taisalauniki

¹ Ta desa am ekse á Amfipaulis, antara Appaulauniya praatte, lauktu ta dem Taisalauniki. Ankwa *mashidi á Yahudiya-aha am ekse ñanna.

² Am mbasmba vuwa-aara ge Paul, ma áme keni á magán ba estuwa, a dem mashidi ñanna. Maka keye ankwa á duwa ba kelaa vaci puwansepuwe, tá ankwa á ndaha elva a názu am wakita á Dadaamiya antara emnde na tá áhuwa.

³ Ankwa á palateraa maana-aara Paul, ankwa á ndaaterndáhá bademme geni názu á ndaaná wakita wá, sey *Almasihu á shushe zladá, á emtsemtsa, lauktu á tsetse am faya. Daaci a ba ñane á elvan ge itare: «Yaisu na yá ankwa á bakurá elva-aara na wá, ñane una Almasihu.»

⁴ Emnde umele am itare lyarvaalya, ta dbete tara Paul, antara Silas. Yunaninkau-aha na daremda am nadina á Yahudiya-aha na keni, kwakya lyarvaalya, ira ñwasha na ankwa dárádza-aatare na.

⁵ Amá Yahudiya-aha wá, jaterja shelha ba kwakya. Daaci ta de jemaa bufari-aha á sa am

hufe á ekse, ta se tsante elva, emnde bademme saresse am bere am hufe á ekse. Duwa-aatare bademme wá, ta de tataya tara Paul, antara Silas am mba á ura umele zhera-aara Yasaun, ge tafaterá á deza male-aha á ekse áte ice á emnde bademme.

⁶ Amá sharáterka tara Paul, antara Silas na, daaci ta tedese Yasaun na, antara emnde a fetarfe umele, ta daterá á deza male-aha á duniya. Ta de icaterar sera á ba an ká kwará áza male-aha na, a ba itare: «Emnde ᵐanna am duniya bademme ᵐaaka tate na de wesharanteka itare elva am hufe-aara, náwa saremsa á sem larde á miya keni!

⁷ Amá Yasaun a naba vaterte slede am mba-aara! Bademme-aatare na itare ᵐabarka shairiya-aha á Kaysariya, slekse yaikke na dekideki. Ta bántsa itare: Anᵑwa slekse umele zlaᵑe ádaliye yaikke, zhera-aara Yaisu.»

⁸ Elva ᵐanna a tsante ervaunᵑe á male-aha, antara emnde a ekse bademme.

⁹ Daaci male-aha á duniya ta hyaterar ge tara Yasaun, antara emnde a fetarfe umele bademme, ganakini sey tá biyaabiya nalmane am ranna, lauktu tá zlála, dem sarte na má zlauzla elva, lauktu ta puwataahe.

Tara Paul antara Silas tá am Bairiya

¹⁰ An vayiya wá, emnde a fetarfe ta danse tara Paul, antara Silas na á dem ekse á Bairiya. Darenda tara Paul am Bairiya maa, ta naba dem *mashidi á Yahudiya-aha.

¹¹ Shagera ba ervaunᵑe á Yahudiya-aha na tá am Bairiya na, arge Yahudiya-aha na tá am Taisalauniki. Itare lyarvaalya elva na tá

aṅkwa á bateránba tara Paul na, dzamarka elva mándzawe dekideki. Ba kelaa wera á ekse tá habaza ba názu am wakita á Dadaamiya, ge slaterá an waazu á Paul máki ba jirire.

¹² Kwakya ba emnde na fartarfe na am dágave-aatare. Nwasha-aha á Yunaniṅkau-aha na tá an dárádza na, antara Yunaniṅkau-aha umele, bademme na fartarfe.

¹³ Amá de cenarácena Yahudiya-aha na tá am Taisalauniki geni Paul aṅkwa á bálá elva á Dadaamiya am Bairiya keni, ta naba sawhe, ta se fantau ge wesha elva, ta tsante ervaunđe á emnde.

¹⁴ Daaci emnde a fetarfe ta danse Paul á dete we á háye, amá tara Silas, antara Timaute wá, njarinja am Bairiya.

¹⁵ Emnde na ta daa Paul á dete we á háye na wá, ta zlalá ba kerđe, ta daa puwanse á dem Ataina. Daaci itare ta naba epts-aatare á sem Bairiya. Ta sawa an elva a Paul, ta se mbedateru ge tara Silas antara Timaute. A ba ṅane á elvan ge itare: «Sawmbare berawibera ba watsewatse máki á gevge.»

Waazu á Paul am berni á Ataina

¹⁶ Am sarte na Paul aṅkwa á ufa tara Silas, antara Timaute am Ataina na wá, wantewa ervaunđe-aara ba kwakya adaba kwakyire á hele-aha na an cepa am ekse ṅanna.

¹⁷ Adaba una ṅanna, aṅkwa á ndaha elva ṅanna antara Yahudiya-aha, ira emnde a jeba umele na ta dema am nadina á Yahudiya-aha na am mashidi-aatare. Ma a shá ba emnde-ara keni,

ma ta jamme áme emnde keni, á de ndaater ba una ñanna ba kelaazare.

¹⁸ Tá anƙwa emnde a nadina umele tá ɗahaná an Aipikauri, umele zlaɓe adaliye tá ɗahaná an Sitauykau, male-aha-aatare keni tá se maganaa gajawe kwakya ge Paul. A ba emnde umele-aatare: Á ndaha uwe kina slenara na? A ba emnde umele-aatare zlaɓe ádaliye: Á ndaha elva á dadaamiya-aha na ta jesaare áñwaslire na. Ta de ndáhá una na wá, aɗaba Paul anƙwa á ndaater waazu á elva a Yaisu, antara tse á emnde am faya.

¹⁹ Aɗaba una ñanna, ta daa Paul á de katafke á zlamáha áte egdza wa-aatare umele anƙwa tá ɗahá an Ariyaupagus. Tate ñanna wá, tate á kyá shairiya-aatare. A ba itare tá elvan ge ñane: «Ndaañerndáhá jirire á tsáha á ña na ka shanaa ka áñwaslire.

²⁰ Aɗaba názu ñá anƙwa á cenáná ázeña na ña wayve-aha-aara, ndza cenaneránka ɗekideki. Amá wá, ñá kátá diyeddiye.»

²¹ Emnde a Ataina, antara wayve-aha-aatare baɗemme wá, itare ta emnde a wáyá cena elva-aha na a jesaara áñwaslire. Ba tá sá una, tá sá una, tá vaha deppe á ba arge elva.

²² Daaci a tsahe ge Paul áte Ariyaupagus-aatare ñanna, a ba ñane á elvan ge itare: «Ekkure emnde a Ataina, ya nánna wáva á kure baɗemme ge mága nadina á kure.

²³ Aɗaba am sarte na yá anƙwa já ɗaba am ekse á kure, ya nánna tate-aha á mága nadina á kure baɗemme. Ya nánna áte tate á ica sadake á kure umele, kwa puwetepuwa, a ba kure: Una

wá, náza a dadaamiya na zlaɓe diyarka emnde na. Daaci Dadaamiya na ni zlaɓe diyakurka tsa, amá kwá anƙwa eɗɗába na wá, yá ndaakur elva á Dadaamiya ɲanna.

²⁴ Anƙwa Dadaamiya a jirire, ba ɲane edda una a nderaa duniya, antara názu am huɗe-aara baɗemme; ba ɲane una Yaakadada á samaya, antara haha, ɲane á njeka am bere-aha na tá nderaná emndimagwaha.

²⁵ Tatayaaka ɲane ma uwe keni áza emndimagwaha ɗekideki. Aɗaba á vatertá ba ɲane duksa ge emndimagwaha, á vaterte shifa, antara duksa baɗemme.

²⁶ Emnde na tá am duniya baɗemme a ndera-ateraa ba ɲane, a saterse á ba am ura palle, a njateraa ba ɲane áte haha na. Lauktu á nderá ba emnde ɲanna keni, kertenj ndza an ɗatsa slede-aha-aatare, antara zamane-aha-aatare baɗemme ázeɲara.

²⁷ Dadaamiya a nderaa emnde wá, ba geni emnde ɲanna baɗemme, tá puwantá erva ba ge ɲane palle, ámbane watse tá shansha. Ge jirire wá, Dadaamiya ba herzhe an miya baɗemme.

²⁸ Aɗaba anƙwa puwartepuwa am wakita-aara, a ba ɲane: Mi shaa shifa aɗaba ɲane, gamiyevge emnde aɗaba ɲane, má anƙwa puwa shifa aɗaba ɲane. Shagera názena ta ndasaa emnde á kure umele am láhe-aatare na. Ta bántsa itare: Nere keni ɲa ba egdzara-aara.

²⁹ «Máki mi egdzara-aara wá, slaslaumika ɗekideki mázla-aara ganakini Eddemiya Dadaamiya seke dindar, antara lipela, bi seke nákwá. Aɗaba duksa-aha ɲanna baɗemme, tá

tsatsaná ba emndimagwaha an enjkale-aatare, daaci tá ganve hele.

³⁰ Haypa-aha na ndza ta maganaa emndu werre wá, Dadaamiya á ñeka am ervaunđe, adaba am sarte ñanna ndza diyarka. Amá kina wá, ankwá á dáhá emnde bademme geni a yarányá haypa-aha-aatare, a magarmága tuba ázeñara.

³¹ Adaba kertenj faafa kwaskwe na ni watse á de kyá shairiya á duniya bademme átekwa na. A eksese edda una ni watse á de kyaná ñane shairiya ñanna á ba an jirire, a tsante edda-aara ñanna am fáyá, ganakini a diyareddiye emnde bademme.»

³² Am sarte na ni Paul ankwá á ndaater elva a tse am fáyá na wá, emnde umele-aatare ta naba puwar dzáká. Amá á ba emnde umele: «Wayañerwáyá ká ndañerndáhá zlafe adaliye vacite umele keni.»

³³ Daaci a naba sesehe ge Paul am dágave-aatare, a zlalehe.

³⁴ Amá wá, tá ankwá emnde na ni ta dábete Paul, de fartarfe. Emnde ñanna wá, tara Diyaunisiyus, ñane palle á emnde a kyá shairiya áte Ariyaupagus, antara mukse umele zhera-aara Damaris, ira emnde umele.

18

Waazu á Paul am Kaurintus

¹ Am iga-aara maa, a tsete ge Paul am Ataina, kwaye a zlálá á dem Kaurintus.

² Ta de puwa ba já ire antara zhel Yahudiya umele zhera-aara Akilas, ta yanaa am haha á

Pauntus. Njane keni zlaɓe ba uŋŋule a sá-aatare á sa am haha á Italiya tá antara mukse-aara Piriskila. Adaba a bántsa male á larde á Rauma, zhera-aara Kalawdiyus: A nanánka Yahudiya-aha am haha á Rauma d'ekideki. Am iga a já ire-aatare ŋanna maa, a duhe ge Paul á dezetare,³ a de berater tá aŋkwa á maga ba saniya na á maganá ŋane. A diya ba njá antara itare, ta magaa slera-aatare átirpalle. Amaana: Bere-aha á kacakaca.

⁴ Ba kelaa vaci puwansepuwe, Paul á shateru ba labáre á higa ge Yahudiya-aha, antara Yunaniŋkau-aha na tá am nadina á Yahudiya-aha na, geni itare keni a fartarfe.

⁵ Amá am sarte na daraada tara Silas, antara Timaute á dem Makiduniya wá, Paul maga-aka slera umele mázla-aara, a yaa sarte-aara bademme ba ge bálá waazu, aŋkwa á ndaater-ndáhá jirire-aara bademme ge Yahudiya-aha, ganakini ba Yaisu una *Almasiihu.

⁶ Amá Yahudiya-aha lyiyarka elva-aara, ta zla-zele antara ba ire-aara keni. Adaba una ŋanna, Paul a naba hyadfaa erva-aara áte itare, a ba ŋane: «Máki kedakurkedá watse kwá diyeddiya ba kure, á shiyaka ya mazla-aara. Kina wá, yá zlála á deza emnde a jeba umele.»

⁷ A yateraa estuwa Paul, a zlála á de tataya bere á mága waazu-aara am mba á ura umele zhera-aara Titus Yustus, ŋane am nadina á Yahudiya-aha, há-aara ba herzhe an *mashidi á Yahudiya-aha ŋanna.

⁸ Kirispus, ŋane *liman na á maga slera am mashidi ŋanna, ŋane antara huɗe á há-aara

bademme fartarfe. Emnde a Kaurintus na cenarácena waazu á Paul na, itare keni kwakya fartarfe, magarateraamaga baptisma.

⁹ Vacite umele an vayiya wá, Paul a naba shaa wahayu. A ba Yaakadada á elvan ge ñane: «A wanka lyáwá ðekideki! Emmága slera á ña, ðuka ðekideki, naba ndaaterndaha.

¹⁰ Baaka ura á de fá erva áte ka ðekideki, adaba iya yá aṅkwa antara ka. Emmága slera, adaba kwakya emnde na tá átuge iya am ekse na.»

¹¹ Paul a magaa sakanderi an kyalma am Kaurintus, aṅkwa á kwaraterse elva á Dadaamiya ge emnde.

¹² Am zamane á sleksu Galiyau ta fanaa emnde a Rauma, ñane slekse yaikke am kwara á Akaya bademme wá, Yahudiya-aha ta naba gwarhe ge Paul, ta daná á dem shairiya.

¹³ A ba itare tá elvan ge sleksu Galiyau: Náwa zhel na aṅkwa á kwaraterse ñála Dadaamiya ge emnde, amá gergere antara una am *tawraitá.

¹⁴ Paul keni á kátá ndaha elva, a naba cuvaa ge slekse zunṅwe, a ba ñane á elvan ge Yahudiya-aha ñanna: «Ma andze a magaa mandzawire, bi haypa umele yaikke wá, ma andze yá cenakurvaacena Yahudiya-aha-aaruwa.

¹⁵ Amá una ba gajawe á kure áte elva-aha, antara zhera-aha, ira tawraitá na wá, una ba elva á kure, kyaukya ba kure duksa á kure, iya yá kyeka shairiya á jeba á elva-aha ñanna.»

¹⁶ Daaci a naba ṅgyaterse á segashe am bere á shairiya.

17 Ba segashe-aatare wá, ta se ba dar ge Saustainais ba *liman á Yahudiya-aha-aatare tsa áte ice á emnde bademme, á ba am tate á shairiya nanna. Amá baaka lámbe á sleksu Galiyau dekideki.

Eptsa á Paul á sem Antakiya

18 Á ba am iga á una nanna keni, Paul haraare zlaɓe ádaliye kwakya áza emnde a fetarfe am Kaurintus, lauktu a yaterhe, a zlála. Daaci ta zlála antara tara Akilas, tá antara mukse-aara Piriskila, ta dem Kaiṅkairiya. Paul a de sehese ire áhuwa, adaba ndza a maganaa *waada ge Dadaamiya. Tsante am ekse nanna maa, ta dema am paare á yawe, ta zlalá á dem Antakiya am haha á Siriya.

19 Daraada am Aifaisus wá, Paul a dem *mashidi á Yahudiya-aha, a de ndaha elva kwakya antara itare, áte názena am wakita á Dadaamiya.

20 Ta nála Paul kwakya áhuwa, ganakini a haraare ázetare, amá kwalevkwale Paul.

21 Daaci a naba yaterhe, amá a ba nane á elvan ge itare: «Má wayetewáyá Dadaamiya wá, watse yá eptsa zlaɓe ádaliye áseze kure.» Daaci tsanta am Aifaisus nanna wá, Paul a yaa tara Akilas, antara mukse-aara Piriskila áhuwa mazla-aara, nane a dema am paare á yawe, a zlalá á de katafke.

22 De tsekwaatsekwa Paul am Kaysariya, a zlalá á ba á dem Urusaliima emtsaade, ge de gater use ge emnde a fetarfe, lauktu a dem Antakiya.

23 Shekwaashekwa cekwaangudi maa, a tsetehe zlabé ádaliye, a de jem dába praatte am hufe á Galatiya, antara Firigiya, a de faterem ndzedá am vuwa kwakya ge emnde a fetarfe bademme.

Waazu á Apaulaus am Aifaisus, antara am Kaurintus

24 Am sarte nanna maa, samsa zhel Yahudiya umele á sawa am Alaikzandriya, á sem Aifaisus, zhera-aara Apaulaus. Nane an hákuma á ndáha elva jipu, diyaadiya názu am wakita á Dadaamiya keni.

25 Kwakya diya-aara áte baráma a Yaakadada, vuwa-aara wayaawáyá jipu ndáhá elva á Dadaamiya. Ankwa á kwaraterse elva ge emnde áte Yaisu á ba an unjule-aara, amá wá, nane a dise ba baptisma na ndza a maganaa Yuhanna.

26 Daaci ankwa á maga waazu-aara ba estuwa an baakire á lyawa am *mashidi á Yahudiya-aha. Vacite umele cenarvaacena waazu-aara tara Akilas, antara mukse-aara Piriskila, ta naba dante á dem mba-aatare, ta de palannaache zlabé ádaliye jirire á elva á Dadaamiya jauje ba ge una a disaa nane.

27 Am iga-aara maa, Apaulaus a magaa niya a dem Kaurintus am haha á Akaya. Emnde a fetarfe na tá am Aifaisus ta fanem ndzedá kwakya am vuwa, adaba ta puwaterte nalmesheri ge emnde a fetarfe na tá am Akaya, ta vante am erva ba ge nane geni a lyarvaalya ba shagera am dágave-aatare. Daada-aara áhuwa maa, Dadaamiya a de maganaa ngurna, a de melateru kwakya ge emnde a fetarfe.

²⁸ Adaba a de ndaaterse wakita á Dadaamiya ge Yahudiya-aha, a palaternaahé ba shagera ganakini ba Yaisu una *Almasiihu, a haslater-aahe á katafke á emnde baɗemme, dzegwaránka ba wera we keni.

19

Waazu á Paul am Aifaisus

¹ Am sarte na Apaulaus anƙwa am Kaurintus na wá, Paul a jem ɗaba am wa-aha á kwára ɗanna praatte, kwaye a de tsekwese á dem Aifaisus. A de shaa emnde a fetarfe umele am Aifaisus ɗanna,

² a ndavateruhe, a ba ɗane á elvan ge itare: «Am sarte na ni fakurtarfe na, shakuránsha emtu Shedekwe Cudedɗe?» Ta ɗwanante, a ba itare: «Ba ganakini anƙwa Shedekwe Cudedɗe keni diyanerka ɗere.»

³ A ba Paul á elvan ge itare: «Ndza ta magakuraa jeba á bapɗisma-ara kena?» A ba itare: «Ɗere ɗa shaa bapɗisma na ndza a kwaratersaa Yuhanna ge emnde na.»

⁴ A ba Paul á elvan ge itare: «Bapɗisma á Yuhanna wá, náza á emnde na tá kátá mága tuba arge haypa-aha-aatare. Adaba a ba Yuhanna á elvan ge *Iserayiila-aha: Fawtarfe á ba áte edda una watse á sawa am iga-aaruwa na. Amaana: Yaisu.»

⁵ Cenarvaacena una ɗanna, daaci ta lyevaa bapɗisma an zhera á Yaisu.

⁶ Daaci Paul a puwataare *erva a barka áte ire-aha-aatare, a naba tsekwaa ge Shedekwe

Cudfedde á sete itare. Ta fantau ge ndáhá elva-aha áŋwaslire, antara mága nabiyire bademme.

⁷ Kezлакula á emnde ɲanna ta kelaawa ju buwa.

⁸ Am huɖe á tere keye ɲanna, Paul á málá ba sera á dem *mashidi á Yahudiya-aha ba kelaa kwaskwe á puwansepuwe. Aŋkwa á ndaater elva á Dadaamiya á ba an dzaŋdzaŋire ge emnde, aŋkwa á palaterá elva a dem *kwara á Dadaamiya an hákuma ge emnde na tá á katafke-aara.

⁹ Amá emnde ta maganaa degdegire á ire ge Paul, liyarka waazu-aara ɖekideki, baira ta valyesaa elva na zlayeka ɖekideki na áte elva a ɖába baráma á Yaakadada. Adaba una ɲanna, a yáterhe ge Paul, a dzerese emnde na fartarfe na, a zlála antara itare á dem bere á Tiranus, bere á háya ge ndaha láyá am huɖe-aara. Aŋkwa á shateru waazu ba kelaazáre am bere ɲanna.

¹⁰ Yawe buwa kalkale aŋkwa á magán ba estuwa Paul, haa Yahudiya-aha, antara emnde a jeba umele na tá am kwara á Aziya bademme cenarácena elva á Yaakadada.

Labáre á egdzara á Sikaiwas, antara ndzedfa á Dadaamiya

¹¹ Dadaamiya a magaa najipu-aha na ndza magaaveka ɖekideki na á kya erva an Paul.

¹² Ta dateraa ba nanɣyuwe na a tsekwemaa Paul, antara nalbuta-aara na á hálá ɲgudɖeffire an ɲane ge emnde na tá lapika-aha, mbarembe bademme. Emnde na ndza tá an shaitaine keni, saresse shaitaine-aha ɲanna am vuwa-aatare.

¹³ Am sarte ṅanna maa, tá aṅkwa Yahudiya-aha umele tá ṅgyá jini-aha am emnde, tá aṅkwa á já ḍaba ma á deme keni. Daaci itare keni ta naba tápá ṅgyá jini-aha am ura an zhera á Yaisu. A ba itare tá elvan ge jini-aha: «Ŋá aṅkwa ndaakur an zhera á Yaisu na Paul aṅkwa á ndáhá elva-aara na: Dawedde.»

¹⁴ Emnde a mága una ṅanna wá, ba egdzara á limán Sikaiwas, ṅane male á *liman-aha. Egdzara-aara ṅanna ta vuye.

¹⁵ Amá a ṅwaterante ge jini, a ba ṅane: «Diyandiya ya Yaisu. Paul keni diyandiya baḍemme, amá kure mu kwa emnde-ara?»

¹⁶ Zhel na an shaitaine ṅanna a naba slakalemhe am itare an ndzedá-aara baḍemme, jateruje an ndzedá baḍemme-aatare, ta ṅezlese ire-aatare ba zlahhe á segáshe am mba-aara an ukhyiye dey, ta zlálá an ververe kwakya áte vuwa-aatare.

¹⁷ Emnde a Aifaisus baḍemme, Yahudiya-aha, antara emnde a jeba umele baḍemme cenarácena labáre ṅanna, dámnda lyawa am vuwa-aatare baḍemme. Fantau á ba am sarte ṅanna wá, emnde ta faa zherwe jipu áte zhera á Yaakadada Yaisu.

¹⁸ Emnde a fetarfe kwakya ta magaa tuba á katafke á emnde baḍemme arge slera á Shaitaine na ndza ta mazlanaa itare am erva-aha-aatare.

¹⁹ Emnde na tá an wakita-aha-aatare na á kwaraterse mága duksa an hákuma á Shaitaine kwakya saransese á segáshe, ta epshehe an kárá áte ice á emnde baḍemme. Ta magaa lisaafi á gáne á wakita-aha ṅanna wá, gursa debu kul ilyebe.

²⁰ A zanaa estuwa elva a Yaakadada slede á ba an ndzedá, emnde bademme naránna ndzedá á Dadaamiya.

Elva yaikke na a tsetaa am Aifaisus

²¹ Am iga á labáre nanna maa, Paul a magaa niya a dem Urusaliima, á kyá huđe á haha á Makiduniya, antara haha á Akaya. A bántsa nane: Máki danaada am Urusaliima wá, sey yá de zhárá berni á Rauma keni.

²² Daaci a belaa emnde a melanumele buwa á katafke-aara, tara Timaute, antara Airastus, ta desaa itare zunḡwe á katafke-aara ge dem Makiduniya. Amá Paul an ire-aara wá, a shek-waawe zlaḡe adaliye cekwaanḡudí am kwárá á Aziya.

²³ Á ba am sarte nanna, tsetsa elva yaikke am Aifaisus áte elva a baráma á Yaakadada.

²⁴ Anḡwa edda egzla umele zhera-aara Daimaitriyus, nane á já egdzar bere-aha an lipela, gáráva á bere á dadaamiya á emnde a Aifaisus, tá daháná an *Artaimis, ba seke gáráva á mukse, a ba itare. Daaci nane antara emnde a slera-aara tá anḡwa á shá nalmane kwakya.

²⁵ A jemaa emnde a slera-aara nanna, antara emnde umele na tá anḡwa á maga jeba á saniya nanna bademme, a ba nane á elvan ge itare: «Ya baa ba kure dawalaa: Yá tamaa baaka ura am miya diyaaka ganakini saniya á miya na wá, a gedamitaa ba nane.

²⁶ Amá ba kure an ire á kure keni zharauzhara emtsaafé názena anḡwa á maganá zhel nanna

tá d'aháná an Paul na? A bántsa ñane: Duksa-aha na tá jáná ba emndimagwaha an erva-aatare ni tá kezlater ugjehe! Aley anjwa á dzegwardzegwe, ad'aba emnde kwakya lyarvaalya elva-aara, á tsaaka an emnde a Aifaisus áhuna, amá dem haha á Aziya keni kwakya ba názena lyavaalya elva-aara.

²⁷ Máki estuwa wá, zhel ñanna á badzamiyan-vebadze saniya á miya na. Á tsaaka an una ñanna, ba bere yaikke, bere á dadaamiya á miya *Artaimis na má anjwa á kezlan ugje na keni, watse baaka ura á de d'emed'fema mázla-aara. Ba *Artaimis an ire-aara na emnde a haha á Aziya, antara duniya bad'emme, emnde tá anjwa á kezlan ugje na keni, á de gev duksa ba dey.»

²⁸ Ba cenarácena elva-aha ñanna wá, mberátembera ervaun'fe-aatare ba seke kárá. Ta kante kwárá á dem zhegela, a ba itare: *Artaimis á Aifaisus-aha wá, yaikke.

²⁹ Elva ñanna de gyantegya hu'fe á ekse bad'emme, emnde bad'emme ta de gwaterar ge tara Gayus, antara Aristarkus egdzara á emnde a Makiduniya na tá anjwa á puwa Paul am shula-aha-aara na, daaci ta tad'áterá á ba an zhagade á dem tate á gwagusa yaikke náza á zlamaakelaawa.

³⁰ Á kátá d'abaterd'ába Paul, amá ta naba ñanaahe ge emnde a fetarfe.

³¹ Emnde umele am slakate-aha-aara na ta male-aha am haha á Aziya keni ta belanve we, a ba itare, ba tasle-aara a duka ñane á dem tate á gusa ñanna.

³² Jáháva ñanna weshaptewesha jipu. Emnde

na tá hula á kya una, emnde umele keni tá hulá náza-aatare á kya una, kwakya ba emnde na ni diyarka názu a daterá ádehuwa d'ekid'eki.

³³ Daaci an̄kwa zhel Yahudiya umele zhera-aara Alaikzanderi am jáháva n̄anna, n̄ane wá, emnde umele ta shanu sera á labáre n̄anna bademme, Yahudiya-aha umele tá an̄kwa á hyairhye ganakini a mbedaterumbede elva ge zlamaakelaawa. Daaci Alaikzanderi a katerante erva-aha-aara ge emnde bademme, an̄kwa á magaterá nalaama ganakini a d'arude á ndaater elva.

³⁴ Amá de diyareddiye ganakini n̄ane keni ba ura Yahudiya, ta fantau ge fa hula á ba an elva palle áte we, a ba itare: *Artaimis á Aifaisus-aha wá, yaikke! *Artaimis á Aifaisus-aha wá, yaikke! Á hyephye saa buwa tá an̄kwa á ndaha ba una n̄anna.

³⁵ Am iga-aara maa, a ekhyataraahe zlahhe ge ura-aatare male n̄ane saikeraitair yaikke názá á berni á Aifaisus. A ba n̄ane á elvan ge itare: «Ya baa ba kure, kure emnde a Aifaisus: Am duniya bademme, diyardiya emnde bademme ganakini an̄kwa bere á dadaamiya á miya *Artaimis yaikke, antara gáráva-aara na a eblyaa á sawa am samaya na am berni á miya am Aifaisus, mí ufaná ba miya.

³⁶ Ware edda-aara ni á de bá diyaaka na? Magaumága sawari am ire á kure, magauka duksa máki slakurnaaka ba shagera.

³⁷ Emnde na náwa kwa sateraa á sehuna na, wallá ta ilu duksa am bere cud'ed'ede á miya na bere á *Artaimis ka, wallá ta ndaase elva

mándzawe áte *Artaimis á miya ka, uwe ka.

³⁸ Máki tá anƙwa emnde a dágala á tara Daimaitriyus, antara emnde a slera-aara maa, anƙwa sarte á kya shairiya, male-aha á duniya keni tá anƙwa baɗemme, tá de puwa ugje-aatare, daaci tá kyaternaakya.

³⁹ Ma anƙwa ba duksa umele kwá kataná kure keni, dawánda labáre á kure á deza male-aha vaci jáháva, tá de kyakurnaakya ba itare.

⁴⁰ Amá náza vatena na wá, ba kina mi shansha elva áza male-aha á miya, watse á jauje ge ndzedá á miya. Tá de bamiya anƙwa dugune á kure ba giraara. Aɗaba baaka baráma á miya ge mága duksa estuwa dekideki. Watse á de kamivá ye ba ge miya.»

Daaci a zlnaaha elva-aara áte una ɗanna. Am iga-aara maa, a ba ɗane: Ma ware keni a ezzlála á dem mba-aara mazla-aara.

20

Shula á Paul á dem Makiduniya, antara Akaya

¹ Am sarte na ekhyaakhya elva ɗanna maa, Paul a jemaa emnde a fetarfe, a faterem ndzedá am vuwa kwakya, daaci a magaterá á jámimá shifa, ba zlala-aara ge ɗane á dem Makiduniya.

² A de jem dába praatte am huɗe á haha á Makiduniya ɗanna, a de ndzedaterfe emnde a fetarfe an waazu-aha gergere, lauktu a zlala á dem haha á Akaya.

³ A de magaa tere keye am haha á Akaya ɗanna. Ba ɗane keni maganaamaga niya a dem Siriya an paare á yawe, á cena ba tá anƙwa á eksanvaa sawari Yahudiya-aha ge magante

emtaŋkire. Adaba una ɲanna, a dɓaba ba tate á sawa-aara ɲanna zlaɓe ádaliye á kyá Makiduniya.

⁴ Anƙwa Saupate egdza á Pirus ura Bairiya, ɲane a duwá antara Paul. Zlaɓe ádaliye, antara tara Aristarkus, antara Saikundus, itare ta emnde a Taisalauniki, antara Gayus ɲane zhel Dairbe, antara tara Tikikus tá antara Tau-raufimus, itare ta emnde a haha á Aziya, ira Timaute.

⁵ Emnde ɲanna baɗemme ta desaa itare á katafke á ɲere, kwaye ta de ufaɲeraa am Terauwas.

⁶ Am iga á muɲri á depaiɲ na ɓaaka shahi á makala am huɗe-aara na wá, ɲere keni ɲa dema am paare á yawe am Filipi, ɲa dɓabaterdɓa. Ɗa ga hare ilyeɓe, lauktu ɲa de shateraaha am Terauwas, ɲa de zu hare maka áhuwa.

Paul a hare paɲɲe á maga waazu am Terauwas

⁷ Ɗa jamme an icavaciya ge sebde ge za dɓafa á Yaakadada wá, a ndaanaa Paul elva am jáháva ɲanna. Am diyaadiya ganakini watse á zlála má weraawera ekse, mele yánka waazu mazla-aara, dem huɗe á vayiya keni á maga ba waazu.

⁸ Bere na ɲa jahava am huɗe-aara ɲanna wá, átire ge bere-aha umele, huɗe-aara baɗemme ba kára á fanus-aha.

⁹ Anƙwa egdza dawale, zhera-aara Aiwitikus, ɲane a njanu ge we á fainaiter á bere ɲanna ɲá am huɗe-aara na. Am kwakyafkwakya waazu á Paul, a naba pu hare egdze na jauje ge ndzedá. Daaci a naba mbedeɓe kwaye á sawa átire á

bere ge keyire á sem áhá. Ta de tsante, amá emtsamtsa.

¹⁰ A tsekwehe ge Paul, a de unjmbare ge egdze njanna, a njannaahe an erva-aha buwa, a ba njane: Gazlauka deki, á ba an shifa-aara egdzere.

¹¹ Daaci a eptsehe zlafe adaliye, a d'ala á dem bere njanna, a de kezlanve dafa, ta zuhe. Am iga a dafa keni yanka ndaater elva deki dem segashe á vaciya am haha, lauktu a yaterhe, a zlala.

¹² Egdza dawale na keni ta puwansa á dem mba-aatare á ba an sera-aara, bademme a er-vaunde á emnde ba seke nama adaba njane.

Shula á Paul tsanta am Terauwas dem Milaitus

¹³ Am iga á una njanna maa, nere na dema am paare á yawe, na degasha nere zunjwe á katafke á Paul ge dem Assaus. Adaba a ba njane tsanta ahuna wa, á duwa an sera, á de dema am paare antara nere á ba am Assaus.

¹⁴ De shanjeraasha am Assaus, a de dema am paare antara nere, na zlalá kerde á dem Mitilaine.

¹⁵ Na tsetehe zlafe adaliye ahuwa, makuralla-aara lauktu na de shaa haha á Kiyaus am dagave á haye, na desa am slerpa-aara na vante nazlaba. Wergekse wa, danjeraada am Samaus. Wergekse-aara zlafe adaliye lauktu danjeraade am Milaitus.

¹⁶ Amaana: Na yesaa Aifaisus am iga, adaba magaaka niya a dem ekse njanna, wayaaka á kedanaakeda sarte am haha á Aziya. Njane

á kátá á de maga muṅri á *Pantaikausta am Urusaliima mákini á gevge.

Waazu na a vatertaa Paul ge emnde a sawari á aiklaisiya á Aifaisus

¹⁷ Saṅeraasa am Milaitus wá, Paul a naba belaterve labáre ge emnde a sawari á aiklaisiya á Aifaisus, ganakini a sarsawa ásezeṅara.

¹⁸ Saremsa, a ba ṅane á elvan ge itare: «Ya semaa estuwa á sem haha á Aziya, kure diyaakurdiya nja-aaruwa bademme am sarte na yá am dágave á kure.

¹⁹ Diyaakurdiya slera na ya magannaa ya ge Yaakadada, ámasla an gá ire-aaruwa am slera ṅanna, antara yawe á kyuwa na ta belimá am ice, emtaṅkire na ta magive Yahudiya-aha na bademme.

²⁰ Diyaakurdiya ganakini sheḅanakurvuka názena watse emtake áte kure ba palle keni, ndaanakurndáhá bademme, am zlamaakelaawa, antara am mba-aha á kure keni bademme.

²¹ Ya ndaaterndáhá ge Yahudiya-aha, antara emnde a jeba umele an ndzedfa-aaruwa bademme, ganakini a yaránya mága haypa, a sarsawa á sem sera á Dadaamiya, a fartarfe áte Yaakadada Yaisu.

²² Daaci kina wá, yá aṅkwa dem Urusaliima una laarire áte ya, a binaa Shedekwe Cudedfe geni sey ba yá duwa. Diyanka názu watse á de magava áte ya áhuwa.

²³ Duksa palle ya disaa ya wá: Ba kelaa má de tsekwantsekwa am ekse wá, aṅkwa á ndindaha Shedekwe Cudedfe geni aṅkwa á pakaaka danḡay, ká de shá zladfa am tsavaytsavaye.

²⁴ Ate ya wá, ma yá anƙwa an shifa, ma ya baaka an shifa keni ba káلكale. Iya wá, yá kátá ba yá maganaamaga slera na a fiyaara Yaakadada Yaisu na baɗemme, a jauka ɗekideki. Amaana: Bálá labáre á higa, elva a ŋurna na a maganaa Dadaamiya.

²⁵ «Haranaaháre á bálá waazu á elva a dem *kwara á Dadaamiya am ɗágave á kure. Amá kina wá, diyandiya ganakini ba palle á kure keni baaka ura á de puwete ice áte ya mázla-aara.

²⁶ Yá ndaakur aɗaba una ŋanna kina vatena: Máki keɗaakeda ura am ɗágave á kure wá, am mbiye-aaruka.

²⁷ Ya ndahanaa aɗaba uwe una, aɗaba sanakuransese namaari á Dadaamiya baɗemme ásegashe.

²⁸ Fawanufe ba kure hyema ge ire á kure, fawanufe hyema ge walda na a fakurmaa Sheɗekwe Cufedɗe am erva ganakini kwá piyanaa kure na. Fawaterufe hyema ge emnde á Dadaamiya na ba shagera degiya! Aɗaba a emtsehe ge egdza-aara emtsaade, lauktu ta jesaara emnde ŋanna.

²⁹ Diyandiya ganakini watse tá sawa emnde na ta ba seke indale-aha na á sem ɗágave á kure, tá se yakurka ɗekideki.

³⁰ Á ba am ɗágave á kure keni watse tá anƙwa emnde a báda emnde a fetarfe umele an fida ge ɗabaterɗába.

³¹ Amá faufa hyema, yehauteyeha geni yawe-aaruwa keye, vayi vacika yá anƙwa á kwarakursekwáre an yawe á kyuwa am ice, puwananseka ɗekideki.

³² «Daaci kina wá, yá anjwa yakurá am erwa á Dadaamiya, á de tsufakurá ba nane áte ngurna-aara, á de fakurwa ba nane hyema an elva-aara. An hákuma ba nane ge ndzedakurtendzedá, antara ge vakurte duksa shagera na a fater ge emnde-aara bademme na.

³³ Iya wá, tatayanka duksa á ura d'ekid'eki. Ma shungu, ma dindar, ma zane keni.

³⁴ Ba kure keni, ábi kwa nanna ya mága slera á ba an erwa-aaruwa ge tátaya náza já wedera á n'ere antara emnde na tá ázerwa.

³⁵ Iya wá, maranakuránmára am názena ya maganaa ya bademme, geni kure keni magaumága slera ba estuwa, melawaterumele ge emnde na tá taa maganaaka wedera-aha-aatare. Viyawanaaka elva na ndza a ndaanaa Yaakadada á ba an ire-aara, a ba nane: Higa kwakya wá, ba náza á edda vante sadake ge ura, arge náza slelyiya sadake.»

³⁶ Zlanaazle elva-aara Paul, ta kezlaa ugje am haha bademme, nane a magaa maduwa.

³⁷ Bademme-aatare tá kyuwa á ba an yawe á kyuwa, daaci ta n'ananá erwa ge Paul, a ba itare tá elvan ge nane: Á jamimá shifa, a dákaada Dadaamiya á ba an hairire.

³⁸ Anjwa á waterwa jipu elva na ta cenanaa am mbuwe á Paul, a ba nane tá puweteka ice-aatare áte nane mázla-aara na. Daaci ta puwanse á dem tate á paare á yawe.

21

Shula á Paul á dem Urusaliima

¹ Am iga á tegava á ñere antara itare maa, ña zlala ba suuwe an paare á yawe, kwaye ña de tsekwa am Kaus. Makuralla-aara, ña de tsekwa am Raudaus. Tsante am Raudaus, ña de tsekwa am Patara.

² Duwa á ñere, ña de shaa paare na á dem Finikiya, daaci ña naba demhe am huđe-aara.

³ Dañeraada átevege haha á Kiprus, ña náanna haha ñanna am názlaba á ñere, ñere ña zlalá ba suuwe á dem haha á Siriya, ña de tsekwa am Tirus tate á tsekwa kazlaña á paare ñanna.

⁴ Ña de shaa emnde a fetarfe am ekse ñanna, daaci ña ga hare maka ázetáre. Shedfekwe Cudfedfe a naba ndaaterhe názena ñi watse á de shá Paul am Urusaliima na ge emnde a fetarfe ñanna, itare keni ta naba mbedanu ge Paul geni a duka mazla-aara.

⁵ Amá ba zlauzle hare maka ñanna wá, ña naba tsetehe, ña añkwa á zlalá. Daaci itare, antara ñwasha-aha-aatare, ira egdzara-aatare, bademme ta puwañerse á dete iga a ekse, áte we á háye, ña kezlaa ugje áte we á háye ñanna, ña magaa maduwa átirpalle.

⁶ Am iga á maduwa wá, ña magaa ájámimá shifa, ña daleme am paare, itare keni ta naba da-aatare.

⁷ Tsante am Tirus, ña de tsekwa am Pau-aulaimayi, áhuwa keni lyarañervaalya egdzar mama-aha á miya emnde a fetarfe, ña váha deppe ázetare.

⁸ Makuralla-aara ña tsetehe, ña de tsekwa am Kaysariya am mba á malum Filip, ñane palle á emnde vuye na ndza ta dzeraterse am

Urusaliima na.

⁹ Filip ɲanna wá, an gyaale-aha-aara ufade darka á de gá zhele, tá aɲkwa á maga nabiyire.

¹⁰ Am haraɲeraahare cekwaangudí áhuwa, vacite umele, a naba semhe ge nabi á sa am Yahudiya zhera-aara Agabus.

¹¹ Samsa áseze ɲere wá, a naba lyevaa náza ɲguda huɗe á Paul wá, a naba takwasaa sera-aha-aara, antara erva-aha-aara an ɲane, a ba ɲane: «Náwa názu a ndaanaa Shedekwe Cufedfe: Edda á náza ɲguda huɗe na keni, tá de takwasán ba estuwa Yahudiya-aha am Urusaliima, tá de belaterma am erva ge emnde a jeba umele.»

¹² Ba ɲa cenaa una ɲanna wá, ba ɲere an ire á ɲere, antara egdzar mama-aha a ɲere na tá am Kaysariya na keni, ɲa ɲantaa ba sera ge Paul, geni a duka á dem Urusaliima na mázla-aara.

¹³ Amá a ba ɲane á elvan ge ɲere: «Labára ɲane kwá kyuwa na? Kwá kátá gyaigiyem lyawa am vuwa ge iya emtu? Iya wá, á tsaaka an takwasa, ba emtsa keni yá aɲkwa átekwa adaba Yaakadada á miya Yaisu.»

¹⁴ Janerviyyaaja eptsanaaptsa-aara. Daaci ndaɲeranka elva umele mázla-aara, a ba ɲere: A gevge ba namaari á Yaakadada.

¹⁵ Haraɲeraahare cekwaangudí áhuwa maa, am iga-aara ɲa naba tse, ɲa zlála á dem Urusaliima.

¹⁶ Ta daa á puwaɲerpuwa emnde umele am dágave á egdzar mama-aha a ɲere emnde a Kaysariya. Ta daɲerhe ba suuwe á dem mba

á Manasaun zhel emnde a Kiprus umele, haraa-hare am fetarfire, daaci ña nja am mba-aara.

Paul am mba á Yakuba

¹⁷ Dañeraada am Urusaliima maa, lyarañervaalya egdzar mama-aha a ñere emnde a fetarfe á ba an higa.

¹⁸ Makuralla-aara, a naba dañerhe ge Paul á dem mba á Yakuba, ña de beyaa jarammeje emnde a sawari á aiklaisiya bademme am mba-aara.

¹⁹ Daaci Paul a gater use, a ndaater názena a ganvaa Dadaamiya bademme am slera-aara na a maganaa ñane am dágave á emnde a jeba umele na.

²⁰ Cenarvaacena una ñanna bademme wá, ta naba gálá Dadaamiya. Am iga-aara maa, a ba itare tá elvan ge Paul: «Ka cenáncena emtu egdza emmaaye? Emnde debu wányara am Yahudiya una fartarfe, amá bademme-aatare ta tsaa á ba áte *tawraita a Muusa.

²¹ Amá cenaráncena emnde ñanna ta se ndahanaa emnde umele, a ba itare: Ka kwaratersaa ka ge Yahudiya-aha á miya na tá am ekse á emnde, geni a yaránya tawraita, a farka egdzara-aatare am shedekwe, a dábarka nađe-aha á yahudiyire dekideki.

²² Mí maganá estara kina? Adaba náwa watse tá cenáncena ganakini sakaasire.

²³ Ekka wá, eccena názena ñá bakaná ñere. Náwa tá aṅkwa emnde ufáde, itare ta maganaa *waada ge Dadaamiya.

²⁴ Aṅkwa á ceka sarte-aatare, herzhe tá de bára, tá de sehá ire wá, ekka keni naba duwa

antara itare, de baraabára ire á ña antara itare, biyaabiya názena tá kátá maganá itare ge sehá ire-aatare. Máki magakanaamága una wá, tá de diyeddiye emnde ganakini elva-aha na ta cenáncena tá ankwá ndaaná áte ka na, baaka jirire am huđe-aara dekideki, mbate ekka keni ká ankwá á dƒaba ba tawraitá á Muusa.

²⁵ Náza á emnde a jeba umele na garevge emnde a fetarfe wá, baaka elva. Adaba ña puwa-tertepuwa nalmesheri, ña ndaterndaha názu mi njante am sawari á miya, mi bateraa: A zarka hyuwa na má ta icante ge mága hele, a zarka uzhe, a zarka hyuwa na má icaranteka an ica, a magarka gwardzire.»

²⁶ Daaci makuralla-aara, a naba duhe ge Paul antara emnde ufáde ñanna, ta de baraa ire-aatare áte nađe á Yahudiya-aha. Zlaruzle am mága slera á cuďeďdire ñanna, Paul a de ndaanhe ge *liman am huđe á mashidi, a ba ñane: «Am iga a hare vuye wá, watse ñá eptsá, ñá sawa an sadake-aha á ñere, á se zlauzle slera á bára á ñere.»

Ta eksevaa Paul am mashidi

²⁷⁻²⁸ Ba hare vuye ñanna keni herzhe á ceka wá, saremsa Yahudiya-aha umele á sawa am haha á Aziya. Itare ba ta puwete ice-aatare áte Paul wá, ta naba fante hula: «Tá áme dawale-aha á *Iserayiila-aha! Sawmbare! Náwa ñane zhel na jemje dába am sleđe baďemme, ankwá á balaterá waazu-aara ge emnde baďemme, a bantsa ñane ma miya emnde a Iserayiila, ma *tawraitá á Muusa, ma mashidi á miya yaikke

na, bademme baaka nampire-aara d'ekid'eki á bina! Zlabe ádaliye, náwa a naba saa emnde a jeba umele á sem huđe á mashidi, a se badzanve sleđe cufed'đe na.» Daaci ta tsante ervaunđe á emnde, ta naba eksevaa Paul.

²⁹ Ta kurken Paul a saa emnde a jeba umele á sem huđe á mashidi na wá, ad'aba ta naa Taurafinus zhel emnde a Aifaisus, ta antara Paul am huđe á berni, daaci ta kurken a daa zhel nanna á dem mashidi keni.

³⁰ Labáre nanna de gyantegya huđe á berni bademme, emnde ta sawa á ba an zhagade, ta eksevaa Paul, ta tedese am mashidi, ta had'anu ge mashidi ba watsewatse.

³¹ Itare tá kátá zlanazle shifa am Paul, amá kertenj damda labáre á deza male á sawji-aha á Rauma geni weshaptewesha huđe á Urusaliima.

³² Ba watsewatse, nane keni a d'ante male-aha am sawji-aha, ta naba jemaa sawji-aha ta dem tate á elva nanna. Emnde a ekse ba ta naa male á sawji-aha, antara sawji-aha-aara na wá, ta naba yaa ja Paul mázla-aara.

³³ Daaci duwa á male á sawji-aha á deza Paul, a eksevaah'e, a ba nane á elvan ge sawji-aha: Puwawtepuwa tsavaytsavaye buwa áte nane. Lauktu a fantau ge ndáva sera á elva áte zhel nanna, a ba nane: Zhel ekse-ara nane? A gu uwe?

³⁴ Amá emnde bademme ma ware keni á ndáhá ba náza-aara, ura umele á hula ba dey. Am á cenánka jirire á názena ta janaa átugena na, a ba nane á elvan ge sawji-aha: Dawánda á dem dala á kure.

³⁵ Am sarte na daraada sawji-aha an Paul am tate á dǎlá á dem dala, ta naba eksante Paul am erva, ta kante á dem zhegela, adaba wáva na tá anƙwa á dǎbaterá emnde a ekse an ɲane.

³⁶ Adaba tá anƙwa á dǎbaterá á ba an ndzedá, antara hula, á ba itare: A daaka an shifa!

Paul anƙwa á ndáhá jirire á ire-aara

³⁷ Herzhe sawji-aha tá dǎnda Paul á dem huƙe á dala-aatare wá, a ba Paul á elvan ge male-aatare an elva a Yunaniƙkau: «Yá shánsha emtu baráma ge ndahak elva cekwaanƙuǎi?» A ɲwanante a ba ɲane: «Iyau, diyakdiya elva a Yunaniƙkau?»

³⁸ Una wá, mbate ka zhel emnde a Misera na jaaja ervaunƙe, a zhagadaa á dem kaamba antara kwakwáne-aha-aara debu ufaƙe, tá an náza erva-aatare baƙemme na, una watse ka ɲane ka?»

³⁹ A ɲwete ge Paul, a ba ɲane á elvan ge ɲane: «Iya ya ba ura Yahudiya miyenne, ta yiya am berni á Tarsus am haha á Silikiya. Ya egdza a berni yaikke. Tasle á ɲa viteva seke baráma, yá ndaaterse elva-aaruwa ge zlamaakelaawa.»

⁴⁰ Male á sawji-aha na a naba yanaa baráma. Daaci a tsaahé ge Paul áte tate a dǎla á dem dala á sawji-aha, a katerante erva ge zlamaakelaawa, a magateraa nalaama ganakini a dǎruƙe. Tseriiye dǎruƙa emnde baƙemme, ba seke ndza baaka duksa. Daaci Paul a fantau ge ndaater elva an elva a Ibraniƙkau, amaana: elva a ekse-aara.

22

¹ «Ba estuwa egdzar mama-aha-aaruwa, antara dada-aha-aaruwa, cenawivaacena kwa, yá ndaakurndáhá elva-aaruwa palle, kwá cenvaacena jirire-aaruwa.»

² Am sarte na tá anḵwa á cena Paul á ndaater elva an elva á Ibraniḵkau na wá, ta farhe ge mága tsekadfire, baaka ura á geja vuwa dekideki. Daaci a ba Paul:

³ «Iya, ya ura Yahudiya, ta yiya am Tarsus am haha á Silikiya. Amá ya waltaa á ba am Urusaliima áhuna. Ndza malum-aaruwa *Gamaliyail ge iya, a kwarisaa ḡane daba *tawraitá á eggye-aha á miya áte una an puwa. Ndza ya dába Dadaamiya an ndzedá-aaruwa bademme áte una kwá anḵwa á dabaná kure keni na.

⁴ Ndza ya shateru zladá kwakya ge emnde a dába unḡule á Yaisu, ya sluvaa emnde ḡanna an zála-ka an ḡwasha-ka, ya puwateremhe am dangay.

⁵ Male á *liman-aha, antara male-aha á Yahudiya wá, itare diyardiya názena yá anḵwa á ndaaná ya na bademme, yá ndaakur ba jirire. Ndza ta vitaa ba itare nalmesheri á seydire am erva, ya daterán ge Yahudiya-aha á miya na tá am Dimaska. Adaba una ḡanna ya duwa. Ya duwa ge sluwa emnde na tá áte baráma á Yaisu, ge saterá á sem Urusaliima, ma andze tá se kyáná male-aha á Yahudiya-aha shairiya-aatare.»

*Paul á ndáhá fakte á fetarfire-aara áte Yaakadada
(9:1-19; 26:12-18)*

⁶ «Am sarte na yá aṅkwa á dem Dimaska ṅanna wá, á maga vacitire wá, a naba tsekwa ge parakkire yaikke á sa am samaya á sete ya,

⁷ ya naba mbedehe, yá cena ba kwára á ura aṅkwa á biya elva: Sawulu! Sawulu! Labára ká magiya palasa? a bina.

⁸ Ya ndavanuhe: Ka ware ṅane ka Yaakadada? A ṅwiyante, a ba ṅane: Ba iya Yaisu, ya ura Nasarátu una ká aṅkwa á magiya palasa na.

⁹ Emnde na tá antara ya na wá, naránna parakkire, amá cenanánka kwára á edda una a biyaa elva na.

¹⁰ Ya naba enndáva: Yá maganá estara kina Yaakadada? A ba Yaakadada á elvan ge iya: Tsetse ezzlálá á dem Dimaska, watse tá de bakánba áhuwa názena a fakaara Dadaamiya bademme.

¹¹ A naba wulfiyaahe ge parakkire yaikke na a tsekwiyaare á sawa am samaya na, ta tadiya an táda emnde na tá antara ya na á dem Dimaska.

¹² «Aṅkwa ura Yahudiya á miya áhuwa, zhera-aara Hananiyas, ṅane sledaba Dadaamiya an ndzedfa-aara bademme, ṅanaaṅa *tawraitá á miya ba shagera, bademme á Yahudiya-aha na tá am Dimaska hayaránhayá jipu.

¹³ A duhe ge ṅane ádezerwa, a de tsiyarhe, a ba ṅane á elvan ge iya: Sawulu egdza emmerwa, a wertewera ice-aha á ṅa. Ba watsewatse a naba werte ge ice-aha-aaruwa, yá nanna ṅane.

¹⁴ A ba Hananiyas ṅanna á elvan ge iya: A saksaa ba Dadaamiya á eggie-aha a miya werre, geni ekka ká nanna edda una slejirire ba ṅane palle na, antara ganakini ekka ká cenvaacena

elva á slejirire ɲanna am mbuwe-aara ba ge ɲane, ira ká diyeddiye namaari-aara.

¹⁵ Adɓaba ká de gev seyde-aara, ká de ndaater názena ka naanaa ka, antara názena ka ce-naanaa ka ge emnde.

¹⁶ Ká ufa uwe mázla-aara? Tsetse ká lyevaalya bap̄tisma, enndava Yaisu geni a melakumele, a barakaabárá Dadaamiya haypa-aha á ɲa.»

Paul aɲkwa ndaha elva á duwa-aara á dem dágave á emnde a jeba umele

¹⁷ «Haraahare wá, ya naba eptsa á sem huɗe á Urusaliima. Vacite umele yá am mashidi, yá aɲkwa á maga maduwa wá, ya naba shaa wahayu.

¹⁸ Ya naa Yaakadada am wahayu-aaruwa ɲanna, a ba ɲane á elvan ge iya: Tsetse watse-watse dedde am huɗe á Urusaliima na. Adɓaba emnde a ekse na tá de liyeyeka seydire na ká de maganá ka áte iya am dágave-aatare.

¹⁹ Ya ɲwete, a ba ya á elvan ge ɲane: Amá degiya Yaakadada, ba itare keni diyardiya ganakini ndza ya duwa ba ya ɲanna á dem mashidi-aha gergere, ya sluwa emnde a fetarfe á ɲa, ya jaterja, ya dateraa á dem dangay bademme.

²⁰ Am sarte á ja sleslera á ɲa Aitiyain keni ndza yá aɲkwa, ya hayáterháya jipu emnde a ejja-aara, ya ufanaa ba iya naɲgyuwe-aha-aatare.

²¹ Amá a ba Yaakadada: Edduwa, adɓaba watse yá belakbelá yiyiye, á dem dágave á emnde na ta Yahudiya-aha-ka na.»

Paul á katafke á male á sawji-aha

²² Emnde bademme ndza tá cená ba Paul dem sarte na a fem elva á emnde na garevka Yahudiya-aha. Amá ba a ndaahese una nanna wá, ta naba puwar hula, a ba itare: Ura estuwa a njeka an shifa đekideki.

²³ Daaci tá anƙwa á fa hula, tá slatsa erva, ta tsante berbere an dága haha á dem zhegela, ta tsakwese am záne-aha-aatare, ta naba puwanve.

²⁴ Daaci a ba male á sawji-aha a daránda Paul á dem huđe á dala, a zaruze an ja ba shagera, lauktu watse á ndáhá jirire, labára emnde bademme tá slatsa ba erva áte nane.

²⁵ Daaci ta naba puwete zawa áte nane. Tá kátá ejja wá, a ba Paul á elvan ge zhel sawji nanna: «Anƙwa baráma á kure ge ja ura Rauma miyenne zlađe kyareka shairiya-aara emtu?»

²⁶ Ba a cenaa una nanna sawji na, a naba yánhe, duwa-aara á deza male-aatare, a ba nane á elvan ge nane: «Ázara á ba sawari á na áte zhel na, adaba nane keni ba ura Rauma ba miyenne?»

²⁷ A naba sawhe ge male á sawji-aha na áseza Paul, a ba nane á elvan ge nane: «Ndindáhá ba jirire: Ka ura Rauma ba miyenne emtu?» A nƙwete ge Paul, a ba nane: «Ya ura Rauma ba miyenne.»

²⁸ A ba male á sawji-aha na á elvan ge Paul: «Iya degiya danedde am nalmane kwakya lauktu náwa ganevge ura Rauma.» A ba Paul á elvan ge nane: «Iya wá, ta yi ba estuwa ya ba ura Rauma.»

²⁹ Daaci sawji-aha na ndza ta magaa niya ge ja Paul, geni a ndasendáhe jirire na, ta naba yánhe á ba áte watsewatsire. Ba male-aatare an ire-aara keni jaaja lyawa, adaba diyeddiye ganakini Paul nanna nane a puwete záwa áte nane na ba ura Rauma miyenne.

Paul á katafke á male-aha á Yahudiya-aha

³⁰ Daaci male á sawji-aha na maa, nane á kátá á diyeddiye jirire á názena ni Yahudiya-aha wayarka an Paul dekiđeki na. Adaba una nanna, makuralla-aara wá, a jemaa male-aha á *liman-aha, antara male-aha á Yahudiya-aha, a pelaa Paul, a sanse á se katafke-aatare.

23

¹ Paul a zharaa emnde na tá am jáháva nanna ba shagera, daaci a ba nane á elvan ge itare: «Egdzar mama-aha-aaruwa, iya wá, diyandiya ganakini sem vatena keni shagera zlááva-aaruwa á katafke á Dadaamiya, ya ba cudeđde duksa-aaruwa.»

² A ba Ananias male á *liman-aha á elvan ge emnde na ta herzhe an Paul: Jauvaaja áte we-aara nanna!

³ A ba Paul á elvan ge nane: «Ekka keni sey á jakvaaja Dadaamiya, egdza á danŋwa huđe. Ka njehe ganakini ká kyivaara shairiya áte una am *tawraita, amá ka ebzu tawraita, adaba a ba ka a jarija!»

⁴ A ba emnde na ta herzhe an nane: «Ká zlazla male á liman-aha á Dadaamiya?»

⁵ A ba Paul á elvan ge itare: «Ndza diyanka ganakini male á liman-aha egdzar mama-aha-aaruwa. Adaba a ba wakita á Dadaamiya: Ndaheka elva mandzawe áte male á ekse á kure d'ekideki.»

⁶ Diyaadiya Paul, ganakini emnde tá an tega gergere buwa á ba am jáháva nanna. Emnde umele-aatare, ta *Saduki-aha, emnde umele keni ta *Farisa-aha. Adaba una nanna, a kante kwará á ba an ndzedá, a ba nane á elvan ge itare: «Egdzar mama-aha-aaruwa, iya wá, ya Farisa, ta yiya á ba am hude-aara. Ta se puwiyar ugje ázekure adaba fetarfire-aaruwa áte elva a tse á emnde am faya.»

⁷ Ba ndasendáha nane una nanna wá, njaanja gajawe yaikke am dágave á Farisa-aha, antara Saduki-aha, kerten an tega ye á emnde gergere buwa am jáháva nanna.

⁸ Saduki-aha, itare fartareka d'ekideki áte elva a tse á emnde am faya na. Ma malika-aha, ma shedekwe á uwe keni baaka d'ekideki. Amá Farisa-aha wá, fartarfe ganakini an kwa duksa-aha nanna bad'emme.

⁹ Am garanvege gajawe-aatare yaikke á ba an ká kwará á dem zhegela, ta naba tsetehe ge emnde umele am malum-aha á *tawraitá na ta Farisa-aha, ta ngyaingyesaa ice, a ba itare: «Shaneránka nere haypa áte zhel na ba palle keni. Watse ba jirire a ndansaa ba shedekwe, bi malika á Dadaamiya elva ka wá, dey ka!»

¹⁰ Tsarantetse gajawe yaikke zlafe adaliye, a naba ja ge lyawa male á sawji-aha na geni a dzadzaraaka Paul, a naba belaa sawji-aha-aara,

ta tsekwehe á dem jáháva ñanna, ta de tefese Paul am jáháva, ta d'alese an ñane á dem dala-aatare.

¹¹ An vayiya ba vacite ñanna wá, Yaakadada a naba maranse ire-aara ge Paul, a ba ñane á elvan ge ñane: «Gazleka d'ekideki! Magakanaamága seydire áte ya am huđe á Urusaliima áhuna, yá kátá ká de emmága ba estuwa am Rauma keni.»

Yahudiya-aha ta puwaa buwe áte shifa á Paul

¹² An enlyya makuralla-aara wá, Yahudiya-aha umele ta naba zlauhe am ndaha, ta zu ba wada-aara geni ba uwe keni tá zeka, tá sheka d'ekideki, sey má jareja shifa á Paul.

¹³ Emnde na ta ngudaa sawari á una ñanna ta kul ufađe an duksa.

¹⁴ Daaci ba zlála-aatare ádeza male-aha á *liman-aha, antara male-aha á Yahudiya-aha, a ba itare tá elvan ge itare: «Náwa ñere ña zu ba wada-aara, ganakini ma uwe keni ñá feka áte we á ñere d'ekideki, sey máki janjerja shifa á Paul.

¹⁵ Kina kure wá, belawanvebela ba we ge male á sawji-aha á Rauma, ganakini a sakuransa Paul á se katafke á *kendekyiya yaikke. Magaumága ba seke kwá se kya shairiya-aara á ba an jirire, náwa ñere ñá de puwanve buwe, ñá zlanazle shifa-aara, á se cuwakurvaaka kure d'ekideki.»

¹⁶ Amá ankwá egdzere zhele, egdza á egdza emmenjara mukse ge Paul, ñane cenáncena lámare ñanna. Daaci ba zlála-aara ge ñane á dem dala á sawji-aha, a de fanem elva ñanna am vuwa ge Paul.

¹⁷ Paul a dante sawji palle, a ba ɲane á elvan ge ɲane: «Kwaye danda egdze na ádeza male á kure, adaba aɲkwa názu á de ndaaná ɲane.»

¹⁸ Sawji na a naba puwansehe ge egdze na ádeza male-aatare, a ba ɲane á elvan ge ɲane: «Aɲkwa dangay palle zhera-aara Paul, a bántsa ɲane yá saká egdze na, adaba aɲkwa názu á se ndakndáha.»

¹⁹ «Ane!» a ba male na, a ɲaa egdze ɲanna áte erva, a gapse antara ɲane ba itare ta buwa, a ba ɲane á elvan ge ɲane: «Enndáha elva á ɲa.»

²⁰ A ba egdze na á elvan ge ɲane: «Kwaye Yahudiya-aha zlaruzle am ndáhá, ganakini tá se ndavaku Paul makuralla geni ká dateránda á de katafke á *kendekyiya á ɲere yaikke, tá se magán ba seke watse tá de kya shairiya-aara á ba an jirire am kendekyiya,

²¹ amá ceneka ndáva-aatare dekideki. Adaba emnde kul ufaɗe ju duksa tá de puwa buwe áte Paul, ta zu ba wada-aara geni ba uwe keni tá zeka, tá sheka dekideki, sey má jareja shifa-aara. Kina wá, itare zlarauzle am ndáhá-aatare bademme, a juwa tá ufa ba jawapa na ká de vatertá ka.»

²² «Ane!» a ba male á sawji-aha na. «Ezzlála kwa, amá ndanka ma ge ware keni ganakini ka se mbediyumbede.»

Male á sawji-aha á daná Paul ge raizhaun

²³ Am iga á una ɲanna maa, a dɛtaa male-aha buwa am sawji-aha, a ba ɲane á elvan ge itare: «Jawammeje sawji-aha deremke buwa, emnde a belsa kul vuye, emnde na tá duwa an upa am erva keni deremke buwa. Bademme á kure

ngwadawápsengwade, watse kwá maga shula á dem Kaysariya am saa maselmane á vayiya.

²⁴ Puwaupuwa belsa-aha na watse kwá dá Paul átekwa ba lapilayye, ba slerba a sera-aara keni a kedeka, sey kwá de fanem am erva ba ge raizhaun, ba ge Failikus an ire-aara.»

²⁵ Daaci a puwaterte nalmesheri, a vaterte am erva, a ba nane:

²⁶ «Ambarka á na sleksu Failikus: Ba iya Kalawdiyus Lisiyas, yá anƙwa gak use-aaruwa.

²⁷ Zhel na kwaye tá anƙwa á dakánda na wá, ta eksevaa Yahudiya-aha, tá kátá já ba shifa-aara. Amá de cenanáncena ya ganakini nane keni ba ura Rauma, daaci ya naba duhe antara sawji-aha-aaruwa, ya lyanse am erva-aatare.

²⁸ Ya kátá dise jirire á názena ni Yahudiya-aha ta yaa zhel nanna adaba nane, ya naba danhe á de katafke á male-aha-aatare am *kendekyiya.

²⁹ Amá názu ya disaa ya am mága-aatare nanna wá, hyafka ge ja shifa á zhel na, ma ba ge ngudanaa am dangay keni, adaba ta gajawe á ba arge názu am *tawrait-aatare.

³⁰ Amá a sem ge ura a se mbediyuhe wá, a ba nane: Yahudiya-aha ngudarnaanguda sawari-aatare geni sey máki jareja shifa á Paul. Adaba una nanna, yá anƙwa bela emnde-aaruwa ba watsewatse tá dakánda zhel nanna ge ekka. Ya ndaaterndáhá ge kelaade-aha á zhel nanna geni a de puwarpuwa ugje-aatare ázena arge nane.»

³¹ Daaci sawji-aha wá, itare ta maganaa á ba áte una ta ndaaterndaha na. Ta eksante Paul, á ba an vayiya nanna, ta danhe emtsaade á dem

Antipatris.

³² Makuralla-aara wá, ta eptsehe ge emnde na tá an sera na, ta yaa sawji-aha na tá áte belsa-aha tá anƙwa á dánda.

³³ Ba demda-aatare ge sawji-aha na am Kaysariya, ta vante nalmesheri na ge raizhaun, ta yaa Paul am erva-aara.

³⁴ Raizhaun a ndaase nalmesheri na catte, daaci a ndavanu ge Paul, a ba ɲane: «Ka ura á haha-ara?» A shantuwa estuwa geni Paul ura haha á Silikiya.

³⁵ Daaci a ba ɲane á elvan ge ɲane: «Watse yá kya shairiya á ɲa má saremsa emnde a dágala á ɲa.» Daaci a ba ɲane á elvan ge sawji-aha: De belawembela Paul am hudga na ndza a nderanaa sleksu *Hirudus na.

24

Yahudiya-aha tá anƙwa á puwar ugje ge Paul

¹ Am iga á háre ilyeɓe, lauktu a semhe ge Ananiyas male á *liman-aha á sem Kaysariya. A sawa antara male-aha á Yahudiya-aha, antara Tairtulus, ɲane edda una diyaadiya shairiya-aha á ɲgumna a Rauma ba shagera na. Daaci duwa-aatare á de katafke á Failikus, ta de puwar ugje ge Paul ázeɲara.

² Daaci ɗarantedáhá Paul á sawa, Tairtulus ɲara a naba fantau ge tsáká elva áte Paul, a ba ɲane á elvan ge Failikus: «Ambarka á ɲa, adaba barka á ɲa una anƙwa hairire am larde na; adaba kwakyire á enƙale á ɲa am slera-aha, duksa bademme tsemaartse am larde á miya.

³ Njá anƙwa á slafaká we á ɲere kwakya adaba názena ɲa shanaa ɲere ázeɲa bademme na.

⁴ Hyainefka ba názara keni ge tsakakaa elva kwakya á katafke á ɲa, amá adaba kemaarire á ɲa wá, tásle á ɲa cenanervaacena egdza elva á ɲere na ba cekwaanƙudi.

⁵ Ɗere wá, ɲa bera zhel na kelaade jipu. Bademme á Yahudiya-aha na tá am huɗe á duniya a weshatertaa ba ɲane. Ba ɲane ɲanna zlaɓe ádaliye una male á emnde a dába náza tsaha á ura Nasarátu.

⁶ Zlaɓe ádaliye, á kátá á nyamala mashidi á ɲere. Mázla-aara wá, ɲa naba eksevaahé. ((Njá kátá maganá shairiya áte una am *tawraitá á ɲere,

⁷ amá a se lyevaahé ge Lisiyas male á sawji-aha á ba an ndzedá am erva á ɲere.

⁸ Daaci a baɲerna ba Lisiyas ganakini ɲá sawa ásezeɲa.)) Máki ká anƙwa á ndavanundave wá, watse ká diyeddiya ba ka keni, geni ɲa emnde a jirire ba ɲere.»

⁹ Yahudiya-aha ta farhe zlaɓe ádaliye, a ba itare: Elva na a tsakanaa Tairtulus na, ba palle keni baaka fida am huɗe-aara, bademme ba jirire.

Paul anƙwa á ndáhá elva áte ire-aara á katafke á Failikus

¹⁰ Daaci a maganaa nalaama ge Paul an erva, geni ɲane keni a enndáhá elva-aara. A ba Paul: «Ámbarka á ɲa, diyandiyá ganakini gákga yawe kwakya ka sleshairiya am larde na. Adaba una

ɲanna, yá higa á ba an higa ge ndakse elva áte ire-aaruwa.

¹¹ Duwa-aaruwa á dem Urusaliima ya de kezlan ugje ge Dadaamiya wá, máki ká habaza sera-aara, bademme keni á jauka am háre ke-laawa ju buwa.

¹² Sharika am gajawe antara ura am *mashidi yaikke, ma am egdzar *mashidi-aha á Yahudiya-aha, ma am huɗe á ekse keni ɗekideki.

¹³ Ba emnde ɲanna náwa itare na keni tá sanseka názena ni ta yiyaa adaba ɲane na.

¹⁴ Názu yá an ɲane ge ndakndáhá náwa yá á katafke á ɲa wá, iya yá aɲkwa á maganá slera ba ge Dadaamiya na ndza ta ɗabanaa eggje-aha á ɲere na palle, yá aɲkwa maganá an uɲɲule áɲwaslire na a ba itare una wecire na. Amá ba jirire, iya fantarfe áte názena am *tawraitá, antara elva á nabi-aha bademme.

¹⁵ Iya keni tamtamire-aaruwa á ba áte názena ni tá aɲkwa á tamaná itare. Yá an táma geni watse Dadaamiya á tsatertetse emnde am faya, emnde a jirire, antara emnde a mándzawe bademme.

¹⁶ Adaba una ɲanna yá aɲkwa á wava geni a njaninja lapiya á katafke á Dadaamiya, antara á katafke á emnde bademme.

¹⁷ «Am ya magaa yawe kwakya ya ɓaaka am Urusaliima, ya naba saa, ya sawa an shuɲgu ge melateru ge emnde a larde-aaruwa, ya se vante antara sadake-aaruwa ge Dadaamiya.

¹⁸ Náwa názu ya de maganaa ya am mashidi am sarte na ta eksiyeksa ɲanna: Emtsaade wá, iya keni ya dem dáɲgave á emnde na tá aɲkwa

á bára na. Ndza baaka dikele á emnde ázerwa, baaka hula dekiđeki.

¹⁹ Amá ndza tá ankwá Yahudiya-aha umele ta sawa á sa am haha á Aziya wá, ma andze tá ndaaka itare máki ankwá duksa mándzawe ta naana itare am mága-aaruwa.

²⁰ Emtu máki ankwá haypa na ta shanaa itare áte ya am sarte na ta de tsiyaa á katafke á male-aha na, a ndarndaha ba emnde nanna náwa itare.

²¹ Máki elva-aaruwa ba una ya ndaase á ba an ká kwára, a ba ya á elvan ge itare: Kwa tsiyaa am shairiya vatena na wá, adaba fantarfe áte tse á emnde am fáya baaka duksa umele.»

²² Am Failikus diyaadiya njá á emnde a fetarfe, a naba daa shairiya nanna á de katafke, a ba nane á elvan ge itare: «Sey má samsa Lisiyas male á sawji-aha, lauktu watse yá ica shairiya á kure.»

²³ Daaci a ba nane á elvan ge male á sawji-aha na Paul am erva-aara na: «Eptsanaaptsa zhel na á dem bere, de fawanufe hyema ba shagera, amá wá, fawarka zladá, yawáterya slakate-aha-aara, a darduwa á dezeńara, a magaranánmaga nampire.»

Waazu á Paul á katafke á Failikus antara Durusilla

²⁴ Am iga á hare cekwaangudfi maa, samsa Failikus, tá antara mukse-aara Durusilla gyaale á Yahudiya-aha, daaci ta dfahanante Paul ge cena elva a fetarfire áte Yaisu *Almasiihu am mbuwe-aara.

²⁵ Daaci fantaufa Paul ge tsaka elva-aha áte njá am jirire na baaka duksa mándzawe áte edda-aara dekideki, antara elva a kwára vuwa, geni á kwaruwa estara ura vuwa-aara, antara elva a shairiya á emnde na watse á kyaná Dadaamiya am halavuwa á duniya. Amá gazlaagazla Failikus, a ba nane á elvan ge Paul: «Ezzlala kwa mázla-aara, watse yá dákáfáha zlaɓe ádaliye vacite umele má shanásha sarte.»

²⁶ Zlaɓe ádaliye, Failikus maa, nane a kurken watse Paul á vante egdza shungu. Adaba una nanna, máki shekwaashekwa wá, ba á edáfáhá ádezenara tá de shá uya kerde.

²⁷ Yawe buwa kalkale Paul á ba am dangay, dem sarte na ta naba daa Failikus nanna, ta saa Paurkiyus Faistus á sem kela-aara. Daaci Failikus a naba yaa Paul am dangay, adaba a kataa háyá áza Yahudiya-aha.

25

Paul á kátá á kyáná slekse á Rauma shairiya-aara

¹ Sawa á Faistus á sem haha nanna keni zlaɓe ba hare keye, amá a naba tsete am Kaysariya, a zlala á dem Urusaliima.

² Daaci male-aha á *liman-aha, antara male-aha á Yahudiya-aha umele ta de puwar ugje ge Paul á katafke-aara keni. Baira a ba itare tá elvan ge Faistus:

³ «Máki ká bashaneraabasha wá, saneránsa Paul á sem Urusaliima.» Ta ndavanu estuwa ge slekse na wá, adaba zlarauzle am ndaha-aatare, tá kátá ja shifa á Paul áte baráma.

⁴ Amá a ñwete ge Faistus, a ba ñane á elvan ge itare: «Paul anƙwa am danggay, iya keni yá eptsá ba kina á da.

⁵ Máki anƙwa haypa na a maganaa zhel ñanna wá, a d̄abarid̄ába male-aha á kure á dem Kaysariya ñanna, tá de puwar ugje-aatare áhuwa.»

⁶ Faistus haraahare ázetare am Urusaliima, a magaa hare tiise, ma kelaawa keni á hye-phye, lauktu a eptsehe á sem Kaysariya, ta saa á d̄abaná male-aha á Yahudiya-aha ñanna. Makuralla-aara, a de njehe am bere á shairiya, a ndaase elva-aara, ta de sanaa Paul.

⁷ Ba ta puwete ice-aatare áte Paul Yahudiya-aha na ta sawa am Urusaliima na wá, ta naba jantaave ge Paul, ta fantau ge tsaka elva-aha na bademme ba ser haypa na áte ñane. Ta icar sera, amá dzegwaránka njante jirire á názena ta tsakanaa itare ñanna d̄ekid̄eki.

⁸ Amá a tsete ge Paul, a ndaase elva áte ire-aara, a ba ñane: «Iya baaka haypa na ya maganaa ya d̄ekid̄eki, ma áte *tawraitá á Yahudiya-aha, ma áte *mashidi yaikke, ma áte male á larde á Rauma keni.»

⁹ Am Faistus á kátá háyá áza Yahudiya-aha, a ba ñane á elvan ge Paul: «Wayak-wáyá emtu dem Urusaliima geni yá de ica shairiya á ña á ba áhuwa, ad̄aba ugje na ta puwakarpuwe na?»

¹⁰ A ñwete ge Paul, a ba ñane á elvan ge ñane: «Náwa iya yá tse am tate á shairiya áte náza á ñgumna a Rauma, yá kátá á icevica shairiya-aaruwa á ba áhuna, ganateruka ya haypa ge Yahudiya-aha ba ka keni diyakdiya bademme.

¹¹ Ma andze aṅkwa haypa na ya maganaa ya, hyephye ge ja shifa-aaruwa wá, ma yá kwaleka shifa-aaruwa dekideki. Amá am baaka jirire am puwa ugje-aatare na ta se puwiyar ge iya na wá, yá dzegwánka faterem shifa-aaruwa am erva ba estuwa. Tasle á ṅa dándá shairiya-aaruwa ádeza male á larde á Rauma.»

¹² Daaci Faistus a dāhaterte male-aha na tá am ekte ge ṅane na. Zlaruzle am sawari-aatare, a ṅwanante ge Paul, a ba ṅane: «Ka ndavanaa ba ka tsawe geni yá dákda ádeza male á larde á Rauma wá, ba tá dákdekwa ádezenara mazla-aara.»

Paul á katafke á sleksu Agaripa ta antara Bairnike

¹³ Haraahare cekwaangudí wá, samsa sleksu Agaripa, tá antara Bairnike, ta se gan use ge Faistus.

¹⁴ Am haraahare cekwa áhuwa, Faistus a naba shanu elva a Paul ge sleksu Agaripa, a ba ṅane á elvan ge ṅane: «Aṅkwa zhel umele an ṅuḍa áhuna, kwaye ta eksanaa am zamane á Failikus, amá a yán ba estuwa zlaḅe kyaaveka shairiya-aara.

¹⁵ Am sarte na danemda ya am Urusaliima, ta puwar ugje zlaḅe ádaliye male-aha á *liman-aha, antara male-aha á Yahudiya-aha umele ázerwa, ta biyantsa itare: Sey yá mbedfanaambeda am shairiya.

¹⁶ Daaci a ba iya yá elvan ge itare: Am shairiya á emnde a Rauma wá, tá maṅka estuwa. Sey tá jatermeje emnde a puwar ugje ge ura, antara edda una ta puwar ugje na, ṅane keni á shánsha

baráma, á ndaasendahe elva áte ire-aara. Má baaka una wá, á taa gevka.

¹⁷ Itare keni ta naba sawa antara ya, iya keni se njanka an elva ñanna ðekideki; ba makuralla-aara wá, ya naba dem bere á shairiya.

¹⁸ Ta tsetehe ge kelaade-aha á zhel ñanna, ta ndaase elva-aatare bademme, mbate ba palle á elva yaikke na a guwaa ñane keni baaka. Iya wá, ndza ya kurken anƙwa elva yaikke a guwaa ñane.

¹⁹ Tá ga jawe á ba arge elva-aha na am nadina-aatare. Anƙwa zlaɓe adaliye zhel umele zhera-aara Yaisu ñane emtsamtsa, a ba Paul tsetse am faya, anƙwa an shifa.

²⁰ Am iya keni diyanka sera á elva-aatare ñanna, a ba iya yá elvan ge Paul: Ká eksaarek-sahe dem Urusaliima, tá de kya shairiya á ña na áhuwa?

²¹ Amá a ba Paul: Tasle á ña dándá shairiya-aaruwa ádeza male á larde á Rauma. Daaci a ba iya yá elvan ge emnde-aaruwa: Eptsawanaptsa emtsaade á dem bere. Kina watse yá belaná ádeza male á larde.»

²² A ba sleksu Agaripa á elvan ge ñane: «Iya keni yá kátá cenevaacena á ba an hyema-aaruwa elva á zhel ñanna.» «Witse ká cenevaacena kwa makurálla,» a ba Faistus.

²³ Makuralla-aara wá, njaanja samnawa, emnde tá anƙwa á puwa sleksu Agaripa, tá antara Bairnike á dem bere á jáháva, itare wá, tá am dágave á sawji-aha, antara male-aha á larde. Ba demda-aatare wá, a ba Faistus: A saransa Paul. Ta sateranhe.

²⁴ Daaci a ba Faistus: «Ya ndaa ba kure sleksu Agaripa, antara kure emnde na kwá antara ñere am hude á bere na bademme: Zhel na náwa ñane á katafke á miya na wá, Yahudiya-aha bademme ta se puwar ugje ázerwa. Ma áhuna, ma ya dem Urusaliima keni, tá biya ba a njeka zhel ñanna an shifa.

²⁵ Amá iya wá, shanáka haypa á zhel na ba palle keni am elva-aha-aatare ñanna hyefhye ge ja shifa-aara. Iyau, a ndavanaa ba ñane tsawe geni yá dánda shairiya-aara ádeza male á larde á Rauma wá, kina ya magaa niya ge dáná á dehuwa.

²⁶ Amá baaka elva a jirire na yá puwante ge male á larde am elva a zhel na. Ya sanaa adaba una ñanna á se katafke á kure, kwakya-aara ba ka ámbarka á ña sleksu Agaripa, geni yá shansha názu yá puwetepuwa má zlamiyuzle am hábaza sera á elva ñanna.

²⁷ Adaba eksaaka ire-aaruwa dá dangay, tá de kya shairiya-aara am tate umele ni, jirire á názena ta se puwar ugje adaba ñane keni, yá taa palanaaka na.»

26

Paul anƙwa á baná jirire-aara ge Agaripa

¹ A ba sleksu Agaripa á elvan ge Paul: «Kina wá, ká naba ndáhá elva áte ire á ña.» Daaci a ketaa erva-aara Paul, a fantau ge ndaha elva áte ire-aara, a ba ñane:

² «Ámbarka á ña sleksu Agaripa, vatena wá, yá higa jipu ge ndaase elva áte ire-aaruwa á katafke

á ña, yá higa ge ndaase názena ni ta puwiyar ugje Yahudiya-aha adaba ñane na bademme.

³ Kwakya-aara wá, ervaunđe-aaruwa á higa adaba ekka diyakdiya nađe-aha á Yahudiya-aha, antara názena á saterá gajawe ge itare bademme. Adaba una ñanna, tasle á ña fifa ervaunđe, cenivaarcene elva ñanna.

⁴ «Bademme á Yahudiya-aha diyardiya nja-aaruwa, diyardiya nja-aaruwa am egdzarire am dágave á emnde-aaruwa, antara nja-aaruwa am Urusaliima bademme.

⁵ Ta diyise werre Yahudiya-aha. Ma andze wayarwáyá wá, ba itare keni ma tá ndaasende nja-aaruwa werre am sarte na yá am dágave á emnde á miya *Farisa-aha, ndza ñannaña nadina á miya an ervaunđe-aaruwa palle, janateruje ge Yahudiya-aha umele.

⁶ Ta siyaa á sem shairiya na wá, adaba fantarfe áte názena ni Dadaamiya a magateraa waadaaara ge eggye-aha á miya werre, a bántsa ñane watse á de vaterteva ge emnde-aara na.

⁷ Bademme á emnde á miya jeba-aha gergere kelaawa ju buwa na, tá anƙwa á tama ba duksa ñanna am ire-aatare. Adaba una ñanna, an vayi vacika tá anƙwa á kezlan ugje ge Dadaamiya. Ta puwiyar ugje Yahudiya-aha á miya adaba ba tama áte duksa ñanna ámbarka á ña slekse!

⁸ Kure Yahudiya-aha na kwá áhuna na, ábi diyamidiya miya ganakini Dadaamiya á de tsatertetse emnde am faya? Ay labara kena kwá fetarka?

⁹ «Werre wá, ba iya an ire-aaruwa keni ndza baaka názu maganka áte emnde a daba Yaisu

ura Nasarátu, geni a nyainyairanvenyainye á ba an we-aatare zhera á Yaisu.

¹⁰ Názu ndza ya maganaa ya am Urusaliima ndza ba una. Male-aha á *liman-aha ta vite hákuma ba ge ñane, geni ma ya shateraa áme keni, yá halaterá á ba á dem dangay. Ya ñgwadáa emnde a fetarfe kwakya. Má ta kyaterá shairiya á emtsa, yá ba: Yawwaa shagera!

¹¹ Bademme á tate na aṅkwa *mashidi á Yahudiya-aha átekwa, ya de shateru laruwa kwakya am hude-aara, baaka názu ndza maganateranka geni a puwaranvepuwe fetarfire-aatare. Mbertembera ervaunḡde-aaruwa wá, dem ekse á emnde keni ya ḡabateremhe, ya de magateraa palása.»

*Paul aṅkwa á ndáhá elva a fetarfire-aara
(9:1-19; 22:6-10)*

¹² «A tsitaa ba una ṅanna vacite umele ge dem Dimaska, male-aha á *liman-aha ta naba vite hákuma bademme, antara nalmesheri am erva, geni yá de maga hákuma-aaruwa áhuwa.

¹³ Daaci ba ṅá aṅkwa á zlála antara kwakwáne-aha-aaruwa, magaamaga vacitire wá, a naba tsekwanḡerarhe ge parakkire umele á sa am samaya wá, jauje ba ge vaciya piyuuwe an wulwulire, a se janḡertaavehe;

¹⁴ kreppe mbaḡanḡermbáḡa á dem áhá bademme. Daaci yá cena ba kwára á ndahi elva: Sawulu! Sawulu! Labára ká magiyá palasa? An degdegire á ire na ká aṅkwa á maganá ka na wá, ká aṅkwa á maganná palasa ba ge ire á ṅa, seke náza á dalau na á shá wáwa áza edda-aara an serawḡa.

¹⁵ Ya ŋwanante: Ka ware ŋane Yaakadada? Ba iya Yaisu na ká aŋkwa á maganá palasa na, a ba Yaakadada.

¹⁶ Amá wá, naba tsetse, tsaatse an sera á ŋa. Ya marakaa ire-aaruwa, aɗaba ya eksakse ganakini ká gevge sleslera-aaruwa. De ndaterndaha baɗemme geni ka nina vatena. Názu watse yá marakaná á katafke na keni, sey ká ndaterndaha baɗemme ge emnde.

¹⁷ Yá beláká á dem dágave á Yahudiya-aha, antara emnde a jeba umele, yá lyakselya am zlaɗa-aha na watse tá fáná itare áte ka.

¹⁸ Yá belak geni ká de weratertá ice, ká de satersese am tabeɗammire, ká saterá á sem parakkire, ká ŋezlatersá am erva á Shaitaine, ká saterá á sem *kwára á Dadaamiya. Yá beláká á deza emnde ŋanna, geni a fartarfe áte iya, tá shansha bára haypa-aha-aatare, tá shánsha sleɗe-aatare am dágave á emnde á Dadaamiya.»

Paul aŋkwa á ndáhá elva á slera-aara

¹⁹ «Aɗaba una ŋanna, ámbarka á ŋa sleksu Agaripa, ya maganaa fesarfire ge Yaakadada am názena a marinaa ŋane á sá am samaya baɗemme na.

²⁰ Ya naba fantau ge magateraa waazu ge emnde a Dimaska emtsaade, antara ge emnde a Urusaliima, lauktu ya jaa ɗába am larde á Yahudiya-aha baɗemme, lauktu ya fantau ge dem larde á emnde a jeba umele. Ya ɗaterɗáhá baɗemme geni a sarsawa á sem sera á Dadaamiya, a magarmága tuba arge haypa-aha-aatare. Ya ndaterndáhá geni a magarmága

shagerire, ta de disa áte una ɲanna emnde geni magarnaamaga tuba a jirire.

²¹ Ta eksiyaa adaba ba una ɲanna Yahudiya-aha am mashidi, tá kátá já shifa-aaruwa na, baaka umele dekideki.

²² Amá a naba tsufitehe ge Dadaamiya, sem vatena zlaɓe yá á ba an shifa. Tse-aaruwa kina á katafke á zlamaha keni yá ndaater ba una ɲanna, an egdzara-ka, an male-aha-ka. Baaka názu yá ndatera ya ge emnde máki názena ndza a ndahanaa Muusa, antara nabi-aha umele, ta bántsa itare watse á gevge na ka. A ba itare:

²³ Watse *Almasiihu á shu zladfa kwakya, lauktu á emtsa, watse á gev slezuɲwe á emnde ge tsete am fáyá, geni á se baterná ɲane ge Yahudiya-aha, antara emnde a jeba umele, geni a sarence am tabedammire á sem parakkire.»

Paul aɲkwa á d'aha sleksu Agaripa á sem fetarfire

²⁴ Am Paul aɲkwa á ndáhá elva áte ire-aara estuwa, a naba valarhe ge Faistus á ba an ka kwara: «Ká an shaitaine emtu Paul? Kwakyire á diya á ɲa na a gakve an shaitaine ka!»

²⁵ A ɲwete ge Paul: «Yá an shaitaine ka ya ámbarka á ɲa, yá á ba an eɲkale-aaruwa. Elva a jirire una yá aɲkwa á ndaaná ya.

²⁶ Sleksu Agaripa wá, ɲane diyaadiya elva-aha ɲanna bademme, baaka názu á kedanarkedé, adaba gavka duksa na ta maganaa an sheɓe. Adaba una ɲanna, yá aɲkwa enndáhá ba parakke á dem hyema-aara.

²⁷ Faktarfe emtu áte elva á nabi-aha ámbarka á ña sleksu Agaripa? Diyandiya ganakini faktarfe áte itare bademme.»

²⁸ A ba sleksu Agaripa á elvan ge Paul: «Ka kurken ká naba givege slefetarfe áte watsewatsire ba estuwa?»

²⁹ A ba Paul á elvan ge ñane: «Ma áte watsewatsire, ma á shekwaashekwa keni, iya wá, yá ankwá á ñala Dadaamiya, geni ekka palle ka, amá kure emnde na kwá ankwá á cena elva-aaruwa bademme na kwá gevge ba seke iya. Amá a jakurnaaja Dadaamiya zawa na áte ya na.»

³⁰ Daaci tara slekse antara mukse-aara Bairnike, antara raizhaun, ira emnde na tá antara itare bademme tsarettse áhuwa.

³¹ Zlarzlálá áhuwa wá, tá ankwá á ndahaná am dagave-aatare ganakini baaka haypa na a guwaa zhel na hyefhye ge ja shifa-aara, ma ge dáná á dem dangay keni.

³² A ba sleksu Agaripa á elvan ge Faistus: «Zhel na ma andze ndavaaka da shairiya-aara ádeza male á larde á Rauma wá, ma mi naba belanaafela.»

27

Tá ankwá á dándá Paul á dem Rauma

¹ Am njarantenja geni watse ñá zlálá á dem Rauma am haha á Italiya, daaci ta fanem Paul, antara dangay-aha umele am erva ge Yuliyus male á sawji-aha na tá d'aháterá an emnde na wá, ta sawji-aha á male á Rauma na, watse ñá zlálá an paare á yawe.

² Daaci ɲa demhe am paare umele a sawa am Adaramitiya, aɲkwa á eptsa á da, watse á de tsaatse áte we á haye-aha am ekse-aha gergere am kwara á Aziya. Daaci ɲa zlala am huɗe-aara, aɲkwa Aristarkus antara ɲere, ɲane ura ekse á Taisalauniki am haha á Makiduniya.

³ Makuralla-aara wá, daɲeraada am Sidaun. Am Yuliyus aɲkwa á zanvaarze kwakya ge Paul, a naba vante baráma ge deza slakate-aha-aara am huɗe á ekse, geni tá magannaamaga egdza duksa.

⁴ Eptsapta á sawa am huɗe á ekse maa, ɲa demhe zlaɓe ádaliye am paare, ɲa dába ba we á haye we á haye, am ice á haha á Kiprus á kya dalbe ɲanna baaka effeya, adaba kwakya effeya am dágave á haye, á berháɲerá á sem kataliya.

⁵ Daaci ɲa ebzu haye átevege haha á Silikiya, antara Pamfiliya, daɲeraada am ekse á Mira, am haha á Liziya.

⁶ Daaci male á sawji-aha na a naba shaɲeraa paare umele áhuwa, paare ɲanna kwaye a sawa am haha á Alaikzandriya, á dem haha á Italiya. A ba ɲane, daumiyemda am paare na, ɲa demhe.

⁷ Amá ɲa zlalá á ba an eɲkale an eɲkale, hare wanyara wanyara, lauktu zlahhe daɲeraada am Kinidus. Piyañertepiya effeya mazla-aara ge zlala am ndañɲire, daaci ɲa naba vecaava á dem ice á haha á Kiraita, ɲa desa á kya we á haha ɲanna, tate na tá dahaná an Salmauni na.

⁸ Daaci ɲa dába ba we á haye átevege haha ɲanna, an zladá campaukkwe, lauktu daɲeraada am tate umele tá dahaná an tate á tsekwa paare shagera, tate ɲanna herzhe an ekse

á Laseyya.

⁹ Kedaakeda sarte á ñere kwakya am shula ñanna, haa dedde munri á bárá haypa, zlaɓe ñere ñá á ba áhuwa. Zlazlaɗa jipu ge baka paare am sarte ñanna, aɗaba kwakya effeya. Aɗaba una ñanna a ba Paul á elvan ge itare:

¹⁰ «Emnde-aaruwa, kina wá, yá zhara shula á miya na watse zlazlaɗa jipu mazla-aara. Paare á miya, antara kazlaɗa na baɗemme watse á baɗza, ba shifa á miya keni bi watse mí shanka.»

¹¹ Amá male á sawji-aha na cenaaka elva á Paul, ñane a fetaare á ba áte náza á edda á paare, antara slebaka paare ñanna.

¹² Emnde kwakya tá kátá zlala á ba á de katafke, aɗaba tate á tsekwa paare ñanna shagerka am sarte á ekhye á wátá effeya kwakya. Ma estara keni máki á gevge wá, tá kátá tá daada am Finike. Finike na wá, tate á tsekwa paare-aha umele am haha á Kiraita ñanna. Tate ñanna baɗjire-aara á zhara á dem manem, á zhara á dem yala keni. Tá kátá de tsekwa áhuwa ñanna dem sarte na má zlauzle sarte á ekhye.

Valale átire á haye

¹³ Samsa egdza effeya fairfairfaire á sa am manem wá, itare ta kurken zlauzla mazla-aara, a ba itare: «Shamiyansha názena mí kataná miya.» Daaci ta naba tedese íre na tá tsa paare an ñane na am haye, ta dába we á haye á Kiraita ñanna an enkale an enkale.

¹⁴ Cekwaanɗuɗi wá, a naba tsekwa ge daada effeya tá dahaná an effeya á geɗi wá, a danjerhe yiyye antara paare á ñere á dem dágave á haye.

Effeya ɲanna a tsekwaa á sawa áte ire á wa á Kiraita ɲanna.

¹⁵ Ta tápá tsanmaartse emnde a baka paare ɲanna, amá jaterviyaaaja, adaba valale ɲanna an ndzedá jipu. Daaci ta naba yanhe á danjerá effeya antara paare bademme.

¹⁶ Ba aɲkwa á danjerda effeya ɲanna wá, ɲa naba de shaa haha umele am dágave á haye, zhera á haha ɲanna Kawda. ɲa dem am ice á haha ɲanna am dalbe na á dem manem, lauktu ɲa shaa ire á ɲere cekwaangudí. Ta pelaa egdza paare á ɲezla ire-aatare na an ɲgudá áte paare yaikke.

¹⁷ Zlahhe ta femhe am paare yaikke geni a kedeka. Daaci ta naba ɲgwadaa paare yaikke ɲanna an zawa-aha á jamargaul na tá tsufa paare an ɲane na. Am sarte ɲanna wá, diyared-diye ganakini aɲkwa jáhá shiili á sehuna-aara ge haha á Libiya. Adaba una ɲanna, jaterja lyawa átuge shiili ɲanna geni a de ɲanaaka paare-aatare, daaci ta naba pelaa kacakaca na á ɲá effeya ge báká paare yawe á ba an ndzedá na, ta tsekwaa náza tsa paare á haye, daaci ta yaa paare ba estuwa, á dáná ba effeya an enkale.

¹⁸ Amá válale aɲkwa á far ba sawa á ba an ndzedá. Makuralla-aara wá, ta naba válya kazlaɲa na am paare na á dem haye.

¹⁹ Wergekse, ta halantaa ba itare an erva-aatare emnde a mága slera am paare ɲanna kazlaɲa na tá tsufa paare an ɲane, ta puwanve á dem haye.

²⁰ Hare wányara-wányara puwanjerteka ice

á ñere áte vaciya, antara terlyakwa-aha adaba válale jauje ge ndzedfa, ba shifa á ñere keni ndza tamanjerka dekidfeki.

²¹ Haraare estuwa na, aley emnde na tá am paare zaruka ba názara keni. Daaci a tsetehe ge Paul, a ba ñane á elvan ge itare: «Ázara kwa jeba una emnde-aaruwa! Ábi ma andze kwa cenaa názá-aaruwa, ma baaka ura á tse am Kiraita dekidfeki! Daaci ma andze á shamika palasa na, antara nasare yaikke na.

²² Amá táslawa á kure, gazlauka. Mi kedá ba paare ka wá, ba palle á kure keni á kedeka shifa-aara.

²³ Ya ndahanaa adaba uwe estuwa, adaba Dadaamiya na yá anjwa á maganá slera na a belive malika-aara an vayiya vatena,

²⁴ a ba ñane á elvan ge iya: Paul, gazleka dekidfeki, ká daada á de katafke á male á larde á Rauma. Dadaamiya a bashakaa shifa á emnde na tá am huđe á paare na bademme ge ekka.

²⁵ Adaba una ñanna, gazlauka dawalaa, iya fantarfe an Dadaamiya geni watse á magava á ba áte una a se binaa ñane.

²⁶ Amá wá, watse á dámida válale, á de puwámíyá áte haha umele anjwa am dagave á haye.»

²⁷ Daaci hare kelaawa ju ufade á dánjerá ba effeya átire á haye ñanna tá dáháná an Maiditairaine na. An huđe á vayiya wá, emnde a paare ta naba diyeddiye geni ña herzhe an haha umele.

²⁸ Daaci ta naba kuraa sladfire á yawe ñanna an zawa ta ngudete íre átekwa wá, uksuwe kul

buwa. Á katafke cekwaṅṅuḍi ta ekkura ádaliye wá, ba uksuwe kelaawa jilyeḅe.

²⁹ Gazlargazla jipu geni a berhante effeya na paare á ṅere ádete nákwá umele am haye, ta naba puwem zawa-aha na an ṅwacá daada íre-aha átekwa ge tsa paare na ufáde á dem haye á kya iga-aara, ta ufán ba zlahhe wera á ekse.

³⁰ Daaci emnde a paare tá kátá ṅezla shifa-aatare, ta naba tsekwaá egdza paare á ṅezla shifa-aatare na á dem haye, amá ta magán ba seke tá puwa zawa-aha á tsa paare yaikke á kya katafke-aara keni.

³¹ Amá a ba Paul á elvan ge male á sawji-aha na, antara sawji-aha-aara: «Máki njarka emnde a paare na á ba am huḍe á paare, ba palle á kure keni kwá ṅezleka ḍekideki.»

³² Daaci duwa á sawji-aha, ta naba icaa zawa na an ṅuḍá egdza paare átekwa na, zlazlálá egdza paare-aatare ṅanna á dem dáḡave á haye.

³³ Herzhe á wera ekse wá, a ba Paul á elvan ge itare baḍemme: «Náwa hare kelaawa ju ufáde vatena, ba názára keni fakurteka áte we, kwá fá ba erwaunḍe, taslawá á kure, sawmbare zawuze egdza duksa.

³⁴ Zawuze egdza duksa geni kwá shansha ndzeḍa ge ṅezla shifa á kure an ṅane. Yá ndaakur ba jirire: Ba úḡje á ire á kure palle keni á keḍeka.»

³⁵ Ba a ndahese una ṅanna Paul, a eksante ḍafa, a tsetehe an ṅane, a slafanaa we ge Dadaamiya á katafke-aatare baḍemme, a ke-zlanve ḍafa na, a fantau ge ezza.

³⁶ Daaci baḍemme-aatare ekhyakhya

ervaunɗe-aatare, itare keni ta fantau ge ezza-aara.

³⁷ Kezлакula á emnde na tá am huɗe á paare ɲanna baɗemme, ta deremke buwa an kul vuye ju unkwahе.

³⁸ De natenáhá huɗe-aatare wá, ta fantau ge válya nalkame na am paare na, geni a ɗemanteka paare.

Yawe kyabanaakyá bá paare

³⁹ Weraawera ekse, amá ma tá áme keni diyarka emnde a paare ɗekidеki. Amá ta naa shiili am tate umele a zuwa yawe, haha á kya una, haha á kya una, daaci a ba itare: «Dawamiyanda paare á miya áte shiili ɲanna, a de geyegeya áhuwa má mi dzegwándzegwa.»

⁴⁰ Daaci ta naba ɗatsaa náza tsa paare na, ta yaa íre-aha ɲanna am haye, ta palaa zawa áte duksa-aha na tá já kwána an ɲane, ta ɲgudaa kacakaca áte wafke-aara geni a demda effeya á dem huɗe-aara ge baka paare. Daaci tá ankwá á zlá lá á dem tate á shiili na ba suuwe.

⁴¹ Amá ta naba de velyete áte jáhá á shiili am tate á jaja ire á yawe am haye ɲanna, aɗaba gulaagula sladɗire á yawe wá, a naba tsahe ge paare am tate ɲanna, a ɲgyemhe ge we-aara am shiili, sawa á yawe an ndzedá a se kazlanve ukhyiye-aara.

⁴² Daaci sawji-aha tá kátá ceba danggay-aha-aatare geni a ɲezlareka bi diyardiya wá yawe.

⁴³ Amá a naba piyaterthe ge male-aatare, aɗaba ɲane wayaaka á emtsa Paul. Daaci ɲane a vaterte baráma ge emnde na diyardiya yawe

emtsaafde zunḡwe geni a warwa yawe, a de njarinja áte haha,

⁴⁴ lauktu a ba ḡane á elvan ge emnde umele: «Ma ware á kure keni a eksanteksa nafa á paare na palle am erva, amá ḡawanaaḡa ba shagera, dabaudába ba emnde na á dete haha.» Ḥa segashe estuwa am yawe, ba uwe keni shaḡerka defkideki.

28

Paul am haha á Malta

¹ Am sessa shifa á ḡere am haye ḡanna ba layye, daaci ta baḡeraa zhera á haha ḡanna am dáḡave á haye ḡanna, geni zhera-aara Malta.

² Emnde a larde ḡanna ta lyaḡervaahē an ervaunḡde-aatare palle. Yawe keni fantaufe ge hya, náwa iya á ba ekhye, amá emnde a ekse ḡanna ta mbaḡerante kára yaikke, lauktu ta fantau ge gaḡer use miyenne áte we á kára ḡanna.

³ Duwa á Paul a de halanu ceceme ge kára ḡanna maa, mbate aḡkwa záhe na zlazlaḡa jipu na am huḡe-aara. Ba a cenaa hureffire á kára na záhe wá, a tsetehe am hare, a naba cuvaa Paul an slare áte erva tanduwalle.

⁴ Ba naranna emnde a ekse ḡanna záhe na an zleḡela áte erva á Paul na wá, a ba itare am dáḡave-aatare: «Baaka shaige-aara defkideki zhel na sleceba shifa á emnde. Adaba una ḡanna ma ḡezlaaḡezla deme am haye keni, dadaamiya á miya na zhera-aara jirire na á yanka ḡane keni an shifa.»

⁵ Amá Paul a slatsaa záhe na á dem huđe á kárá, ba cekwaanġuđi wanteka đekidėki.

⁶ Itare ta kurken watse á háhyá erva-aara, bi watse á mbedá á ba am tate ŋanna á emtsa, amá shekwaraashekwa, baaka názu á maganmága ge Paul đekidėki. Ta eptsante elva, a ba itare mbate ŋane keni dadaamiya.

⁷ Ankwa slekse á emnde a larde ŋanna zhera-aara Publiyuş, ankwa sleđe-aara yiyiyeka an tate ŋanna, a danjerhe ádehuwa, a de vaŋerte tate a zláva, ŋa gaa hare keye á ba am mba-aara emtsađe, lauktu ŋa segashe á sem huđe á ekse.

⁸ Ankwa eddeŋara ge sleksu Publiyuş ŋanna lapika, á wáná kemaale, antara puwa huđe na zlazláđá jipu na, a duhe ge Paul á de ezzhara. Daada Paul ázeŋara, a magar maduwa, a puwarhe erva-aha-aara, a naba mbanaahe.

⁹ Am iga á una ŋanna maa, ta naba semhe ge emnde na lapika vuwa-aatare am haha ŋanna bademme áseza Paul, itare keni a mbateraaha.

¹⁰ Ta vaŋerte duksa kwakya ge marese zherwe na ta fanaa itare áte ŋere. Am sarte na tsanjeretse am haha-aatare watse ŋa dem paare ŋá zlalá keni, ta vaŋerte duksa camballe ge mága shula á ŋere an ŋane.

Paul daada am Rauma

¹¹ Ŋa gaa tere keye zlađe adaliye am iga-aara lauktu ŋa tse, ŋa zlala an paare umele, paare ŋanna tá đaháná an dadaamiya á wulhe-aha, kwaye a sawa á sa am Alaikzandriya. Ŋane keni a se zu sarte á ekhye á ba am haha ŋanna am dágave á haye na.

¹² Daɲeraada am Sirakus, ɲa de gaa hare keye áhuwa.

¹³ Ɗa tsante áhuwa, ɲa d'ába ba we á haye we á haye, ɲa daahe á dem Rigiyus. Makuralla-aara, a fantau ge egdza effeya á sawa am manem, ɲa daahe á dem Pautiyauli á ba am hare buwa.

¹⁴ Ɗa de shaa emnde a fetarfe am ekse ɲanna, ta ndavuɲeruhe geni ɲá gá hare maka ázetare. Kwaya ɲane, ɲa daa estuwa á dem Rauma.

¹⁵ Am sarte na cenarácena egdzar mama-aha a ɲere na tá am Rauma labáre á ɲere, ta naba se yaiɲeruhe am kwaskwe á Appiyus, emnde umele ta se yaiɲeru am ekse umele tá d'aháná an Kampemaɲ keye. Ba a puwete ice-aara áte itare Paul, a naba ekhyehe ge ervaunɲe-aara, ususe Dadaamiya á ba ɲane.

Waazu á Paul am Rauma

¹⁶ Daɲeraada am Rauma maa, ta naba vante baráma ge Paul geni á njá an ire-aara, amá antara sawji palle á ufufa.

¹⁷ Am iga á hare keye maa, Paul a naba d'ahetaa male-aha á Yahudiya-aha na tá am Rauma á deɲera. Jarammeje, a ba ɲane á elvan ge itare: «Ba estuwa egdzar mama-aha-aaruwa: Ba palle a haypa na ya maganaa ya keni baaka, amá ta naba eksivaahé am Úrusaliima, ta vite ge Rauma-aha. Wallá ya ganu haypa ge jeba, wallá ya gu haypa áte naɲe-aha á eggye-aha a miya, ázareka.

¹⁸ Duwa á Rauma-aha maa, ta ndaviyu elva-aha. Am sharánka haypa áte ya hyephye ge keɲa shifa-aaruwa, tá kátá béliyaabela.

19 Amá eksararka Yahudiya-aha ðekideki ganakini tá beliyaabela na. Daaci ðaaka názu yá maganá ya umele, ya naba ndáva geni tá sá shairiya-aaruwa ásehuna, áza male á larde. Sanka ya á se icaterar sera ge emnde a jeba-aaruwa ðekideki.

20 Ya ndavakuraa ađaba una ñanna, geni yá puwetepuwa ice-aaruwa áte kure. Zawa na kwá zharaná kure áte ya na wá, ya gu duksa umele ka, ađaba ba edda una ni *Iserayiila-aha bađemme keni tá ańkwa á tamaha ba ñane na.»

21 A ba male-aha na tá elvan ge Paul: «Ñere wá, shańeránka ñere labáre á ña á sawa am Yahudiya. Ba palle á egdzar mama-aha á miya na a se mbeđańeru elva áte ka geni ka gu duksa keni, nańeránka ñere.

22 Amá wayańerwáyá ñá cenevaacena názu ká dzamaná ka. Ađaba diyańerdiya ganakini ma áme keni emnde wayaraterka an emnde ñanna ká am itare kina na.»

23 Daaci ta naba faa sarte. Vacite ñanna wá, ta sawa á ba an saga, ta vayye jipu, ta se beraa Paul am bere na á njá amkwa. Paul a váha deppe, a fantau an eńlya, dem lasar, ańkwa á palaterá ba sera á elva-aha áte elva a njá am *kwará á Dadaamiya. A palateraa názu a ndahanaa *tawraitá á Muusa, antara názu am wakita á nabi-aha umele áte Yaisu bađemme, geni itare keni a lyarvaalya.

24 Emnde umele-aatare lyarvaalya elva á Paul, amá emnde umele liyarka ðekideki.

25 Am diyaadiya Paul ganakini watse tá zlala an gajawe, zlađe kyareka emtsaade, a vaterte

elva na náwa ñane na, a ba ñane á elvan ge itare: «Elva na a baternaa Shedekwe Cudedfde ge eggye-aha a kure á kya an we á nabi Aisaya na wá, a ndaha ba jirire!

²⁶ A ba Dadaamiya: Duwa de bateránba ge emnde-aaruwa: Tá de eccena ba shagera, amá tá cenevaaka. Tá de ezzhara ba shagera, amá tá nánka.

²⁷ Adaba degdege ire á emnde ñanna, ta vanyaa hyema-aha-aatare geni a demka elva-aaruwa; ta hadaa ice-aha-aatare geni a naránka duksa-aaruwa; tá maga degdegire á ire geni a demka elva-aaruwa á dem ire-aatare, geni a saremka á sem sera-aaruwa yá mbateraambe. Estuwa a ba Dadaamiya.»

²⁸ Daaci a eksetaa elva-aara zlafe ádaliye Paul, a ba ñane: «Amá wá, diyaweddiye ba shagera ganakini Dadaamiya a belaa labáre á lya emnde ádeza emnde a jeba umele keni. Itare wá, tá de eccena.» ((

²⁹ Ba a ndahese una ñanna Paul wá, ta naba tsetehe ge Yahudiya-aha ñanna, ta naba zlala, tá ámbera á gá jawe am dágave-aatare á ba an ndzedá.))

³⁰ Paul a magaa yawe buwa kalkale am bere á haya na a eksantaa ñane, bademme á emnde na tá dezeńara keni, á lyiyaaterá á ba am ervaunđe-aara.

³¹ A magateraa waazu ge emnde áte elva a njá am *kwará á Dadaamiya, a kwaraterse elva a Yaakadada Yaisu *Almasiihu ge emnde á ba an enkale-aara, gazlaaka dfekideki.

Wakita á Dadaamiya
La Bible en wandala

copyright © 1999 Wycliffe Bible Translators, Inc.

Language: (Wandala)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 25 Aug 2024 from source
files dated 29 Jan 2022

dec75dd5-4784-5059-aa00-668d508a6b0d